

十朝东华录

十朝奉天集

臣王先謙敬編 臣陶澐宣恭校

十一月丙寅朔諭內閣戶部奏山東河南應解京餉請嚴飭解交一摺山東河南兩省應解京餉銀兩經戶部屢次奏催日久未據報解各該撫身任封疆當此需餉孔亟之時仍復任意遷延實屬疲玩已極崇恩英桂著先行交部議處仍著該撫等按照戶部所奏自本年六月為始將每月欠解銀五萬兩迅速派委委員如數起解勒限於十一月內到部儘仍前延宕即著該部據實嚴參以儆玩泄至山東省地丁銀兩積欠至一百七十餘萬尤屬不成事體前經降旨飭催報解並指撥東三省俸餉各款著崇恩一體迅速起解毋誤要需致干重咎○河道總督楊以增奏捻匪張彥等於本年七月間前赴山東嶧縣滋擾旋又駕船五十餘隻突至銅山縣之青山泉肆行焚掠經徐州道王夢齡飭派文武兜捕將大股擊散臣復揀派通判于贊隨同怡良原派之知府毓彬等馳往該處協擊餘匪茲據署徐州鎮興慶與王夢齡稟稱先將張彥之母張趙氏妻張王氏獲案並將張彥等板橋小塔莊匪巢毀探知張彥杜四李大選遁入邳州蘭山一帶令兵勇伴為撤退設伏要地張彥等聞官兵已退復至耿家灣委員毓彬等與地方文武帶兵兜剿該匪等開放槍礮我兵奮勇齊進擊沈匪船十餘隻斃匪百餘名生擒二十五名張彥等駛船亂竄我兵分路跟追該逆逃至睢甯縣鮑家樓改裝登岸經知縣高丙謀率同練勇圍捕張彥被檢練總鹿肇侯等在朱李湖獲杜四候補直隸州知州張夢麟等在銅邳交界之宗家廟亦將李大選擒獲均經正法又蕭縣有永城捻匪宋萬周大幅各聚眾千餘劫掠亦經王夢齡與前任徐州鎮叢金鏞派兵往擊斃匪百餘生擒周大幅正法宋萬復率黨數千在永宿交界鐵佛寺盤踞該鎮道等帶領兵勇馳抵該處將宋萬擒獲正法餘匪潰散頃據探稟河南虞城縣有永亮捻匪千百成羣肆行焚掠該處逼近江境見飭徐州鎮道確探嚴防勿任竄入上諭楊以增奏遵旨飭擊巨匪悉數就擒一摺江南銅山豐沛地方有土匪張彥等聚眾擄掠先經徐州道王夢齡派員兜捕擒獲多名楊以增復派通判于贊等隨同怡良原派之候補知府毓彬會擊已將張彥杜四等先後於耿家灣鮑家樓等處擒獲並擊沈匪船多隻又經在籍團練之候補直隸州知州張夢麟署邳州知州焦肇瀛在銅邳交界地方接獲逆首李大選均即正法該匪等結捻搶劫實屬罪大惡極見經該地方文武神團水陸兜擊悉數弋獲均屬著有微勞所有出力各員著准其擇尤保奏毋許冒濫○諭軍機大臣等戶部奏庫款不敷支放請飭山西省籌款解等語上年因部庫積存不敷四年分支發之用經戶部奏明於山西省地丁項下豫籌銀一百七十萬兩嗣經該省解過銀八十萬兩見據該撫咨稱晉省藩庫無款可籌下忙錢糧尚未收有成數俟徵收後即行起解本年山西省接濟部庫以及指撥各省軍需款項較多所稱藩庫支絀自係實情惟見在部庫應放之款需用浩繁仍著恆春悉心籌畫無論何款內暫行措銀四五十萬兩務於十一月內解京以供支放俟徵收下忙錢糧陸續歸款至捐免充商銀兩業經該省解過銀一百五十七萬兩其餘應繳銀兩並著飭屬催繳趕於年內解京將此由四百里諭令知之○諭沈祖懋奏徽郡防堵緊要需員督辦一摺徽甯為江浙門戶池州所屬青陽石埭東流建德貴池等縣皆與徽郡西境接連前

此逆船由大通河登岸並蕪湖賊船駛進內河俱經黃宗漢派令兵勇前往應援並派護杭嘉湖道徐榮前往徽州督辦防務茲據該學政奏稱黃宗漢欲令徐榮回杭而徽郡情形緊要必得統率有人事權方有專屬等語自係實在情形著黃宗漢何桂清仍留徐榮辦理徽郡防堵事務毋庸更易生手致有疏虞現在曾國藩等水軍已收復蘄州追至九江即可直達安慶托明阿向榮和春福濟等亦皆諭令分兵扼要協力進剿該逆奔竄無路恐其由徽窺伺江浙必須嚴密設防未可稍存大意黃宗漢不得因權任川督置身事外何桂清雖甫經到浙亦當悉心籌畫以副委任將此由六百里諭令知之○丁卯諭內閣楊需奏參帶兵官員疏懈無能等語副都統魁玉總兵楊昌泗督帶兵勇駐紮蘄州之三道橋地方於敗匪潰竄之時不能奮力扼截致官兵有驚散情事雖經事後收集跟蹤追剿究屬約束不嚴疏於防範魁玉楊昌泗均著摘去頂帶以示薄懲儻再不知愧奮即著嚴參懲辦○諭軍機大臣等前因曾國藩等水陸官軍自蘄州直下逆匪敗竄廣濟黃梅當諭令托明阿向榮等撥兵向上迎擊截其分支四竄之路並嚴飭師船迅速上駛乃本日向榮所奏師船尚在浦口守風逆賊橫江橋鍊尚未攻斷同一鐵鎖攔江伎倆何以該逆用之田鎮而曾國藩等一戰破之用之九洲洲而托明阿等屢攻不破殊不可解見在烏江一帶賊壘經袁甲三等派委恩錫張光第督兵進剿業已平毀無餘惟因水路無兵接應以致敗賊揚帆逃逸若吳全美葉長春能於攻破洲地賊營後即日駛赴上游自可水陸夾擊不但可為楚師接應並可斷絕南北岸逆賊來往應援乃任意遷延水陸隔絕殊為可恨著托明阿向榮即行嚴飭該總兵等剋日起碇將前次指撥各船悉數開赴上游沿江剿洗直抵蕪湖毋許再有推諉至曾國藩等斬斷田鎮賊鍊係分船四隊以一隊專管殿斷鐵鎖以一隊圍攻其護鎖之船使之不能相救江路一開四隊戰船皆可分投焚剿下游江面較寬施展更易為力江南北兩營師船之外尚有多槳快船豈不能酌量分隊做照辦理總由水師將弁不思設法以致賊鍊未能即破而我軍復自為鎖纜攔截上游似此相持將使紅單各船終無上駛之期徒以俟湖北師船一到合力夾攻為詞豈湖北一軍之外各營水師人員皆應坐視旁觀束手無策耶著托明阿向榮等於接奉此旨後即將攔江賊鍊迅速攻破斷不准再有遲延並將籌辦情形速行具奏如水師員弁有意玩延即著嚴行參奏其和合等處應如何分撥兵勇與袁甲三所派兵勇合力攻剿之處並著托明阿等安速籌辦但能洗淨一處即少一北竄之路並非專顧瓜州金陵遂為該大臣等職分已盡也將此由六百里加緊各諭令知之○袁甲三奏永毫捻首蘇添幅等由豫省竄回亳州之新集五馬溝大顏家集等處分股盤踞嘯聚各路匪徒號稱萬餘經知府張家駒副將朱連泰等督率兵勇進剿行抵寺兒集該匪已由新集蠶擁而來我軍分隊進攻該逆分股抗拒人數倍於官軍西股賊匪先放大礮未傷我軍而賊中火藥被轟都司戴世照即催兵施放連環槍礮一擁而進賊眾大敗東北兩股合併迎拒朱連泰奮勇當先張家駒繼之催督兵勇齊進賊匪潰散戴世照朱連泰等分路窮追撲殺十餘里殲賊五百餘人斃騎馬賊首三人生擒二十餘人該匪等經此痛剿皖豫軍威大振惟捻首蘇添幅未知去向各路探報五六十里內均無匪蹤惟西北王家岡丁家花園等處尚有餘匪臣飛

飭該文武等乘勝追剿務將蘇添幅拏獲並將亳州境內先行掃蕩俟豫省兵到卽行協剿並嚴飭潁州府陸希湜趕緊前往會同辦理 上諭袁甲三等奏進剿沿江逆匪平毀烏江一帶賊壘並勦辦逆匪懇請飭催河南援兵各摺片已寄諭英桂趕緊撥兵赴皖相機進紮正陽六安等處不得株守豫境矣據英桂奏見擬將信陽三關防兵撥赴陳州歸牛鑑調遣爲近駐潁州遠扼正陽之計並稱信陽遣撤兵勇撥赴歸德獨多派委道員張維翰接辦防剿袁甲三酌量何處空虛亦可徑行檄飭牛鑑張維翰迅速派兵前進如該員等心存畛域有意逗留卽著袁甲三據實參辦惟曾國藩等水陸各軍卽日可抵皖境沿江賊黨勢必紛竄腹地袁甲三雖駐紮臨淮所有北路各州縣均須面面顧到亦不得泥守一隅不復設法籌及何處情形喫重卽迅速督兵前往扼截萬不准有賊蹤踰淮而北一面嚴飭陸希湜趕赴市兒集一帶會同張家駒等迅將亳州境內捻匪搜捕淨盡務將捻首蘇添幅拏獲懲辦毋令日久稽誅又致句結蔓延該員職司守土無論所屬何處州縣伏莽未靖皆不容有所推諉卽豫省捻匪一有竄入境內亦陸希湜防堵不力之咎著飭知該員與帶兵各員務與歸陳各路調到兵勇聯絡聲勢或應合剿或應分捕亟行協力商辦以期淨絕根株至全滁和含各處賊營聯貫直接東西梁山前已諭托明阿向榮等通籌分兵攻擊迅飭師船上駛由蕪湖荻港徑達安慶並令武慶等力守浦口兼與恩錫張光第併力籌剿本日復諭令設計斷賊鐵鎖以通江路和春福濟圍攻廬州日久無功已屬罪有應得若能與托明阿等派到兵勇互相接應將東路賊匪先行掃蕩則廬城賊勢益孤更屬易於得手並須時時與袁甲三知會不得令剿餘潰匪潛謀北竄若頓兵城下以爲藏身之固不復兼籌大局福濟巡撫皖省固已責無旁貸和春專剿皖賊並未能迅速辦理國法具在朕不能爲該提督等稍從寬宥也將此由六百里加緊各諭令知之○諭曾國藩水陸大軍從田鎮進攻九江指日可抵安慶逆賊被剿緊急必由陸路紛竄皖省重兵聚於廬舒凡正陽六安等處均屬空虛袁甲三雖駐臨淮兵力較單勢難兼顧河南南路見已撤防正可撥兵前往以資截剿茲閱英桂奏報僅將信陽三關兵勇撥赴陳郡其或進駐潁州或往扼正陽向俟咨商妥辦是豫省之兵見在全未出境著英桂卽將撥赴陳郡兵勇酌量調往正陽六安等處相機協剿至邱聯恩駐紮光州牛鑑駐紮陳州與其遠爲聲援何如帶兵前進之較爲得力並著英桂斟酌情形將該二處防兵如何分派赴皖迅速籌辦該撫亦應出省防剿不得株守省城至歸德爲上年逆匪北竄之路地方極爲喫緊徐廣縉請假後張維翰是否可恃承毫捻匪見經袁甲三等派員追擊仍著英桂嚴飭該地方文武會剿務將捻首蘇添幅等拏獲毋稍貽誤將此由六百里加緊諭令知之○戊辰冬至祀天於闕丘○庚午以捐輸軍餉永廣陝西朝邑縣學額七名涇陽渭南各三名郃陽二名咸甯富平三原韓城蒲城岐山各一名○王申諭內閣御史尹國珍奏揀選族襲佐領請將控告上司之員扣除等語向來屬員控告上司本有立案不行之例其或事經查辦情節虛誣亦皆按律懲辦原以做刁風而維政體此案理藩院筆帖式瑞全呈控該旗都統揀選不公既經欽派王大臣等查訊確實是該筆帖式身負冤抑據情呈訴與事不干已肆行訐告者不同何得因負冤控告目爲遲刁遽行扣除轉致不符定例所有

瑞全及其子承綺等均著毋庸扣除仍著該旗都統等遵照前旨秉公揀選毋稍徇徇○以奏報遲延降四川總督黃宗漢二品頂帶仍畱任○調浙江兵一千名赴廣東剿賊○癸酉諭軍機大臣等僧格林沁等奏逆匪出巢痛剿獲勝一摺賊匪自上次誘出以後該大臣等並未實力進攻即初一等日三次撲我營盤均經擊退亦不過小有斬獲豈得謂兇猛之氣大遜於前該逆連日沿窺窺伺意圖出窺乃稱防守甚嚴不敢很撲似此遷延時日稍有鬆懈必致窺突他處見在天氣嚴寒各將士冒冷執戈朕每一動念輒為心惻該大臣僅以圍困為得計試問守而不攻豈能殲茲醜類況軍營衣領等項向恃捐輸若不趕緊攻剿勒指斷難為繼連鎮並無城郭何至抗拒數月未能破其巢穴該大臣既知士卒艱苦情形即當激勵軍心迅圖攻取若必待逆賊出巢始行轟擊豈堅匿不出即束手無策耶隆冬歲暮風雪在所不免此次既乘風奔撲則其技諒伎倆必更伺我之隙肆其詭謀與其設計圍困不如迅速進攻該大臣等務當及早蒞事以慰朕懷不得自謂調度無能致令該逆久稽顯戮也將此由六百里加緊諭知僧格林沁並諭西凌阿知之○諭勝保等奏續調官兵來營連日接仗情形並擬明空地道安用地雷台圍攻剿等語此次賊匪乘夜撲營拉開柵柵拋擲火彈雖經官兵擊斃甚多而礮營帳房業已被燒並於二十七八等日屢次出撲可見該逆思窺甚亟勝保等見籌明空地道於城根安用地雷冀得轟開城垣著即迅速妥辦惟賊情既已窮蹙斷不肯束手待斃該大臣等一面籌之地道一面仍當併力進攻勿徒恃有地雷轟擊復蹈從前呂公車等覆轍勞費無效徒延時日該大臣等務當激勵將士速籌進取之計見在官兵業已到齊無可停待天氣寒冽士卒疲憊勝保以數月之功效此區區之城而不下從前勇敢之氣日就銷磨殊不可解著即迅圖克復出其不意四路合剿毋再遷延自干重罪將此由六百里加緊諭知勝保並諭德勒克色楞善祿崇思知之○先是閩浙總督王懿德等奏銅禁業嚴諸多未便請收五斤以上銅器其五斤以下者速弛其禁至產銅之地不止雲南一省陝西商州有人呈請開辦銅礦請飭該督撫認真採辦下軍機大臣會同戶部議至是奏收繳銅器應如所奏辦理五斤以下銅器仍准民間照常使用其產銅之區請飭陝西巡撫迅即委員確查以憑覈辦從之○甲戌諭內閣向榮奏已革提督屢立戰功懇請免罪等語已革江南提督鄧紹良前因在鎮江失守營盤降旨革職留營效力茲據向榮奏稱該革員自撤回大營後隨同帶兵攻剿本年馳援東壩轉戰太平攻奪采石無不身先士卒出奇制勝尚知愧奮鄧紹良著免其治罪仍責令帶兵剿賊如果始終得力准其酌量保奏候朕施恩儘仍不知奮勉即著據實嚴參毋稍瞻徇○乙亥諭內閣福濟奏參步紳越境擾害擅殺妄為請革職嚴訊一摺安徽壽州捐納員外郎孫家泰膽敢在六安州地方冒稱欽差假託防剿私用官刑擅殺四命謬妄已極紳士辦理團練原以保衛鄉閭該地方設有兇惡棍徒亦應鳴官究辦似此膽大妄為實屬大干法紀若不從嚴究治何以戢殘暴而儆效尤孫家泰著即革職交福濟嚴行審訊按律懲辦毋稍寬縱○諭各省紳士辦理團練或經時旨派辦或由督撫及京員保舉原為其熟悉情形禦賊保家可助官兵之不逮自軍興以來各省舉行團練紳士中實能秉公盡力捍衛閭閻者不乏其人乃本日據福濟奏安徽在籍員外郎孫家泰

假託團練擅殺四命殊堪詫異因思各省紳士團練原屬幫同地方官辦理即或職分較大總歸督撫統率如有惡棍土豪擾害地方仍應控官究辦何得擅自用刑罔顧法紀嗣後各省團練官紳務各懷遵迭降諭旨於一切勸捐練勇事宜均會同地方官和衷籌辦儻該地方州縣各存意見致相掣肘著該督撫嚴行參奏若該官紳等藉團練為名營私擾累並著隨時稽查一併參辦將此通諭知之○和春等奏攻勦廬州獲勝情形得旨雖先後斃賊千餘名實未能大挫兇鋒似此曠日持久為最爾廬城牽掣大兵太覺不成事體明攻暗襲迄無成功汝等屢次奏報毫無把握負恩糜餉罪責笑辭著仍剋日攻復城池盡殲醜類勿再敷衍入奏也○丙子諭軍機大臣等駱秉章奏分路勦辦犯境粵匪獲勝一摺另片奏探防調援各情形此次廣東廣西兩省匪徒同時竄撲湖南邊界分擾桂陽道州等州縣猖獗之勢幾於應接不暇均經在事文武督率兵勇分投堵勦轉危為安該省官紳協力同心以少禦眾各員弁兵勇亦能人人用命破陣衝鋒具微敵愾同仇實堪嘉尚見在本省大兵多半隨征東下而鄰省兵力亦無可分撥各路竄匪雖經擊退仍須隨時激勵鼓舞以期捍衛地方該撫籌防東西兩路以郴桂永州為重分飭江忠濟王鑫等統兵前往堵截彼此互為策應所辦亦是惟連州賊勢甚熾韶郡見復被圍其潯陽賀縣之匪仍窺伺永明江華一帶兩路並重若專事籌防自不如相機協勦較易為力前此調赴韶州援勦之辰沅官兵一千名當已行抵該郡能先將此股勦洗不但驛路疏通並可移此有用之勇以次援應他處著駱秉章妥籌全局既須固守本境藩籬勿令賊蹤復行闖入仍應無分畛域隨時飛飭帶兵文武及各地地方官防勦兼施實力堵遏其粵東省城近日能否解圍並此外各屬賊情均著探明馳報以慰廑懷將此由六百里加緊諭令知之○以湖南防勦出力賞同知王鑫花翎餘升賞有差○丁丑 上詣 大高殿祈雪○已卯以江蘇清河縣練勇出力賞知縣吳棠花翎餘升補有差○庚辰楊需奏賊目偽丞相羅大綱偽指揮陳姓率安慶賊匪數萬竄入黃梅分踞廣濟知南岸官兵已下攻九江意欲乘北岸空虛上竄蕪黃窺伺武漢塔齊布自南岸率領陸軍渡江會剿魁玉楊昌泗由清水河西路進攻殺賊二百餘名追至崇陽橋隨剿隨進抵廣濟縣紮營塔齊布與羅澤南等由菩提塢南路進攻賊匪分路來撲我軍奮力衝殺賊勢潰散我軍乘勢縱擊陣斬黃衣賊目一名先後擒斬一千餘名收復廣濟縣城餘賊竄往黃梅復又屯聚距廣濟七十里之大河鋪官兵拔營前進行抵雙城驛賊匪二二萬人分三大股來犯塔齊布督同周鳳山羅澤南等分中左右三路迎擊痛加勦洗賊眾披靡魁玉楊昌泗後隊繼至乘勝追逐與塔齊布大軍縱火焚燒賊營四座殺賊三千餘名生擒九十餘名奪獲器械旗幟多件兵勇進逼城下復斬獲千餘名生擒一百餘名當將黃梅縣城克復餘匪散竄楚北境地一律肅清其分竄九江安慶賊匪經李孟羣彭玉麟等約會江西陸軍水陸並攻李孟羣親督戰船直趨九江城下見城外賊築礮臺三座江面有快礮船六隻雜船七八隻對岸築礮臺二座江心大沙洲築營一座極為堅厚又大木錐一座周圍築牆開孔安礮甚多錐下大戰船一隻又快礮等船三隻雜船百餘隻依泊洲後圍截江路李孟羣督兵衝過賊營進攻沙洲直趨上游焚燒賊船數隻殺賊數十人當將城外大小賊船一併燒盡礮臺內賊

匪無數復湖流回攻北岸沙洲轟斃陸賊數十人揮砍船上紅衣賊目落水又燒船數十隻將快驍各船焚斃坎斷轟斃黃衣賊首各船奮勇前進環攻獲下大船擊斃賊匪多名力戰四時始行收隊惟聞江西陸兵在十塘鋪等處接仗尚未得手臣行抵黃州計塔齊布必由黃梅出小池口與曾國藩會合擬令頭隊由黃梅進攻宿松太湖協攻安慶臣親督後隊駐廣濟黃梅之間以爲聲援並派兵勇分駐蘄州田鎮以通南岸聲勢惟江西水陸各軍既未得手賊踞九江而竄擾瑞昌南岸與國一帶情形喫重曾國藩見駐武穴臣擬前往面商機宜妥籌辦理 上諭軍機大臣等所敘進攻九江情形似該郡賊黨尙復不少塔齊布渡江而南岸官軍即不能得手是江西陸路兵勇殊不足恃塔齊布仍須渡回南岸攻克九江方能水陸會齊順流東下若塔齊布一軍由宿松太湖徑抵安慶而南岸兵力較弱則九江不能即克水軍爲所阻截未免聲勢隔絕此時曾國藩當已與楊霽會商詳細情形諒已奏報在途若即南北兼籌勿致顧此失彼楊霽摺內有逆蹤竄擾瑞昌之語未據詳晰聲敘如果係大股分竄則該逆仍欲上窺湖北與國大冶一帶尙未可恃以無虞楊霽既駐黃梅廣濟之間與瑞昌僅隔一江自應酌量分兵渡江會剿先通水師之路然後能上保楚境下搗皖城該督前奏除桂明李光榮兵勇撤回外北岸兵勇尙不下一萬六千人與其分駐田鎮蘄州遙作聲援何如合力進攻杜其繞竄儻南北兩岸專恃一塔齊布奔馳追剿則湖北江西兩省官兵豈不均成虛設耶江西派出督剿之臬司惲宸前任總兵趙如勝距省稍遠亦可由曾國藩等就近調度俾有稟承不可稍存畛域貽誤事機將此由六百里加緊各諭令知之○辛巳諭軍機大臣等英桂奏派兵赴皖令牛鑑進駐潁州並抽募兵勇赴陳督防一摺該撫見已添調副將希拉布等所帶山西兵赴牛鑑行營聽調加以以前調赴陳兵勇八百餘名正陽一路足資控扼究須與袁甲三隨時知照聲勢方爲聯絡邱聯恩兵勇既未能全數赴皖即當飭令該鎮將霍邱等處捻匪迅行剿滅不得以駐紮光州爲名頓兵安閒之地致所屬商固一帶匪黨橫行釀爲腹心之患六安見有添調之陝甘官兵前往駐守雖情形不甚喫重然亦須相機協剿毋但一意設防至該撫見擬抽兵募勇出省爲牛鑑後路應援惟歸德尙有捻匪未除或應駐陳州或應赴歸德英桂當體察事機緩急親往督辦但攘外必先安內賊氛不靖固當示以兵威至地方偶有刁民聚眾滋事則專賴管轄之道府州縣善於彈壓平時撫馭有方必不至抗官滋事之案層見疊出若因抗納錢糧即須移兵動眾徒事煩擾且恐激而生變該撫當嚴飭藩啟敷等究其起釁之由剛柔相濟總期分別良莠擇尤懲治不至釀成事端動勞兵力方爲善策英桂統轄全省所屬稍有蠢動即係該撫之責不得稍存大意將此由五百里諭令知之○河南巡撫英桂奏近日霍邱捻首丁心田由楚北遣散復聚黨數千分擾光息總兵邱聯恩馳剿捻斬多名另股巨匪李兆受時率夥黨至商固地方焚掠村莊尋仇殺掠歸德又有亳州捻首蘇添幅等疊肆焚搶臣派撥兵勇二千餘名前往剿辦袁甲三派兵會攻十月二十六七等日道員張維翰親督兵勇分赴虞夏商永等縣圍剿捕獲捻首楊新位等二十餘名復於二十九三十等日與皖省會哨合剿在亳境大顏家集擒獲捻首劉根支牛田三丁二等二十六名又獲捻首韓金鑑閻全等二十九名潁州府知府

陸希混等擊獲首匪李秉倉李秉駟等十名大股解散民悉安業嚴飭地方文武會同皖省各員合力兜剿務將蘇添幅等按名擊獲臣前帶信陽兵勇俱已分撥出防見於省中另行抽兵募勇一俟調齊即帶赴陳州督剿報聞○予湖北被戕州判魏作霖祭葬世職○壬午曾國藩塔齊布奏匪自田家鎮經官軍瓶剿倭檢點陳玉城統蘄州之賊竄廣濟偽燕王秦曰綱統田家鎮之賊竄踞黃梅及九江之小池口等處而偽冬官丞相羅大綱又帶長髮賊萬餘分佈黃梅境內各要隘臣塔齊布督同羅澤南等統帶陸軍分路進剿先後殺賊一千二百名當將廣濟縣城收復李孟羣統帶水師各船進抵九江城外分攻南北兩岸血戰四時之久燒毀賊船四十餘隻殲斃賊匪五六百名搶獲黃旗黃緞紅衣槍礮子藥不計其數千總蘇勝把總鄭沐軍功李金樑均中礮陣亡伏查該逆水中屢次大敗皆因民船太多被我燒毀頓失所恃此次民船甚少純用大小戰船抵死抗拒又以兩岸及洲中營盤木簰互相保護局勢爲之一變欲攻江中之船必先破北岸之賊欲攻北岸之小池口必先破黃梅大河鋪孔壘驛之賊臣塔齊布見擬督軍速下黃梅與水師合攻九江郡城會同剿辦上諭內閣曾國藩塔齊布奏克復廣濟縣城並九江水師獲勝已於楊霈奏到時降旨矣所有此次力戰捐軀之守備銜千總蘇勝把總鄭沐均著交部照守備例議卹六品軍功李金樑著交部照外委例議卹其水陸出力文武員弁兵勇著曾國藩等查明擇尤保奏○曾國藩塔齊布奏官兵克復廣濟後於十一月初一日在蕪黃梅十五里之大河鋪大獲勝仗殺賊三千餘人踏破賊營五座見查黃梅縣孔壘驛及江岸之小池口悍賊尙多日內當有數次大戰臣等陸軍單薄惟當步步謹慎謀定後進不敢稍涉大意至固原提督臣桂明一軍臣國藩曾與督臣商定咨令桂明駐紮黃州以防賊由蘄州鈔襲後路是以該提督未能同赴下游報聞○癸未先是塔爾巴哈台參贊大臣英秀奏塔爾巴哈台原設綠營換防官兵一千二十九員名屯工七處耕種兵七百名差操兵三百名邊議變通兵制酌裁浮費請於該處屯兵內酌撤兵二百一十名差操兵內酌撤兵九十名滿洲官兵內酌撤兵二百名共酌撤滿漢各營官兵五百名每年可節省本處鹽菜銀七千餘兩又本處官廠牧放羊隻不下數萬除酌留孳生外餘俱實賣與蒙古官兵以時價合銀計可得價銀二萬四千兩即在蒙古官兵每年俸餉銀內扣雷一萬二千兩作爲兩年歸還並可裁撤牧羊兵二百名連前滿漢官兵共裁撤七百名通計每年可節省銀九千六百兩下軍機大臣會同戶部議至是奏滿營換防甲兵在途在防均有鹽糧借支等項既據該大臣等酌量裁撤其一切鹽糧借支等項均可覈減於經費實有節省至羊隻變價以抵經費一節覈其所奏不但體恤蒙古官兵兼可捐節經費其節省銀兩應令該大臣於估調經費時聲明扣除以昭覈實從之○予江西陣亡訓導劉芳槐等祭葬世職○甲申諭內閣吏部奏捐免試俸歷俸人員與京察保薦例義未符請旨定奪一摺此項捐免試俸歷俸人員既得題升截取已屬從優所有京察大典自不得與資深入員同登上考著各該部院堂官仍照舊章分別試俸歷俸年限辦理以符定制○諭載齡崇實奏遵查川省大吏收受陋規一摺各省規禮陋習例禁甚嚴原以懲貪墨而杜黃緣若上司不能廉潔奉公又安望其正己率屬吏治之壞實由於此四川一省自總督以及

監司大員率皆通同一氣收受苞苴大吏以捐款爲名復陋規之實司道以賸削所得爲結納之資試思府州縣以取之於民者應司道之求司道又以索之於府州縣者飽督撫之欲似此營私肥己不顧廉隅無怪屬員之藉逞刁風公務之日就廢弛甚至鑽謀賄屬朋比爲奸尙復成何事體即將裕瑞以下與受各員從重按律懲辦亦屬各所應得姑念其官非一任事非一年本日已將裕瑞併案革職其餘司道各員除另案查辦外已往之事姑予從寬嗣後該省一切陋規著永行禁革如有陽奉陰違仍蹈積習或另改名目暗復舊規者著該部從嚴定擬處分具奏以儆官邪並通諭各直省督撫督率監司大員務當盪盪自飭潔已愛民毋得婪私贖貨自取愆尤儻屢訓不悛仍復罔知自愛一經發覺必即重懲勿謂寬典可恃速也懷之○諭載齡崇實奏查明督臣訪辦謀逆重案草率定讞各情一摺前據四川學政何紹基參奏總督裕瑞收受陋規並於鄭懷江等謀逆一案辦理錯誤特派載齡崇實前往四川查辦茲據奏稱鄭懷江等平日結會樹黨橫行鄉里復因糾眾爭奪解邦深石獅欲行械鬪以致居民驚徙實屬目無法紀立置重辟已足蔽辜裕瑞輕信把總曾芝荃等偵探之詞雖經各屬查明聲覆仍固執已見輒以謀叛定案該督身膺疆寄於民命重情應如何詳審慎重乃有意傳會張大枉坐人罪非尋常錯誤可比且據載齡等查明該督平日有收受屬員陋規確據尤屬孤恩溺職撤任四川總督裕瑞著即行革職所有會審承審各員四川候補同知沈英候補通判趙友泰署瀘州知州桂廷署富順縣知縣徐繼鏞候補直隸州知州音德布琦齡並審轉未經結案之前署按察使清安泰及勘詳之前任按察使升任廣西布政使胡興仁均著交部分別議處其緝拏此案之知縣曠一清守備李春錦千總蘇光贊前經裕瑞請予議敘著即撤銷署南江縣知縣伊克精阿經裕瑞奏參革職茲既查明鄭懷江並無謀逆重情雖該員於地方棍徒未能嚴辦究屬疏於覺察伊克精阿著開復革職處分仍交部議處○諭載齡崇實奏參道員聲名狼藉等語四川建昌道俞文詔經該侍郎等訪查該員前在首府任內把持公事自府廳以下各官均奔走其門聲名狼藉劣迹昭彰若非立予罷斥不足以儆官邪俞文詔著即行革職○諭載齡崇實奏請將暹刁執法之把總懲辦等語四川把總曾芝荃謝洪恩於載齡等查辦鄭懷江案情飭傳到案畫供後輒復另選覓供益用鈐記經載齡等摘頂示懲曾芝荃袖出小刀自行割傷臥地喚鬧謝洪恩亦直撲公案大肆咆哮似此兇橫藐法殊出情理之外曾芝荃謝洪恩業經載齡等咨明革職著即發往新疆充當苦差先於本地方枷號兩箇月以示懲儆○諭軍機大臣等載齡崇實奏遵查四川各案審明定擬各摺片該侍郎等前奏學政何紹基不收水禮一節殊難憑信當經諭令再行確訪並查該員聲名如何未據該侍郎等覆奏何紹基原參四川各員稱藩司楊培善諛詞有人奏俞文詔與該司聯爲一氣爲州縣代謀升調拜認師生是楊培之不能勝任藩司已可概見有無別項貪污劣迹並俞文詔索取行戶陋規得受廠商賄賂各款均著再行確查據實參奏毋得稍有不實不盡將此由五百里諭令知之○諭勝保奏連日攻賊情形並統籌全局等語覽奏殊多支飾該大臣擁兵高唐城下數月以來未建寸功據奏攻其西門南門莫可出其不意是必偵知該兩門賊勢鬆懈可以一鼓而進方爲確有把握乃不過誘殺廿餘人

仍屬不能得手所開地道與安設地雷亦未見迅速辦安復以賊濠頗深又待籌加鑲板賊情詭詐其堅拒之計既百出不窮而該大臣籌攻之具亦已多方均屢試而不效可見兵法所謂知己知彼者該大臣直未講求節次諭令速圖進取毋再遷延登藏衛孤城臨以鉅萬重兵竟無制勝之策該大臣自知慚憤不思設法剋期攻克以贖愆尤轉慮及於東南兵力之不能兼顧以楚軍南下賊勢必致旁窺防兵偃戢生懈為虞所言何嘗不中肯綮獨不知該大臣麾下將士裹糧坐甲聯偏殘年不免生懈耶見在楚境蕩平曾國藩等掃除九江一帶賊匪後即可直擣安慶南北各要隘早經諭知各路統兵大員及各該地方大吏嚴兵扼守勝保所稱南賊於年內果無蠢動則北路可望肅清是直以南賊能否北竄為高唐能否攻復之符驗舍己責人尤為鄙俚不知東境之賊不過連鑲竄餘之匪為數無多一經剿洗則南賊聞風膽落更不敢復萌北窺之心即連鑲賊巢亦失其犄角之勢勝保束手無策遁辭飾非清夜自思能無羞愧且聞該逆並未關閉城門任意出入兵勇無人過問每於數十里外搶掠村莊劫取糧食儻任其陸續宵遁茫無聞知將來以收復空城入告糜餉勞師俾逆賊蔓延他處勝保尙有何顏見朕耶著即懷遵前旨速籌攻復毋得於數日後具奏軍情一次以空言為塞責也將此由六百里加緊諭知勝保並諭德勒克色楞善祿崇恩知之○乙酉 上復詣 大高殿祈雪○展 西陵八旗兵丁應扣借支銀○丙戌曾國藩塔齊布奏賊匪自廣濟敗竄後逆首秦日綱等分率各股麇聚黃梅縣城踞險死守大河鋪立營五座臣塔齊布與羅澤南探明賊壘於十一月初一日進攻雙城驛賊匪二萬餘人乘我軍初至分三路來撲臣塔齊布與羅澤南周鳳山等亦分路迎擊右路之賊先潰周鳳山等奮登山岡衝殺岡下之賊亦潰惟中路賊排列溪岸死守不退屢戰良久我兵躍溪而過刺死悍賊數人該逆抵敵不住我兵分路追殺直逼大河鋪賊壘賊從營內衝出敗賊復行回撲羅澤南等揮軍進戰將賊營五座立時踏破共斃賊三十餘人生擒九十四名奪獲旗幟軍械馬匹無算該逆所聚之糧皆為我有初二日進兵抵黃梅城初四日周鳳山等攻西門羅澤南等攻北門令彭三元等列陣橋西以待臣塔齊布與羅澤南繞北面溝港取道而入賊眾萬餘排列營柵槍礮火箭齊施臣塔齊布督率兵勇仰擊更番壘進屢戰良久李續賓先偪木柵立斬執旗賊目數名羅澤南蔣益澧帶勇隨進彭三元等亦從西面越過二橋各勇從柵門躍入縱火焚燒賊勢大敗長勇湖北勇從東南進道州各勇從西南進適魁玉楊昌洵亦率兵勇由大河鋪至四面圍剿賊由營壘潰出經我兵刺斃二千餘人乘勢直逼北門城上賊匪倉卒奔潰各勇追殺千餘人入城後殺斃數百人當將黃梅縣城收復臣塔齊布與羅澤南等入城安撫難民餘賊下竄宿松太湖其大股仍屯踞孔壘驛小池口臣曾國藩已飛咨楊需桂明即日整隊東來於梅濟交界處擇要駐紮以堵西竄之路臣塔齊布即日進搗小池口與水師會合先剿北岸次清江面然後渡江以圖攻克九江此次千總周友勝爭先陷陣殺賊甚多請以守備補用賞換花翎守備余星元滕國獻均請免補守備以都司補用擬保守備王映軫被戕最慘懇恩照守備例賜卹又奏前月江西戰船在姑塘被賊撲營小有挫失我軍水師防範愈嚴十一月初一日賊船數十前來撲營李孟羣督彭玉麟等各營奮力圍攻轟斃賊匪無

數鏖戰三時卒未能大挫兇鋒皆因兩岸賊營太多水陸依護抗拒甚力我師與陸軍隔絕孤懸大江介處賊營之中晝夜戒嚴該逆每夜以火毬火箭近岸拋擲連日雨雪交加水師船泊中港則爲風波所撼泊岸邊則爲陸賊所撲故日來水軍勞苦有倍過於田鎮以上者臣等查近日剿辦情形賊匪搶掠焚毀日甚百姓恨之切骨臣軍所到處民皆願爲偵探嚮導兼之今年兩湖三江軍穀豐收萬民樂業翹首望治各省餉需解到軍士飽騰臣等全軍二萬人悉皆和睦幾如家人骨肉之聯爲一體軍事略爲可恃惟江西水師自姑塘失利退紫吳城該逆水陸來撲江省戰船四十餘號盡被搶奪旗幟礮械皆爲所有該逆見在安徽仿照我軍船式新造戰船三十餘號意圖西上賊艘益增其氣益熾若使屯踞湖口梗塞於鞋山姑塘之間內窺江西外拒我軍地形險隘難遽下我軍與江西咫尺隔絕不能相通探聞九江之賊出撲總兵居陸阿營盤湖口之賊分窺饒州臣等陸軍單薄南北不能兼顧而且轉戰千里亦恐疲於奔命將領中求其獨當一面者殊難其人水師營中楊載福以積勞致疾何越瑛以受傷出營陸路諸將皆勇多謀少設有敗挫無能擋住臣等隱以爲慮目今之計惟有力攻小池口孔壘驛之賊紫營江岸使水師得所依護待督臣楊需抵黃梅後北路足資堵禦然後塔齊布與羅澤南全師渡江以圖攻克潯郡上諭軍機大臣等我軍克復廣濟後於初四日收復黃梅是陸路一軍頗爲得手惟大股逆匪尙聚於孔壘驛小池口等處我軍水陸兩路聲勢未免隔絕況江西水師未能得力兩岸賊營甚多水陸抗拒曾國藩水上一軍介處賊營之中情形頗覺危險據奏所慮各端甚爲周密此時自應於屢勝之後倍加慎重萬勿稍涉孟浪致誤事機儻將孔壘驛等處賊匪剋盡紫營江岸使水師與陸路互相聯絡然後相機進剿庶不至有顧此失彼之虞楊需見駐黃梅廣濟之間卽應督飭魁玉楊昌泗等迅速進剿北岸一帶卽責成該督實力攻剿俾塔齊布羅澤南等可以全師渡江爲圖攻九江之計若專恃該提督一人奔馳南北兩岸徒勞兵力更恐銳氣銷磨於攻剿轉無裨益江西帶兵之臬司惲光宸前任總兵趙如勝等已有旨由曾國藩調度儻該員等不知奮勇剿賊卽當嚴參懲辦逆匪搶奪江省戰船四十餘號又在安徽造船七十餘號意在拌力死拒該侍郎等務當督飭水陸各軍謀定後戰設法迅圖克復九江郡城毋令逆賊盤踞日久牽掣我軍將此由六百里加緊各諭令知之○予江南陣亡參領承陞等祭葬世職○丁亥諭軍機大臣等葉名琛柏貴奏省城北路剿匪連次獲勝一摺朕詳加披閱近省一帶辦理似有頭緒該督等摺內所敘均係八月內情形見在閏時又將三月自必續有勝仗近省各匪巢諒可悉數掃除該省滿漢官兵同心協力紳士壯勇均能聯絡勇往正當乘此軍威甚盛之時一鼓作氣肅清巢穴根本既固然後安速布置將東西北三處匪徒漸次剿辦著穆特恩托恩東額葉名琛柏貴督飭滿漢各營將弁兵勇激勸在城官紳士庶迅速將附城匪巢及所轄各屬匪巢全行撲滅毋留餘孽以淨根株至東路潮州各屬據本日奏報剿辦尙爲得手但以本地之兵禦本地之賊誠恐轉戰力疲若省城能一律放定則移得勝之師分路四出東寧閩兵救應潮州西會廣西官兵攻復肇慶北會江西湖南兵勇疏通南韶大路皆可措置裕如見在王懿德所派漳泉兵勇二千名已交總兵慶寅管帶由海道前進略乘章所派

辰沉兵一千名已交署逆擊龍金源管帶於十月初四日由長沙啟程陳啟邁所派南康練勇二千五百名已由始興進剿勞崇光所派之右江道張敬修計日亦可出境各路援兵四集必須本省官兵大振聲威爲之倡率方能合力兜剿廣東民氣素強兵力亦足見雖各屬匪徒蜂起一經辦有端倪諒不難次第剿除也將此由六百里諭令知之○予河南陣亡副將春明祭葬世職建祠廣東傷亡知縣倪森祭葬世職○戊子諭內閣惠親王等奏請飭山西採辦鐵斤解交京局以資鼓鑄一摺見在鐵錢局四廠開鑄鼓鑄歲需生鐵一千二百萬斤僅就附京地方採買不敷應用著山西巡撫卽飭藩司迅派廉能可靠之員如式採辦務於咸豐五年二月以前先將一半生鐵六百萬斤解交京局毋得稍有短絀致誤要需所工本運費卽在該省藩庫庫款項下作正動用再由鐵錢局卯錢內照數劃出按月解交戶部以抵該省應解部庫之款其每年例解鐵斤既經停解仍將節省價腳銀兩解交部庫以清款目○諭軍機大臣等蔣蔚遠趙萬春奏安南匪徒滋事並督臣在營病故等摺片遵義大營調集滇黔兩省官兵爲數不少正當攻剿喫緊之際而督師大員遽爾出缺軍情不無惶惑趙萬春以本省提督統轄全軍責無旁貸務宜一面鎮定軍心一面速籌撲滅若稍事耽延致令負隅日久雖遵義興義相距尙遠未必遽至蔓延旬結而南北兩路同時蠢動黔省餉絀兵單勢將不可收拾該撫見駐紮札佐距省城甚近雖云居中調度仍不可一味株守以見在賊勢而論遵義一路兵力甚厚且有川省之兵前後夾擊興義匪徒亦係烏合初起金剛保所帶兵已有一千五百名加以前調滇兵七百名亦儘敷剿辦該撫務須統籌全省大局以先期遵義爲要興義一帶卽責成金剛保迅速妥辦毋任遷延將此由六百里諭令知之○雲貴總督羅繞典卒子祭葬卹蔭諡文僖賞其孫清提舉人○以恆春爲雲貴總督兼署雲南巡撫調王慶雲爲山西巡撫吳振棫爲陝西巡撫未到任前命工部右侍郎載瀚署理以舒興阿爲雲南巡撫由蔣開巴哈台○以貴州安南縣城被賊竄陷草知府張鏞等職仍留任剿賊○緞遠城將軍善祿卒子祭葬卹蔭諡勤壯○子貴州安南殉節知縣朱右賢祭葬世職建祠○己丑袁甲三奏蘇添幅在寺兒集戰敗後餘眾逃匿官兵分赴新集王家岡丁家花園顏家集各處追捕先後擊獲首夥李秉倉等八十餘名陸希混張維翰等會商以該匪並無大股無庸聚兵會集遂各歸各境沿途復擊獲馬老虎石洪等四十餘名復探得毫境泥臺店蔡家莊等處尙有伏匪分兵前往掩獲多名內有大擒首丁士彥張巨善劉根等三犯卽時正法又擒首張傳聞前在寺兒集被破轟斃又王大柱卽王秉善見充勇目暗中通匪業已鎖押責令計斃蘇添幅並以誘餌張落刑如能得手不難同時萬除臣派出文武各員以南路逆匪被剿窮蹙必須嚴防紛竄已札令陸續撤隊暫回臨淮大營聽候差遣該文武等著有微勞懇恩給予獎敘 上諭內閣此次剿辦回竄亳州擒匪以少擊衆及早殲除在事員弁均屬著有微勞卽補副將朱連泰著賞加總兵銜都司戴世熙著賞換花翎知府張家駒著賞戴花翎○諭袁甲三等奏進剿盧舒以南逆匪一摺並片奏續獲勝仗等語賊匪竄擾桐城並於大小兩關踞險抗拒經袁甲三等派令參將劉玉豹等帶兵進剿該逆紛紛倒退回柘大關賊紆青等分帶兵勇三路進取賊眾擾亂我兵長驅入關窮追至白沙嶺計自

午至西連壽兩關餘匪竄香桐城劉玉豹賊紆青等進薄東南兩門躍過濠溝直抵城下廬江賊匪會合安慶賊匪來桐救援賊紆青等復合力屢戰餘眾竄入街內其竄出北街者復被郭錦及文生鹿慶商等衝殺賊紆青自率大隊轉至賊後兜圍殲戮眾賊殆盡奪獲旗幟器械無算桐城爲驛站通衢大小關爲桐城要隘見已奪險薄城大兵所至沿途居民無不爭先迎叩鼓舞歡欣著袁甲三等卽飭帶兵文武乘此軍威大振之時趕緊將桐城縣城克復以孤廬城賊勢所有出力員弁兵勇並著袁甲三等先行擇尤保奏候朕施恩○諭葉名琛柏貴奏剿辦省城北路股匪疊獲大勝攻毀賊巢一摺廣東省城北路匪徒經疊次剿洗後仍於佛嶺市蕭岡龍潭觀等處踞險抗拒葉名琛等飭合參將衛佐邦濟山等各帶兵勇分路進剿千總王大榮帶潮勇首先攻入龍潭觀縱火焚燒賊眾驚潰蕭岡賊亦慌亂衛佐邦乘勢揮兵闖入賊巢該匪潰奔當將龍潭觀蕭岡兩巢遂蕩六百餘座全行燒毀我兵分路前進鈔襲佛嶺市後道員沈棟輝揮兵乘勝圍攻火箭火毬打入賊巢遂蕩延燒我兵奮力鈔擊該匪望風披靡紛紛奔竄賊營二十餘座全行燒毀統計旬日之間連破賊巢共斃賊二萬有餘斬首三千餘級生擒五百六十九名所有疊次尤爲出力之將備員弁著該督等覈實保奏近省北路賊壘雖已漸次剔除所有逃往石門石井各鄉餘匪著該督等務卽乘此聲威全行剿滅以靖地方○諭奕山圖仰布奏籌議牲畜變價抵給餉項一摺所有察哈爾額魯特兩營官兵應領餉銀著照該將軍等所請准其將伊犁見存牲畜估變銀五萬二千六百七十八兩零以抵該官兵餉需分作三年抵扣完款以示體恤○諭軍機大臣等此次賊紆青劉玉豹等帶兵進剿廬舒以南奪回大小兩關直逼桐城賊已失其所恃辦理甚爲得手惟該員等所帶兵勇不及二千餘人而桐城南距安慶西距潛山東距廬江相去皆不甚遠我軍深入重地三面受敵卽使克復縣城亦恐兵力過單勢難守禦臨淮等處卽無兵可撥會國藩塔齊布水陸兩軍見在圍攻九江該處賊匪尚多亦恐不能剋期抵皖賊紆青等攻剿桐城固不可遲延觀望亦不可銳進貪功致有挫失舒城距桐城僅一百二十里秦定三在彼督兵攻剿勢較易聯絡著和春等卽飭該提督迅速籌撥兵勇駐紮大小關以爲賊紆青等後路聲援該處爲舒城安慶往來之路今爲我軍所奪不特舒城之賊勢已孤卽廬州之賊亦必氣奪和春等正當乘此機會一面督飭秦定三迅攻舒城一面嚴飭各營兵勇進剿廬州如能克復郡城卽可統兵南下與賊紆青等合力進剿儘再事遷延致大軍爲其牽掣和春等貽誤之咎斷難寬宥逆匪在林母圩偷結賊營業經署臬司恩錫廬鳳道張光第督率兵勇攻毀賊壘惟和州含山尚未克復浦口一帶賊船往來屬集善飭該員等隨時偵探相機進剿勿得株守一隅其上游敗竄之匪並著實力堵禦毋稍疏懈將此由六百里加緊諭令知之○庚寅晉封 懿貴人那拉氏爲 懿嬪○祁寯藻因病乞休命以大學士致仕命賈禎爲大學士調翁心存爲吏部尚書以周祖培爲兵部尚書許乃普爲左都御史轉張祥河爲吏部左侍郎調卓樞爲吏部右侍郎○辛卯諭內閣軍興以來需餉浩繁籌撥金已不下數千萬兩各省辦理捐輸頗爲踴躍捐費各生疊經降旨優加獎勵陝西省素稱富庶且民風淳樸好義急公前經王慶雲奏請捐借並行聞此時爲數尚屬無多固由民力或有

未齊亦該地方官未能設法勸諭所致見在楚中水陸大軍建瓴東下由潯皖直擣金陵其餘各路軍營亦頻經奏捷方期迅掃妖氛與吾民共登衽席軍餉要需尤應寬爲籌備所有陝西省捐借事宜仍著責成該撫督率藩司飭令該地方官會同特派勸捐之在籍紳士等妥爲勸導俾身家殷實者均得遂其輸將之悃一俟集有成數卽由該撫迅速奏報俟朕優加獎敘儘任合屬吏等勤勒侵漁藉滋蒙混以致該紳民等遷延觀望有誤要需惟該撫是問○壬辰僧格林沁等奏連鎮賊匪受創數十次時思潰竄連日窺撲瑞麟都興阿等營牆均經官兵奮勇擊退先後斃賊無數該逆窮蹙愈甚防守愈堅臣等每欲進攻該逆無分晝夜在壘瞭望並埋伏多名擊槍以待不容我兵進撲無隙可乘陸續投出民人六十餘名據稱情願殺賊報效臣逐一查看俱係誠心向順見在賊糧僅敷一月該逆斷不肯束手待斃勢必舍命奔撲臣等已諄飭各營加意嚴防乘機進攻大約年內可望蕪事 上諭軍機大臣等連鎮逆匪屢次伺隙撲擾營盤該大臣等僅能待其出撲後擊退回巢並不思實力進攻此次所陳擊敗各情亦屬仍前敷衍斃賊多寡亦無確數據云年內可望蕪事卽使實有此把握又豈得謂之迅速耶所奏賊多設伏以待不容我兵進前以數萬官軍剿此窮寇若竟任其死守不圖進取日久相持兵精支絀思之憤悶所有投誠賊匪恐不可恃尤應蓄心駕馭勿墮奸計當此天氣沍寒士卒疲乏該大臣等惟當激勵各營文武趕緊籌攻斷不准再延時日致生他變節次批示及所詳諭旨備極詳明別無可諭矣將此由六百里加緊諭知僧格林沁並諭西凌阿知之○癸巳 上再詣 大高殿祈雪○諭軍機大臣等本日據陳啟邁奏安慶逆匪分竄九江湖口擾及吳城一摺又據和春福濟奏楚北敗匪由太湖竄至英山縣城失守等語湖北逆匪經曾國藩等大軍痛剿之後餘匪竄入皖境本屬意中之事惟和春等攻剿廬州兵力不敷分撥袁甲三駐紮臨淮亦恐兵力較單勢難兼顧此時安徽北路情形喫緊楊需見駐黃梅廣濟之間該處與皖境毗連該督應卽相機移師前進遏賊北竄之路著卽悉心籌畫迅速辦理毋得以楚境肅清稍分畛域至安慶逆匪分竄九江擾及吳城江西兵勇業經失利既不能與曾國藩等會合剿擊且恐該逆深入江西牽掣我師則曾國藩等水陸諸軍亦難直抵安慶孔壘驛小池口等處賊匪是否業已殲除塔齊布等能否渡江攻剿潯郡此時該侍郎等所帶兵勇雖不能分撥赴吳城協剿亦當設法兼顧毋令分竄總之上游攻剿得手則江西安徽皆匪蹤所必至楊需等務當統籌全局使水陸各軍聯爲一氣將濱江兩岸賊氛以次掃蕩實深殷盼將此由六百里加緊各諭令知之○諭前因曾國藩等水陸各軍節次於蕪黃田鎮等處大挫賊鋒朕卽慮楚軍得勝之後該逆必紛紛旁竄諭令和春等趕緊克復各城毋使大兵爲賊牽掣致逆匪被偪有北竄之慮乃本日和春等所奏廬舒舍山各營攻剿情形均不過小勝而博勒霍布等所帶兵勇雖入太湖縣城卒被敗匪攻陷英山亦復失守固由該提督等兵力未能兼顧亦因廬州等處未卽克復致竄賊之賊分支突入剿辦又多棘手見在含山官渡烏衣鎮一帶雖有李鴻章恩錫張光第等在彼駐紮攻剿惟皖省土匪本多若再與逆賊勾結勢更蔓延見已諒楊需就近由楚分兵前往堵剿而賊情飄忽該提督等仍當嚴飭秦定三迅復舒城以便移兵往剿如果事機緊急卽著秦定三

酌派弁兵馳往應援其六安一帶即飭知州茅念劬糾集鄉團以資堵禦其前調河南防兵一千名幫同玉崑防守正陽一節已據英桂奏稱飭牛鑑帶兵前往蒼古會袁甲三迅速迎提扼守要隘和春等師久無功儻復不能遏賊北竄朕必重治其罪將此由六百里加緊諭令知之○諭此次官兵連攻九江不能得手多有傷亡以致賊匪分股擾及吳城英擄戰船八十餘隻逆餓猖狂殊深憤悶吳城距省甚近設被賊入踞窺伺省城關繫非細本日已將江西緊急情形諭知曾國藩等令其斟酌辦理但曾國藩等攻勦江面賊船正在喫緊能否分兵助剿殊難懸定塔齊布等陸路一軍須攻克孔壘驛小池口之後始能渡江進取潯城此時陳啟邁務當嚴飭帶兵員弁趕緊將吳城賊匪悉數殄除以固省城藩籬至九江兵力疲弱仍著黃成居隆阿挑選精壯認真訓練以資攻剿勿專待楚軍援助致失機宜將此由六百里加緊諭令知之○河南巡撫英桂奏邱聯恩督剿光屬捻匪擒獲巨捻丁心田歸德一帶擒匪自張維翰接辦後頗為得手惟輝縣刁民糾眾數千任意抗拒開封衛輝二屬人心亦覺浮動見當漕糧緊要擬暫駐省城就近調度俟情形稍定再行前赴歸陳擇要督防得旨一切情形均悉張維翰雖已被參然督防尚屬得力著對酌留防亦可至輝縣不至釀成巨案方好○予江南陣亡遊擊海明等祭葬世職○撥河南司庫銀十五萬兩備安徽軍需○甲午諭內閣京師入冬以來未霽雪澤疊經降旨設壇祈禱並親詣 大高殿行禮迄今已逾旬日尚未滙霽祥異朕宵旰焦勞時勤修省因思清理庶獄莫可感召 天和所有刑部及順天府見審人犯或因未經定案久羈囹圄疾病顛連情殊可憫著該衙門督飭承審各員將已結未結各案逐一清釐具有情節可矜甚至含冤待白者務即悉心研鞠立予平反至問徒以下輕罪人犯以及干連待業候質人證訊明後即行發落省釋毋任稽遲積壓拖累無辜此外尋常案件並著速行完結以期翕應祥和用副朕欽恤惟刑之至意○是月展緩兩淮富安等十四場被水竈地新舊額賦甘肅河州等八州縣舊欠額賦及涇州等九州縣新舊銀糧草束

咸豐東華錄四十二

十二月乙未朔諭內閣扎拉芬泰等奏喀爾喀扎薩克圖汗賽音諾顏二部落汗王貝勒貝子公扎薩克台吉等及所屬部落扎薩克郡王桑噶錫哩等見因逆匪尚未剿除淨盡情願捐馬一千一百餘匹以備軍營調用等因呈請代奏請旨一摺喀爾喀扎薩克圖汗賽音諾顏二部落汗王貝勒貝子公扎薩克台吉等情願捐馬二千一百餘匹以備軍營需用洵屬衷悃出於至誠實堪嘉獎惟該汗王等悉賴此項牲畜度日且各處逆匪業經官兵疊次獲勝殲斃多名殘喘乞膺自可指日剿除著扎拉芬泰等將此轉諭該部落汗王等其所捐馬匹均著毋庸賞收以示朕嘉獎蒙古體恤世僕之至意○丙申諭內閣會同藩等奏請將帶勇滋事之員革職治罪等語同知銜即選府經歷縣丞李光榮管帶川勇協勤於該勇等強坐民船不給船價並將船戶砍傷有心庇護迨師至漢口經會同藩等獲滋事之勇派員審訊李光榮膽敢率眾持械奪犯復縱容該勇擄江家詐駕船搶賊並於羅澤南移營撤餉之時突往搶掠錢文傷斃長夫多名種種不法實出情理之外李光榮著即革職鞫問交楊需嚴行審訊按律治罪毋稍寬縱○會國

潘塔齊布奏自我師北渡後該逆三次大敗皆僞王秦曰綱僞檢點陳玉城兩股居多其僞丞相羅大綱率安慶新到之賊尙盤踞孔壘驛小池口一帶與潯郡之賊對江而營使逆船得依岸久踞老我水師本月初七日羅澤南督同李續賓等共四千人拔營前進行二十里至濯港地方突遇大股賊二萬餘人由孔壘馳至營於濯港小市之北羅澤南飭令諸軍堅伏不動相持五六刻該逆分一支從田壩繞山撲我東岡之師一支從湖尾撲我西岡之師而由中路進者獨多直逼岡前我東岡之勇一鼓而下斃執黃旗賊數名西岡諸勇旋亦衝出兩路賊潰分投追殺中路悍賊慶戰良久前者已死後者不退東西官軍進至市前漸鈔中路之尾賊黨始三路同潰追入濯港市內斃賊四百餘人偏潯市西池中者八九百人其大股循市南奔逃我兵沿途追殺又斃賊百餘人其小股由湖汊之西逃者湘勇分數隊往追寶勇繼之追至數里有伏賊從樹林中突出勢甚兇猛諸勇退卻陣亡三名李續賓等率勇由湖中橫隄鈔過湖邊之賊又潰追殺百餘人共斃賊約千四百五名生擒八十五名十一日塔齊布進駐白湖渡十二日我軍全師進攻以北路軍隄太窄不能布陣乃至高魚金壩訪有小路可繞賊巢之西南塔齊布帶各標從北路隄上入羅澤南帶勇從西南烏魚金壩分路而入殺斃前隊賊匪數名追至孔壘驛賊見我兵三面環至施放槍礮子如雨下其悍者出牆迎戰勢甚兇猛我兵一擁而前悍賊亦入牆抵禦木石紛擲槍礮愈急我軍跟蹤乘之突入土城或三四人以肩爲梯互乘而入其尤勇者卓子於地一縱躍入入土城者已多而城外仍合成長圍賊黨無處可逃偏入東面寒流泥淖之中溺死者以千餘計奔入市中被諸勇追殺者約二千人因縱火大燒街市會西北風作孔壘市中數百家須臾灰燼諸勇環守賊眾鮮得脫者生擒長髮賊七十九名內有僞副丞相余幅勝一名總制陳姓雷姓二名師帥師帥十餘名立子正法國藩以孔壘既破小池口之賊必不能支卽飛飭水師進擊李孟羣彭玉麟等於十四日卯刻進攻而小池口陸賊已於十三夜全數奔竄矣餘賊爭駕小划南渡我軍急起直追賊划駛近南岸陸賊開礮護之都司秦國祿等衝煙進擊賊眾紛紛墜水擊沈賊划七八隻焚毀大木簞一座復延燒洲上賊營一座遂縱火燬燒小池口陸路賊營煙燄蔽空彭玉麟乘勝追至新港復斃黃衣賊目一名賊遂披靡奔竄國藩卽於是夜泊紫九江城外十五日塔齊布亦至小池口水陸會合該逆於西門出數百人向江心施放槍礮李孟羣飭勇上岸追殺各戰船復轟礮助之賊始奔潰廣勇連擲火毬燒毀龍開河木城一座彭玉麟等遂率大隊直下湖口至扁擔峽洲邊焚毀賊船甚多名營遂分泊口內並口外之梅家洲八里江等處緊扼要隘連日據生擒並投誠之賊供稱秦曰綱自黃梅大敗竄往舒城羅大綱自孔壘大敗卽日竄至小池口率其死黨千餘渡江連夜奔至湖口僞丞相林姓見踞九江與湖口相犄角將爲死守抗拒之計塔齊布於郡城上游渡江將繞出南路羅澤南於郡城下游渡江將圍攻東路水師扼截湖口務使賊所搶奪江西船礮全數兜剿不許竄出大江免貽後日無窮之累三路痛殲可期上復潯城下清湖湖以制劇賊之命此次水陸兵勇廓清推陷轉戰無前補用守備朱南桂冒險衝陣連撲賊營應請免補守備以都司補用都司童添雲每戰摧鋒不避矢石應請以參將升用其餘出力員弁兵勇請由等

嚴明保獎仰候恩施其陣亡兵勇查明照例辦理又奏_臣等一軍陸路實向單薄北渡則不能兼顧南岸南渡則不能兼顧北岸屢欲添調兵勇然非實在得力之軍則無益而反有損是以倍加審慎見在由小池口南渡上則攻圍潯城下則勦辦湖口已屬不敷調遣而北岸宿望潛太等縣尤須有得力之員協勦方無顧此失彼之虞查湖北按察使胡林翼識略冠時所帶之勇曾經訓練_臣國藩前與督_臣楊需往返咨商札飭該臬司帶勇二千駐防田家鎮外助大軍之聲援內固鄂省之藩籬中則控勦匪黨以靖輿治_臣靳黃之餘孽酌留礮船以巡江楚接壤之河面該臬司接札後即馳至廣濟之武穴籌議設防事宜武穴去潯僅九十里_臣等見因攻圍九江陸軍太單就近飛調胡林翼來潯助勦一俟克復郡城攻破湖口再行飭回楚境駐防田鎮至北路黃梅太湖等縣鄂院毗連北通舒廬東接宿望必須有重兵分布查鄂省有副將王國才都司畢金科樸實勇敢取軍有法_臣國藩咨商督_臣楊需督_臣即酌撥勁旅札飭該副將都司交_臣等調遣擬俟鄂省肅清即由_臣塔齊布督帶出境東征至皖省各員查有池甯太廣道何桂珍見帶勇千餘人督同已革知縣李沛蒼在六安等處防勦四品頂帶臧紆青亦帶勇至霍山疊准袁甲三函關該道等齊至英山俟_臣等一軍入皖即可會合進剿今_臣等攻破黃梅已逾半月而何桂珍尙無來會之信見值勦辦喫緊急須併為一軍乃能呼吸靈通首尾相應仰懇 皇上天恩飭諭鄂省之王國才等皖省之何桂珍等概入此軍歸_臣等調遣其所帶之兵勇由_臣等簡汰分別辦理庶兵力稍厚於大局更有裨益 上諭此次水陸官軍續獲大捷肅清潯郡江面見在大軍扼守湖口內外要隘九江逆匪首尾不能相顧可期即日掃除會國藩塔齊布運籌決勝勦力同心麾下將士率皆轉戰無前爭先用命皆由會國藩等調度有方覽奏之餘實深嘉慰會國藩著賞黃馬褂並發去狐鞍黃馬褂一件白玉四喜搬指一箇白玉巴圖魯翎管一枝玉靴小刀一柄火鏢一把交塔齊布祇領以示優獎補用守備朱南桂冒險衝陣遠撲賊營著免補用備以都司補用升用遊擊董添雲每戰摧鋒不避矢石著以參將升用其餘出力員弁兵勇即著查明具奏候朕施恩○諭軍機大臣等會國藩塔齊布奏陸路兵單南北不能兼顧朕已早慮及此是以疊次降旨命楊需出省督勦北岸命陳啟邁派兵出江夾擊並桂明等不能得力准會國藩單銜奏委及輝光宸趙如勝之兵均歸會國藩等調遣之諭原以皖鄂江西三省帶兵之員多有距本管督撫較遠而離會國藩大軍轉近者非事權歸一則呼應不靈隔絕推諉於軍情大有關係所有湖北臬司胡林翼所帶之勇副將王國才都司畢金科所帶之兵均著楊需飭令星夜馳赴會國藩等軍營悉聽該侍郎等調遣其和春等派出之已革道員何桂珍袁甲三派出之四品銜臧紆青等見在桐城一帶諒因英山失陷是以未能南出潛太著會國藩即行飛飭催提併歸一軍如有將弁笨鶩兵勇孱弱者即行認真簡汰不得稍存避嫌之見致一軍中強弱不齊轉費周折皖鄂毗連各屬昨已諭楊需移師前進迅速防勦著即懷遵辦理由宿望潛太一路次第進攻並防逆賊由瑞昌擾竄興國轉出會國藩等大軍之後不得專駐楚境致成株守楊需帶兵出省後湖北省不免空虛著俟克復九江後即飭胡林翼帶兵回至楚境以資防堵江西逆匪昨據陳啟邁奏已於初五日竄聚吳城尙在此楚軍獲勝之前明

係我兵攻勦緊急該逆聞風內竄仍堅踞壽郡牽掣大兵陳啟邁所請酌調楚師之處能否分撥著會國藩等妥籌兼顧江西兵力
輒弱至此年餘以來所謂訓練者安在惟光宸係督辦大員趙如勝亦會膺專閫若不整頓全軍迅將吳城逆匪擊退或致省城
復有震動朕不能爲陳啟邁有尤不能爲惲光宸等曲從寬典也會國藩另片奏請飭江西製造夾布口袋一萬條每袋計可盛土
百斤等語即著陳啟邁如數製備迅解會國藩等軍營備用毋稍遲延將此由六百里加緊各諭令知之○戊戌諭內閣前因已革
漕運總督楊殿邦有應賠提用銀兩曾經降旨交福濟飭令該革員如數賠足茲據該撫奏查明該革員實用銀數見未據經手各
員報銷請飭河臣就近調集實算等語所有楊殿邦提用未銷鹽課銀十二萬餘兩即著楊以增調齊卷宗及領放經費之已革揚
州府知府張廷瑞前准北監製同知李安中海州通判許敦詩與楊殿邦將用存確數逐一實算責令該革員等趕緊賠繳毋任藉
詞延宕○諭前因安徽六安英霍等州縣紳民捐貲出力勦賊克城當經降旨將該州縣咸豐三四五等三年地丁錢糧加恩概予
豁免茲據福濟奏稱六安英霍之復藉資民衛之力居多請將漕米衛糧一體豁免加恩著照所請所有六安州英山霍山兩縣應
徵咸豐三四五等三年漕糧南米及屯折津貼錢糧概予豁免該撫即刊刻磨黃徧行曉諭務使實惠均霑毋任支費舞弊用副朕
嘉獎忠義有加無已之至意○諭和春福濟奏克復英山縣城一摺前據和春等奏楚北敗匪由太湖竄擾英山當經諭令督飭文
武趕緊勦辦茲據奏稱十一月初十日英山縣知縣蘇秀槐招集團練並商撥湖北羅田壯勇進剿殺斃守門逆匪奪入縣城殲賊
無算逃奔之賊並經練勇截殺多名該撫甫經到任前因本城兵勇空虛被賊突竄旋即克復城池尙知奮勉應得處分著加恩免
議湖北羅田縣知縣彭仲芳派撥壯勇逾境援剿洵屬得力著賞加知州銜以示鼓勵○諭軍機大臣等吉爾杭阿奏疊次攻剿逆
匪轟塌城垣一摺上海逆匪屢次冒死衝突復於陳家木橋一帶興築礮臺竄掘地道十月十五日以後屢次出撲雖經我兵殲斃
多名並於南門迤西乞掘地道惟僅能轟塌城垣仍未即時攻克且兵勇傷亡亦復不少該撫督兵剿賊日久無功覽奏各情殊深
焦急至佛蘭西國提督噶呢喇率賊衆礮隄並開礮擊賊與逆匪疊隙已成原可乘機攻剿惟在因勢利導督飭兵勇剋日進攻
限於年內將上海縣城克復若曠日持久使蕞爾孤城爲賊久踞該撫貽誤之罪難辭待遊寬宥也將此由六百里加緊諭令知之
○諭吳振械奏黔匪逼近滇省見籌防剿一摺貴州興義府匪徒滋擾攻撲興義郡城安南普安縣城相繼失守本日據蔣爵遠奏
安南普安縣城業經收復惟餘匪尙多猶慮竄突且興義匪黨尙未擊退該處距滇甚近亟宜嚴加堵禦該撫見調曲靖尋甯兩營
並昭通等兵派委參將鄂勒霍巴管帶前赴平彝會同晉曲江府知府賈洪詔安籌辦務當嚴飭該員等擇要扼守毋令黔匪窺
越滇境吳振械見署總督兩省軍務均宜統籌妥辦尤當持以鎮靜不可稍涉張皇再前因黔省軍餉緊急當經將蔣爵遠奏准撥雲
南藩鹽庫銀二十萬兩茲據蔣爵遠奏稱滇省止能撥銀七萬一千兩實屬不敷又放著吳振械查明前項奏撥銀兩除已經起解
外其餘未解銀十三萬兩仍行籌款撥解貴州軍營毋誤要需將此由六百里諭令知之○諭前以貴州南北兩路賊匪蠢動諭令

蔣蔚遠不得株守札佐並諭趙萬春等先期遵義匪徒其興義一帶責成金剛保福連期辦本日據吳振械奏賊氛逼近滇省見於平彝等處設防並據蔣蔚遠等奏收復安南普安兩城金剛保督兵進援興義賊鋒挫府城尚未解圍至遵義桐梓仁懷有無接仗未據提及該撫等前後所調官兵為數不少茲已諭令駱秉章由湖南調派勁兵一千名迅速赴黔並諭樂斌將綦江合江防堵之兵即行前進合力兜剿胡林翼見在帶兵由湖北追賊東下未能調回黔省該撫惟當懷遵前旨不得株守札佐即與趙萬春等就見有兵力迅將遵義等處賊黨全數痛殲勿得專盼援兵遷延時日其金剛保福連所帶兵勇亦恐單薄並著分兵協助若興義竄匪擾入滇境朕惟蔣蔚遠等是問有人奏桐梓之賊起釁根由並該撫等遷延畏葸以致賊匪橫行若如所奏是該巡撫提督縱寇失機實堪痛恨著照所參據實覆奏勿謂貴州距京遠朕無間知也原摺著鈔給閱看黔省需餉已令吳振械趕緊籌解並有旨諭恆春即赴總督任矣圍門殉節之已革署普安縣崇景已降旨議卹惟據吳振械奏該革員係自縊殉難情節不符著蔣蔚遠再行確查具奏將此由六百里加緊諭令知之○欽差工部右侍郎載齡等奏遵查四川學政何紹基考規嚴肅無寬緣交結之人惟名士自居未免睥睨羣倫輿論尙許其公平官場競營其乖僻得旨所論尙為平允既無別項劣迹著毋庸議○己亥諭內閣朕惟察吏所以安民守令之賢否與閭閻之疾苦呼吸相關各直省督撫於屬吏之循良者即宜覈實保奏其劣迹昭著各員尤宜指款嚴參從重懲辦以儆效尤近日各督撫於地方官執法營私貪汙卑鄙往往未能破除情面嚴行參劾即或事經發覺難於掩護亦第以聲名平常年力衰老等語含糊入奏在被參者既以所劾之不當轉肆恣肆雖其未參者復以大吏之摸稜愈無忌憚道府則收受苞苴州縣則爭為股削鑽營奔走朋比為奸吏治尙可問乎嗣後各直省督撫務宜正以持身使屬吏皆知畏憚廉隅自飭恪守官箴其有因循疲玩罔知自愛者必當據實指參按律懲辦斷不准避重就輕僅予罷斥顛預了事用副朕勤求治理整頓官方之至意將此通諭知之○諭慶錫奏借庫款銀兩擬按市價折錢歸還等語著交和棧查明是否可行奏明辦理其所稱各商呈繳大錢請作為銅斤交易著一併查覈妥辦至慶錫前次奏請改鑄當十當五銅鐵錢文搭放兵餉當降旨飭令會同地方官試辦並著柏棧體察情形悉心籌議以期兵民兩有裨益有無應行變通之處即行詳細酌覈具奏○庚子勝保等奏連日進攻賊死守堅城勢難得手惟俟地道開成出其不意方有把握得旨並無確實把握實深憤悶○托明阿等奏攻毀虹橋賊壘並設法攻取瓜州得旨此次獲勝尙屬得手惟逆情詭譎難保無潰而復聚總須慎重堵剿杜賊外援以期克復瓜州○辛丑諭軍機大臣等前因劉玉豹賊紆青所帶兵勇連奪大小關直抵桐城該處為安慶慮舒往來要路我軍一經孤入恐有挫失會諭令和春等飭秦定三分兵進紮關隘為賊紆青等應接茲聞袁甲三等奏十一月十三日以後連日轉戰情形先獲勝仗後因安慶潛山兩處接賊壘舒城內之賊復分門出擾兵勇三面受敵以致賊紆青力竭身殉劉玉豹退駐六安垂得之城未能收復固屬可惜而軍威既挫壘舒以南道路復梗於皖省大局甚有關繫和春等為慮郡之賊所牽掣日久未能攻克復不能派兵援應袁甲三坐守臨淮一籌莫展

盧張聲名爲兼顧大局實則畏葸自保思之實深痛恨與和春等厥咎維均相城北達舒城南距安慶東西接壤潛山廬江均屬不遠和春等大營兵勇較多著趕緊抽撥前往策應以贖前愆若不肯踰越廬舒一步致令賊氛逼近豫境或由他處北竄性和春福濟袁甲二是問袁甲三扼守臨淮一帶豈不可就近兼顧六安該處本有知州茅念劬糾集鄉團著飭劉玉豹重整聲威再進取張維翰見在歸德辦理剿匪事宜其前調河南防兵幫同玉防守正陽六安等處已據英桂奏統歸牛鑑管帶著袁甲三飛札提催毋任遲誤總之大軍爲賊牽掣若更旁竄蔓延該提督等自問當得何罪爾等亦須統籌全局勿但專顧一隅也將此由六百里加緊各諭令知之○諭本日據袁甲三等奏攻剿桐城逆匪賊紆青力竭殉難劉玉豹退駐六安係因安慶潛山等處賊匪分股往援是潛太一路賊已無多而安慶之賊分往桐城似有可乘之機見在會國藩等水陸各軍相距尚遠著楊需督帶兵勇相機前進直搗安慶冀可斷賊援應克復城池該督務當妥計速籌趨程前進不可稍存畛域之見致失機宜將此由六百里加緊諭令知之○諭前據英桂奏派令牛鑑帶兵赴皖並張維翰接辦歸德防剿尙爲得力本日據袁甲三等奏官兵攻剿桐城逆匪轉戰數日以賊黨屬至致有挫失皖豫交界地方皆宜嚴加防範其與六安交界處所難保不乘機窺伺總兵邱聯恩駐兵固始原以接應六安即可飭令該員帶兵進剿或另行酌撥官兵前往截擊以勦爲堵至歸德一路尤關緊要張維翰帶兵駐紮該處剿辦搶匪是否已就肅清見在皖省情形緊急著即嚴飭該員確探前路消息相機進剿力遏賊匪北竄之路並著牛鑑等帶兵迅速赴皖合力進攻所有輝縣抗糧一案著英桂飭令該地方官妥爲辦理該撫務當即日帶兵出省扼要防堵毋稍延誤將此由六百里加緊諭令知之○贈安徽桐城陣亡四品頂帶舉人臧紆青三品銜子祭葬世職○王寅諭軍機大臣等昨因袁甲三奏安慶潛山賊匪分往桐城諭令楊需乘機前進直搗安慶賊巢既可牽制逆賊北竄並可爲會國藩等前路聲援此等機會萬不可失本日據楊需奏即日進駐廣濟布置妥協至會國藩水師營面商等語自係尙未接奉疊次飭令該督赴皖會剿諭旨此時溥郡江面據會國藩等奏業已肅清塔齊布由小池口渡江紮營於九江東門外水師前隊亦堵扼湖口該督復派王國才帶兵四千馳赴黃梅由會國藩等調遣胡林翼帶兵二千由瑞昌至南昌以拊九江之背大兵雲集不難克復九江郡城惟安慶至桐城一帶賊匪任意往來毫無堵截和春等既未能分兵截剿劉玉豹之兵又退駐六安此時北岸情形頗爲緊要所有九江湖口之賊即責成會國藩塔齊布等剿辦該督務當慎遵疊次諭旨迅速前進力破安慶等處賊巢並隨時知照和春福濟秦定三等合力兜擊以期肅清皖境並著該督飭令胡林翼等嚴防潯江賊匪上竄楚境以杜紛擾將此由六百里加緊諭令知之○諭見在會國藩已駐軍九江城外與塔齊布會合扼守湖口內外要隘又據楊需奏賊中兇悍頭目皆在安徽江西等處長髮老賊亦多上竄江甯等城勢必望虛請飭乘機攻剿等語所奏不爲無見該逆死黨半在楚皖今既疊受懲創卽金陵等處賊匪亦必聞風破膽若托明阿向榮等能將金陵鎮江等城攻破並盡殲瓜州逆匪卽上游竄匪必思還救楚師從而壓之自成建瓴破竹之勢向榮前奏金陵賊黨仍踞上方橋雖經兵勇

襲破木柵未聞續獲勝仗余萬清在鎮江僅能攻毀該逆礮臺終未斷其往來之路托明阿等攻剿瓜州亦未得手日復一日伊於
 胡底著該大臣等嚴飭水師攻毀賊匪鐵練埽除江上賊營水陸並進明攻暗襲將金陵鎮江瓜州等處次第克復如能先復一城
 則賊匪已覺喪膽而曾國藩等督兵東下勦辦更易為力托明阿等與向榮見已聲勢聯絡當不至互相觀望重負委任也將此由
 六百里加緊各諭令知之○僧格林沁等奏連鎮賊匪於十一月二十四日被勦後益形窮蹙自二十九日至十二月初四等日時
 時出巢撲擾均被官兵隨時擊退斃賊多寡不等誤踏地雷轟斃者亦屬不少近日陸續投誠者其計二百餘名初二初四等日
 派員帶領六品頂帶施紹恆並投誠人進濠誘賊調撥隊伍以備截殺施紹恆等直至賊壘叫罵該逆即結隊出巢施紹恆等退至
 寬敞處開槍迎擊投誠之人無不奮勇刀矛並進斃賊數十餘名大股逆匪復出巢蟻擁而來施紹恆等一字排列擊槍以待時逆
 匪偽檢點黃姓突出陣前礮臺官兵即對準開放大礮當將該逆擊斃賊眾散退回巢查偽檢點黃姓最為狡悍此次破礮轟斃實
 屬大快人心林逆失此一人益形喪膽見在惟有兩廣人及沿途裹脅盜犯共有千餘名與林逆詳結成死黨牢不可破其兩湖等
 處之人屢次奔撲傷亡過多又因施紹恆等投出得有頂帶續有投出之人亦皆溫飽是以心存觀望乘間俱要投出林逆亦深知
 人心不固恐生他變遇有投出之人被該逆擊回不但不加殺害且自責無能以致眾人受困給予銀兩仍令投出該逆當此萬分
 窮蹙之時尚能如此狡狴實非尋常賊犯可比臣等業將林逆詭詐情形傳知各營官兵不得因賊勢已窮稍涉大意臣等一面激
 勸各營文武趕緊籌畫一有可乘之機無分晝夜督兵進攻庶期一鼓蕩平以贖曠日持久之咎其駕馭投誠賊匪亦當格外留心
 勿墮奸計見除施紹恆等雷營隨時進隊外其甫經投出各犯擬札文附近連鎮之景州吳橋交河德州等處防堵各營分營管束
 以免疏虞報聞○癸卯諭內閣前因黃宗漢摺報遲延於地方緊要事件多未陳奏降旨將該督先行議處降為二品頂帶茲據該
 督奏稱奏報入稽自請嚴加譴責並另摺聲稱海塘衝塌未能豫防學政丁憂臬司出缺未及馳報請嚴加議處等語海塘決口關
 繫民生雖經該督設法搶護堵築平穩究屬未能先事豫防至該省摺報稽延已久該督既已病痊即應趕緊入奏乃自上月具文
 咨報軍機處後又復遲至一月有餘亦屬咎有應得姑念該督在浙平日辦事本屬認真此次奏報雖遲於地方公事尚無貽誤業
 經降為二品頂帶以示薄懲所有自請交部嚴議之處著加恩改為議處○諭黃宗漢奏浙省各屬成災大概情形一摺本年六
 月間嘉興等十一廳縣先後被風被雨金華等十一縣被風被旱至閏七月間仁和等五十餘州縣復疊被風雨以致田禾受傷秋
 收歉薄並因山水暴漲洪潮漫溢致有衝塌房舍淹斃人口之處雖經黃宗漢率屬勸捐量為撫卹惟低窪地畝能否即時澆復被
 災黎庶恐致流離失所朕軫念民依實深憫惻著何桂清迅速派員徧行履勘即將成災地畝應行分別蠲緩之處奏明請旨候朕
 施恩○諭邵燦奏請飭催海船裝運漕糧等語見在江浙兩省新漕均由劉河海口起運北上所有載運船隻亟應寬為雇備以免
 貽誤著盛京將軍直隸總督山東巡撫迅飭所屬將沿海各口停泊之上海甯波沙船裝船並東衛各項船隻飭令剋日駕赴劉河

海口以便收載新漕及早開洋北運儻該商船等居奇勒捐或中道逗畱即著查照舊章懲辦○新授四川總督黃宗漢奏報謝恩得旨汝非不能振作者不料汝此次有意耽延稽壓奏牘雖降頂帶示懲朕尙望汝痛加悔改若抵川後故態復作是汝無福不能仰副委任也○調福建兵一千名赴廣東剿賊○准浙江台處等幫緩交賠欠耗米○甲辰諭內閣前據御史伍輔祥奏參四川道員知縣黃綠貪鄙各款當交載齡等確查參奏茲據查明建昌道俞文詔需索陋規得受贓賄雖無實據惟於首府任內時常演戲譏會又爲總督裕瑞所信任遇有酌委等事不免與議以致聲名狼藉宜責縣徐繼鏞與俞文詔交結甚密歷調大缺不協公論萬全縣知縣萬年清隨同俞文詔辦理鹽務違請調濟繁要署理德陽縣事業經撤任該二員性情卑鄙難膺民社俞文詔徐繼鏞業經革職無庸另議萬年清著卽革職○乙巳諭軍機大臣等吳振棻奏密陳趙萬春畏葸遷延情形並請撤回滇黔調出征兵各一摺該署督因近日兩湖賊匪肅清欲將頻年奉調出征未經歸伍之兵丁一千數百名先行撤回自係爲防剿起見見在江皖等處剿賊正當喫緊此項征兵無論勢難遽撤回而跋涉途遠耽延時日亦有緩不濟急之勢本日據樂斌奏川省官兵攻剿黔匪疊獲勝仗署臬司曹澍鍾總兵阜陞擬由石壕等處分三路進兵爲夾攻桐梓克復仁懷之計見又嚴飭萬福迅速前進加以滇黔兩省前後所調兵數遵義一帶足敷剿辦惟安南普安雖均收復興義賊氛未退平彝羅平各要隘該署督務當勸集鄉練擇地設防毋令匪蹤闖入滇境王國才見經楊需派令帶兵取道黃梅馳赴曾國藩等軍營協同剿賊此時亦未能卽令回滇吳振棻兼署總督統轄兩省著另選得力將領帶兵出勦毋稍貽誤將此由五百里諭令知之○諭前因剿辦仁懷桐梓賊匪諭令樂斌卽飭萬福等將綦江合江等處防兵統帶前進合力夾攻茲據吳振棻奏提督趙萬春畏葸遷延見在雷臺山雖小有斬獲並未得手等語提督統轄全軍見當剿賊喫緊之時若臨事畏縮何以使將士爭先用命况該撫等所謂官兵爲數不少各省籌餉亦數逾鉅萬若該提督一味退縮糜餉老師咎將誰執著蔣蔚遠卽嚴查該提督見在帶兵剿賊布置能否周妥如有畏縮情弊卽著據實嚴參不准稍有徇隱仍一面飛催萬福統帶川兵至黔合剿其前調湖南官兵並著一體飛催毋稍延誤將此由六百里諭令知之○丙午諭內閣恭親王奕訢等奏遵旨會議載齡等奏請查辦州縣侵吞捐項一摺各直省勸諭捐輸原因軍餉浩繁藉資民力上年曾諭令各督撫查有墨吏奸胥藉端擾累苛派侵吞者嚴參懲辦乃近來山西陝西四川等省不肖州縣竟敢侵吞冒蝕累萬盈千甚至小民捐輸銀錢並不詳報輒作地方公舉以爲開銷地步各該督撫或墮於見聞或憚於舉發不肖官吏愈肆貪婪而小民急公好義之心亦無由上達蓋國病民深堪痛恨自應嚴定章程以昭嚴實著照所擬嗣後各直省勸諭捐輸仍責成幫辦團練之神書會同地方官妥爲勸導各該督撫隨時稽查如有買屬倡勒等弊卽親提審辦有犯必懲所捐銀兩按照戶部例定期造冊專案報部並照廣東見辦章程分別奏報其有應加中額學額之處並著該督撫迅速奏請恩施應領執照著該部速行發給俾各捐生等早邀甄敘庶幾踴躍輸將並可嚴杜侵吞之弊經此次部定章程之後如地方官有動用捐款藉詞修廟及地方公事開銷

者照賊私例治罪仍責令照數賠繳各督撫遇有侵吞指項之員自行查明參奏即免其議處儻或扶同徇隱別經發覺其應得處分即以私罪論決不寬貸各該督撫等即將此旨刊刻謄黃徧行曉諭俾比戶皆知以杜侵漁而資激勸○諭景壽基溥奏值班疏忽致令不知姓名人犯溷入宮禁自請從重治罪一摺昨日申刻據總管太監等奏景壽基溥外間不知姓名人犯一名當有旨文巡防大臣審訊供係正白旗蒙古馬甲富升宮內重地門禁森嚴豈容閒雜人等溷入景壽基溥昨日在景運門隆宗門值班未能督率該班之章京護軍等認真稽察所司何事可見平時值班漫不經心形同讐贖實非尋常疏忽可比景壽著先行革去御前侍衛散秩大臣正藍旗蒙古副都統基溥著先行革去刑部右侍郎總管內務府大臣正藍旗護軍統領正白旗滿洲副都統景壽基溥一切差使並著全行革退俟定案時再降諭旨○勝保奏高唐賊情窮蹙足可就此殄滅見擬日內挑選兵勇乘夜進攻得旨仍是希圖搪塞可惡之至較量連鎮高唐賊踞先後是自掩其失尤屬可笑○丁未諭內閣仁壽奏參失察溷入宮禁人犯之值班章京侍衛並自請嚴議議處一摺該犯富升擅入宮禁據供係由內右門潛行溷入該章京侍衛等未能及時查拏實非尋常疏忽可比所有是日內右門值班之正黃旗章京文恆侍衛額爾格春文瑞彥凌文善德恆英祥額勒和訥承忠孫清剛穆玉成均著先行革職乾清門內左門值班之鑲黃旗章京惠增侍衛恩綬奕楓溥莊溥蘭德昂篤文瑞廣福赫克東阿常林正白旗章京壽善侍衛訥蘇肯特保祥玉桂林伊鏗額和義海全慶祥張應登曾英均著先行交部議處惇郡王奕諒怡親王載垣均著先行交部嚴加議處睿親王仁壽鄭親王端華恭親王奕訢德木楚克札布著先行交部議處補進領內侍衛內大臣班之理藩院尙書公奕湘並著先行交部嚴加議處是日進班之貝子載華散秩大臣松岫副都統都爾連阿太僕寺卿八十二著一併交部議處○以團練出力承廣湖南平江縣學額三名○戊申 上諭 天神壇祈雪○諭內閣本日據軍機大臣面奏章京吳台朗於昨日向恭親王奕訢等稟稱章京程恭壽將柏後審辦夥買木植案內達謹等供單私供事鈔錄送與慶錫家人當將該員等傳齊質問委無確據提訊該班供事僉稱程恭壽並未令伊等另行鈔錄再三詰究吳台朗亦自認懷疑願甘息事復據程恭壽呈出自行鈔錄載齡等所奏沈祖望遺筆一紙而於此次鈔錄供單堅不承認吳台朗意存攻訐迨查無確據輒敢起滅自由謬妄已極程恭壽於此案犯供雖查無私鈔實據其呈出之件亦係查辦要案豈應鈔錄傳播其平日不知慎密已屬可見光祿寺少卿程恭壽禮部郎中吳台朗均著即行革職○諭王懿德等奏琉球國貢使顧懇仍准入都一摺前以用兵省分尙未肅清諭令琉球使臣無庸繞道來京以示體恤茲據王懿德等奏據該國貢使等稟稱此次除例進貢物外尙有謝恩及恭賀表章仍祈准予入都籍達下忱等語該貢使等殷殷懇懇其意實出至誠若必令其毋庸來京非所以慰遠人之嚮慕著王懿德等俟來歲道路疏通即派員護送該貢使等赴京俾輸忱悃○己酉會國藩塔齊布奏逆黨被勒後羅大綱奔踞湖口與九江踞賊遙相犄角牽掣我軍其小池口敗賊由彭澤渡江繞道赴潯增壘濠濠爲死守計湖口之賊自搶得江西戰船後連檣棧閣截內河東岸爲湖口縣城依踞獅子山連紮數營西岸爲梅

家洲連築二營木城礮臺緊相依護水師左營彭玉麟嚮導營孫昌國等直紮湖口以內前營李孟羣後營蕭捷三中營秦國祿等各營戰船分扼由湖出江之口扁擔峽梅家洲並北岸之八里江口一帶層層關鎖如犬牙之交錯自十五接仗後六十七十八等日水師屢捷焚毀賊營數座二十日夜二更後風順水流忽見上游火船分十餘起縱火下放礮船隨之兩岸出隊千餘人呼聲鼎沸兼放火箭火毬時彭玉麟孫昌國兩營之泊內河者早經準備屹然不動李孟羣等各駕三板迎擊秦國祿等繼進撥開火路將已燃之船用篙撐入中流向空溜下我戰船反迎火光而上向岸賊開礮放箭之處併力攢擊斃賊無數且攻且追至木簞之側忽又擁出火船數起火藥不時轟發我軍疾趨而進燒賊礮船十五六號賊黨紛紛墮水隨火船同付東流當賊放火燒舟時天陰月黑三更後月明如晝該逆油葦之船與我軍焚賊之船火光照耀秋毫畢見賊黨計第四更收隊我軍一無所傷陸路官軍自與水軍會於小池口十八日臣塔齊布從上游琵琶亭渡江次日移營南門外適胡林翼帶勇二千人馳至分紮要隘二十一日羅澤南從下游水港渡江以期上下夾擊賊趁我軍半渡突出數千人分路來撲羅澤南督同李續賓蔣益澧等分投迎剿時賊眾我軍官軍殊死戰殲其前鋒賊遂敗退伏賊繼進移時又敗羅澤南從寶塔灣進追沿途趕殺百餘名偏溺老鸛塘內者約二百餘名追奔十里之遙其接渡之戰船亦遂泝江而上向岸轟礮斃賊甚多軍功蔣昌梧係督臣楊霽從漢川招撫者也自帶精勇百人在羅澤南隊前四馬衝突追賊尤奮焚毀城外賊營一座至九華門外賊營一座尤為堅固各勇大呼撲入拋擲火彈火毬斃賊無算逆黨奔竄聲若潰隄詎該逆暗埋地雷於營內延燒所及烈燄轟騰我軍之撲營者猝被燒傷十餘人敗賊之奔入北門者城內賊目持刀督截賊黨衝出各勇見我軍前隊被燒而賊眾回頭來撲遂相率退奔羅澤南勒馬小駐揮令在後者無許續追在前者無許再退且駐且戰回至岳師門外羅澤南右臂及手指再受石傷力揮諸勇衝進殲賊十數名賊眾盡靡乃從容收隊繫營白水港二十七日水師各營會合出隊舟抵湖口城邊見該逆於城下沙洲密排巨木橫繫篋纜數道聯絡於對岸賊營之下戰船數十隻排列纜邊開礮抵禦子如雨密各三板回舵收泊示之以弱別遣數舟衝入賊隊誘令出巢該逆開船迎敵各營遂揚帆疾進攢礮聚攻前三板衝過賊陣之前砍斷巨纜乘勢轟擊斃賊不少該逆力不能支紛紛斃水各船追逼直抵南岸洲尾轟斃岸賊尤多賊遂棄營內奔惜陸兵未到未踏其營時上游忽有賊船救應依附營牆之下木簞之旁槍礮更密我軍從煙燄之中搶入迎擊斃賊約百餘名燒其賊船二隻賊始全數敗回傍晚收隊自此賊舟不敢拒敵夜夜以陸賊千餘大呼驚營我軍徹夜戒嚴不得安枕伏查官軍自大破田鎮之後私擬九江一郡指日可破不料賊數日增尙能負固死守其堅悍兇頑實出意料之外連日陸軍攻城傷亡甚眾因攻其未備擬即先期湖口孤塘之賊翦其羽翼水軍在湖口與賊相持李孟羣之意欲令賊船放出大江下游免其內竄江西分我兵力彭玉麟之意以為賊奪江西礮船縱之出江其禍愈烈必欲嚴扼此關聚而殲諸鄱湖之內俟陸軍到時再行相機辦理此次水陸兵勇冒險深入奮不顧身顛懇 天恩由 等擇尤保敘以固士氣千總會獻成把總周福友外委羅嘉典追賊過猛

力戰捐軀深堪惻憫應請飭部從優議卹 上諭軍機大臣等我軍自肅清潯江進扼湖口以後滿擬九江郡城乘勝可克乃連日焚毀賊船踏破賊壘而該逆死黨仍負固拒守殊屬兇悍雖此股逆匪多有由楚敗竄之老賊盤踞其中亦由江西兵力軟弱未能兩路夾攻以致驟難克復塔齊布雖已渡江與會國藩會合紮營城外胡林翼之勇亦已分布要隘而岸邊之逆船既堅匿不出城中之逆眾亦設備甚嚴見在李孟羣欲放出賊船免分兵力彭玉麟欲嚴扼關隘聚而殲旃惟陸軍尚未到齊攻具亦未齊備賊情變幻靡常著會國藩塔齊布相機籌畫不可稍有孟浪致誤事機吳城賊未擊退該處距省甚近陳啟邁所派之憚光宸趙如勝等均係督勦之員何以自前月奏報籌辦會勦以後未據該撫續行人奏豈賊竄江境該臬司等竟敢置之度外專恃會國藩等分兵應接耶著陳啟邁一面嚴密設防一面飭令憚光宸等迅速將吳城賊匪擊退以便與會國藩等軍併圖攻剿會國藩等即先期湖口孤塘之賊翦其羽翼仍設法攻城以期收復此次冒險深入之員弁兵勇等准會國藩塔齊布擇尤保奏所有陣亡之藍翎千總會獻成藍翎把總周福友藍翎外委羅嘉典均著交部從優議卹將此由六百里加緊各諭令知之○諭向榮等奏軍餉不支請飭江西等省迅速籌解一摺江甯鎮江兩處軍餉江西協撥之款欠解者四十餘萬江蘇雖陸續協濟為數無多本年尚有二箇月未放支絀萬分見當攻剿喫緊豈可稍使缺乏著陳啟邁迅將本年三月以後欠解之款設法即日籌解毋再遲延至江蘇辦上海賊匪及供支鎮江水陸各營墊給紅單船餉在在均關緊要並著怡良吉爾杭阿王懿德呂佺孫於閩省海關及江蘇許墅關稅銀內每月各撥二萬兩按期委員解赴江南大營以濟要需該督撫等務當悉心妥籌源源接濟毋得藉詞推諉致誤軍儲將此由六百里各諭令知之○諭向榮等奏大營軍火緊急請飭提解等語見在江甯大營水陸進剿正當萬分喫緊之際紅單挖督各船均係大礮需藥尤多若不及早寬為籌備致軍火不能接濟於攻剿事宜關繫甚鉅著山西陝西河南各巡撫各提撥火藥三萬斤配足鉛子火繩趕緊派委委員解赴江甯軍營並將起解日期先行具奏毋稍遲誤將此由六百里加緊各諭令知之○庚戌諭內閣前因貴州匪徒滋事攻陷桐梓仁懷擾及遵義其與義府屬亦有賊匪蠢動諭令該撫蔣霽遠提督趙萬春督兵赴遵義進剿並諭該巡撫等嚴飭將弁趕緊將興義股匪全數殄除前據奏報收復普安南兩處城池興義尚未肅清本日揀樂斌奏稱提督萬福由合江進剿黔匪進至大壩河賊首巢穴焚其住屋殲斃五百餘名生擒三十五名奪獲槍礮旗幟不計其數又於貓鼻巖嚴經署守備劉華等追殺四十餘名生擒二十七名轟死三四百人遂即圍攻梁村礮火轟斃及砍斃賊匪七八百名並砍死偽將軍會六等三名乘勝直抵賊巢將火藥硝磺米石盡數焚燒參將高克謙署守備王偉庭等復在大雷坡三峰山大坪山一帶殲斃賊匪多名罕獲賊首夥賊一併正法各等語此股賊匪在貴州北境滋擾蔣霽遠帶兵出省駐守札佐趙萬春馳赴遵義剿辦均未得手以致餘匪竄近四川境者尚復不少該巡撫提督有統轄全省之責當該匪初起之時既未能即時撲滅及帶兵剿捕又不能迅速肅功致令蔓延殊堪痛恨蔣霽遠著革職留任趙萬春著即革職仍留軍營以觀後效見在四川提督萬福已帶兵由蜀赴黔所有貴州

官兵均歸萬福統帶善騎遠會同萬福將遊義一帶賊匪迅速殲除其與義匪徒並著該撫嚴飭帶兵文武起期撲滅毋再遲延致干重罪○辛亥諭內閣前因馬甲富升潤入宮禁營將景運門隆定門值班疏忽之御前侍衛著護軍統領景壽刑部右侍郎護軍統領基溥差使全行革退並俟定案時再降諭旨茲據巡防王大臣等將該犯富升審擬罪名具奏業經照擬處校矣景壽等疏於覺察咎無可辭景壽著再罰額駙俸二年基溥業已革職加恩著無庸議宮禁重地理宜嚴肅曾經疊降諭旨申明門禁乃該班官兵等輒視為具文漫不經心可惡之至經此次嚴懲之後所有內外各門值班及每日進班之王大臣等務宜督率各該章京侍衛及兵丁等嚴密稽察毋許稍有疏懈儻敢仍前玩泄致有閒雜人等濶迹出入必將是日值班大臣官兵等從重懲處不貸○和春等奏報攻剿舒城等處賊匪獲勝情形得旨三城未下日久遷延和春等擁兵攻廬州不能顧及他處自問所辦何事稍有天良亦知愧憤否○福濟奏皖省土匪充斥經陸希湜張家駒於十一月初三日由豫省界溝折回亳州城分赴各處督率兵勇窮搜首先擊獲捻匪王大柱等又獲捻首李灑等八十餘名又在石家壑擊獲屢次抗官之石洪等二十餘名丁家花園等處擊獲丁科信等三十餘名觀音堂擊獲王大申張明善等十餘名立德寺等處擊獲張幅海馬老虎即馬鳴寅等五十餘名白龍王廟等處擊獲鄧寶賢梅月士等三十餘名莊兒集擊獲李霸王即李家青等二十餘名其擄毀賊巢二十餘處查此股捻匪嘯聚靡常官兵急於接捕或潛往他處或濶充練丁一經撤防旋又嘯聚况值湖北敗匪窮極竄逃萬一與豫皖捻匪勾通則辦理益多枝節臣嚴飭陸希湜等迅擊餘黨復飭合定壽鳳各營縣一體兜檢一面通飭團練不准容留匪類貽害養癰並咨英桂袁甲二督飭張維翰張家駒等帶兵會剿務期全數弋獲以免勾結而靖地方報聞又奏年終密考請俟下年補奏得旨如有才能起卓者儘可隨時具奏○命已革江西巡撫張芾往安徽軍營交和春差委○子安徽殉節知州李承恩等祭葬世職○王子諭軍機大臣等本日據王茂蔭奏大江南北捐局過多官私錯雜揚州以下沿江各府州縣設有十餘局苛斂行商過客假公濟私包送違禁貨物甚致聚眾斂錢以錢聚眾普安僻家港等局竟至互圖併吞大肆爭鬪商民無不受害等語雷以誠擬議指釐協濟軍餉原在揚州一帶辦理尙屬妥協何以普安等局竟有收捐未解糧臺之弊著托明阿等確切訪查如有奸徒藉端漁利藐法營私即著飭令該地方官嚴行究辦其在大江以南者並即移咨怡良就近查明如係私設即行嚴禁務期濟餉安民兩無窒礙原摺單著鈔給閱看將此由四百里諭知托明阿陳金綬雷以誠並傳諭文煜知之○諭陳啟邁奏吳城賊匪退竄官軍進紮南康並廣東匪徒攻撲定南龍南勦辦獲勝各摺片此次賊匪竄夜退竄並非大受懲創即官軍追至南康斬獲亦不甚多該撫慮其去而復來欲嚴扼南康防其回竄吳城饒郡之路固爲腹地緊要起見但賊踞九江湖口被我軍水陸堵截豈肯甘心就戮楚省兵勇轉戰已久昨閱會國藩等所奏潯郡城池尙未能即克該撫派往協剿之佈克慎恩齡所帶兵勇不過七百餘人能自成一隊接應楚軍吳錫光既能奮勇出力豈可轉使株守南康不令出湖夾擊著陳啟邁即行體察情形妥籌迎剿一面嚴守省城要隘防賊回竄不得以本省地方專委楚

軍也韶州匪徒竄撲江西邊境雖經攻剿敗竄亦未能拔除淨盡該撫前奏挑選壯勇進駐始興救援韶郡嗣後情形未據續奏葉名琛前奏韶城於八月十四日解圍駱秉章奏則稱十月初開府城又復被圍該撫此次所奏定南龍南勝仗已在十一月初開其爲韶州兵力不能兼顧以致蔓延鄰省已屬無疑該撫前派往始興之勇見在何處務須飭令帶勇各員與廣東兵勇聯絡攻剿不得專防本境其由韶湖入饒州水路及由安徽建德入饒州小路均著一體嚴防毋致顧此失彼另摺奏刁徒藉端訛詐見在出示嚴禁一摺卽著照所議辦理地方刁悍之徒挾仇告訐在平時猶應嚴辦况當人心未定民氣未復之時豈可稍存輕縱卽實在甘心濟匪者亦應由地方官嚴密訪拏何得任其肆意搏噬魚肉良善著該撫嚴飭各屬遇有此等案件自應從嚴懲辦其或挾嫌誣告有意傾陷者亦當從重治罪以儆刁風而蘇民困將此由六百里諭令知之○兵部等衙門奏遵議失察富升擅入宮禁照例分別嚴議議處得旨惇郡王奕誼怕親王載垣均著加恩改爲革職留任仍各罰王俸一年奕湘著加恩改爲革職留任仍罰公俸一年革去內大臣所有此案失察之王大臣等應得處分均不准其抵銷○癸丑諭軍機大臣等何紹基奏敬陳地方情形一摺據稱川省近年吏治廢弛前次錢糧津貼多徵少解者不下二三十州縣該學政衙門卽有控告安縣虧空倉穀一萬五千餘石會理州短解津貼銀四千八百餘兩之多又稱牧令中由科甲出身者不及一半一首府兩首縣均係捐班州縣中文理明通者甚少致詞訟拖延不結考試錄送文童多未通順著名庸劣之玉鈞全順任其戀棧等語各省官員科甲固未必盡賢捐班亦不皆無用原在該上司隨時查察舉劾公明吏治自有起色至於徵解錢糧聽斷詞訟是其專責若如所奏多徵少解者竟有二三十州縣之多甚至積壓案件錄送文童未能通順該省公事廢弛已極若不力求整頓尙復成何事體樂斌見署總督無所用其回護著照所奏情形確查具奏並查明玉鈞全順庸劣實迹據實嚴參無稍徇隱原摺著鈔給閱看將此諭令知之尋奏錢糧徵多解少並未指明何州何縣會理州安縣短解虧空各款均俟查明嚴辦詞訟並未積壓惟安安氏一案係已結復控業經提審覆訊錄送文童已飭各屬嚴別棄取玉鈞等均無實在劣迹報聞○以崇綸廉兆綸俱爲內閣學士崇綸由兩淮鹽運使廉兆由翰林院侍讀學士遷○甲寅諭軍機大臣等勞崇光惠慶奏匪徒竄撲全州經兵勇痛加勦洗一摺此次灌陽恭城游匪經兵勇先後擊敗復糾另股匪徒由興安竄撲全州經廣西湖南兵勇會剿該州境內已一律肅清惟當督飭地方官乘勢將餘匪搜捕淨盡毋令再滋蔓延該省土匪充斥前奏荔浦修仁陽朔永福永甯等處均有匪徒滋擾本日具奏永甯義甯兩處賊匪均經擊退而荔浦等處如何剿辦情形並未敘及大墟土匪已據該撫等奏稱督兵擊敗究竟近省一帶地方能否安謐殊深慮念前有旨令勞崇光出境剿賊惟此時該省各屬匪徒聚散無常必當迅速撲滅首垣重地尤應妥爲鎮撫勞崇光著毋庸出省其梧州與廣東肇慶接壤處所卽著惠慶查看情形緩急帶兵馳往剿辦至本省防剿事宜仍著與該撫隨時知照毋得顧此失彼致令該匪日肆騷張此次全州文武勦力同心將大股賊匪迅速掃蕩湖南兵勇越境會剿亦能不分畛域著勞崇光等擇其尤爲出力者酌量保奏候朕施恩將此由六百里諭令知之○子廣西陣

亡於吳文洲祭葬世職建祠訓導李宜春等祭葬世職○乙卯諭內閣刑部奏請置摺復司員一摺所請殊屬非是該司員文啟等於承審戶部書吏用鈔抵銀一案不能悉心研鞠以致罪名互有出入洵案生疏已可概見業經加恩准予捐復已屬從寬乃該部輒稱該員等熟悉部務並援照道光年間主事瑞珊之案奏請留部試思諸員等如果刑名熟諳何至派審重案含糊定讞且承審錯誤與瑞珊之失防監犯自盡情節迥不相侔尤不應率行援引捐復郎中文啟高士濂員外郎尙阿布並主事翟雲章均著不准雷於刑部仍歸吏部照例銓選刑部堂官著傳旨申飭○諭軍機大臣等英桂奏邊旨馳赴陳郡督防並派員進駐六安一摺皖豫交界防堵據撫所奏三路布置情形尙屬周密惟袁甲三前派滅紆青等進攻桐城原以接應楚師此時劉玉豹雖退守六安一俟添派勁旅仍應迅速進剿英桂見派王庭蘭前往而可撥之兵僅止一二百名並以前派赴皖之兵傷病過多不過數十名可用擬令添募壯勇等語皖省需兵甚急著英桂即飭令王庭蘭速行招募統帶前進不得稍事耽延至豫省各路官兵有無可以分撥交王庭蘭帶往之處仍著英桂通盤籌畫其赴皖兵勇口糧務須源源接濟毋得以庫款竭蹶任令缺乏該撫即督前赴陳州居中調度至歸德等處雖派令張維翰分投駐紮英桂仍當處處兼顧何路有警即往何路策應斷不准株守一隅致滋貽誤輝縣抗糧之案仍嚴飭地方官妥爲辦理將此由五百里諭令知之○予江蘇殉節知縣張志等祭葬世職○丙辰諭內閣朕兄隱志郡王奕緯尙無子嗣著將奕紀之子宗室載中過繼與隱志郡王爲嗣封爲多羅貝勒○丁巳 上御撫辰殿大輦次賜蒙古王貝勒額駙呼圖克圖等宴並賞賚有差○諭內閣吳振械將蔚遠奏官軍擊散新城賊匪並興義府城解圍一摺貴州安南縣賊匪徐令恆等先擾普安縣分防新城縣丞地方復分股撲撲興義府城知府張鏡與護遊擊守備汪光瑞激勵兵勇奮力夾擊斃賊千餘人生擒賊首進剿斃賊百數十名十一月初三日賊撲興義府城知府張鏡與護遊擊守備汪光瑞激勵兵勇奮力夾擊斃賊千餘人生擒賊首僞大王李狗狗僞元帥彭老三鄭福祥及夥匪一百五名其竄往北鄉及坳脚地方賊眾經生員李士英等招集地脚鄉民將首逆徐令恆及要犯王丙熊喜刺斃並斬擒多名二十日張鏡會同金剛保胡霖澍兵練馳赴北鄉分路進攻將該匪等圍至納勒地方奮力轟擊殲斃僞元帥冉秉忠等七名生擒僞元帥將軍汪二生蕭樂和等五名餘匪竄往卡曼寨踞險抗拒胡霖澍帶領敢死壯練數十人密上山巔將火箭火彈燒焚賊寨引動賊設地雷斃賊無數又貞豐州賊於十一月初一日徑撲州城被兵練擊退後復在教廠山負隅抗拒知州蔣時清密飭兵練兜剿斃賊數十人生擒三十餘人其另股賊匪在安南縣屬滋擾蔣時清會營馳往督同鄉練截殺數十名生擒僞將軍徐令言等當即正法此股賊匪徐令恆等膽敢聚眾圍攻郡城該府張鏡督同文武竭力固守於官兵未到之先調練剿擊立解城圍並經生員李士英等將首逆設計殲斃辦理尙爲妥協道銜興義府知府張鏡前因屬縣疏防革職暫留本任著卽開復原官原銜仍責令會同金剛保等將興義府屬巴林一帶另股賊匪及新城貞豐所有餘匪趕緊剿除淨盡以靖地方○戊午諭內閣貴人他他拉氏著封爲麗嬪索綽羅氏著封爲婉嬪○諭袁甲等奏查明知縣收復城池懇恩開復

等語前因土匪竄擾安徽鳳穎一帶當降旨將穎上縣知縣程鈺革職交袁甲三嚴切查明如有臨期逃避等情即以軍法從事茲據奏稱該革員親赴正陽附近地方布置防堵不意賊繞他路遠撲縣城旋即星馳赴援各鄉團練萬人聞風踵至立將縣城收復實無臨期逃避情事收復後復能屢挫賊鋒捍衛地方並查該革員素著循警民情愛戴程鈺著准其開復知縣原官仍留安徽補用○諭軍機大臣等袁甲二等奏派員駐紮英霍相機會合楚師一摺前因攻剿桐城未能得手諭令和春撥兵援應並諭袁甲二兼顧六安原因會國藩等水陸大軍見攻九江若郡城克復赴皖甚速必須厚集兵力既可聯絡聲勢並可杜敢竄之匪乘閒北窺况廬舒各城向未克復宿望大潛等縣均為賊踞江北情形甚屬喫重袁甲三等見派何桂珍進駐英山招集鄉勇為進剿太湖之計劉玉豹等由六安進駐霍山一俟楚師抵皖即歸會國藩調遣自應如此辦理惟該員等所帶兵勇是否足資協剿滅紆青原帶各勇雖經袁甲三挑選能否得力和春等仍當隨時查看就近抽撥兵勇相機策應一面嚴飭該員等實力防剿探明楚師以圖會合夾擊前據英桂奏稱派王庭蘭進駐六安惟所帶兵僅一二百名尚須添募壯勇此項兵勇並著袁甲三飛速催提毋任延宕和春等攻剿廬州寨定三圍攻舒城均係坐擁重兵日久未能克復前已於摺內嚴切批示儻再事遲延恐上游潰匪水陸竄至廬城賊匪勢更鴟張和春等自問當得何罪耶將此由六百里加緊各諭令知之○袁甲三奏永毫捻匪滋擾經張家駒先後捕斬首要多名復訪聞毫境附近之泥臺店觀音堂立德寺白龍王廟等處匪徒窩聚復分途接期續獲王添坤陳作貴等首要各犯百餘名地方漸臻安靜張家駒遵札回營仍於蒙城一路酌留兵勇二百餘人搜捕餘黨並經臣諄飭陸希湜一面會同張維翰無分畛域四面兜拏務使匪徒盡絕根株報聞○庚申諭內閣楊需奏請開復帶兵官員處分等語前任四川建昌鎮總兵福忻綏南協副將雙保前在漢川等處剿賊失利降旨革職候補副都統魁玉候補總兵楊昌泗前在蘄州二道橋地方不能扼截竄匪降旨摘去頂帶茲據奏稱該革員等被參後督兵打仗收復地方均能出力尙知愧奮福忻雙保均著開復原官魁玉楊昌泗均著賞還頂帶○諭楊需奏遵旨訊明提督參案一摺前經王慶雲奏參陝西固原提督桂明在清水鎮行營被賊燒失餉銀坐扣兵糧抵銷並令解餉委員沈恬捏報土匪劫掠當諭令楊需將此案就近提訊茲據訊明委員沈恬解餉到桂明行營被賊乘夜縱火餉銀遺失時值匆忙未能稟報明晰實無桂明捏令報為土匪劫掠之事所失銀兩桂明先後墊賠因兵丁感桂明相待優厚願將應領餉銀按日坐扣糧員閻丕敏等遂將所失之銀照常造冊報銷委無別項情弊惟該提督於失事之時並未即時據實具奏而所失之餉仍照報銷冊式造報究屬彌縫掩飾飾桂明著交部議處兼辦糧臺之平遠協副將閻丕敏山丹營遊擊與貴高如岡辦理支發輒將所失之款作為兵丁已領之款以冀造報符數雖非有心蒙混亦屬不合著一併交部議處委員從九品沈恬管解餉銀尙無失誤亦無誣捏別情著開復原官仍歸陝西照例補用○會國藩塔齊布奏潯城北枕大江東南多山為姑塘入城要路塔齊布率各營扼駐其上該逆亦嚴防東南瀕水之處率將各路乞斷其西門一路築有大營一座木城數丈列礮三層倚龍開河以自固上月二十

六至本月初一等日陸軍分門攻勦不能得手兵勇傷亡甚多參將童添雲夙稱驍勇是役中礮殞命等以窮寇死守我軍攻具未備不若舍堅而攻瑕因商派胡林翼羅澤南等先攻湖口對岸梅家洲賊營而調王國才及參將恆泰等由小池口渡江與南軍合營初五日胡林翼羅澤南等拔營前進王國才移紮塔齊布大營之旁恆泰等分帶兵勇七百人尚在官牌峽江邊逆黨探知突出邀截經恆泰奮力擊退遂移營城之東南與塔齊布等營聯絡初七日逆黨四五百人分投出撲王國才營經王國才等擊退一股而賊來愈眾勢將不支塔齊布整隊往援陣斬百名賊遂奔竄東門入城閉門堅拒其自西城出者另有千餘賊攻撲居隆阿江西營盤塔齊布飛飭副將周鳳山等帶勇往援一律擊退胡林翼羅澤南之軍於初六日已刻行抵盩山距梅家洲八里許梅家洲之尾爲闌湖崙江省內河出口之西岸也僞丞相羅大綱踞焉湖口縣在其東岸僞易王石達開踞焉鄱湖之賊於口內紮大木簕一座東岸厚築土城多安礮位西岸立木城二座高與城等防守甚嚴我盩山之軍駐營甫定派隊前進胡林翼帶勇由洲東入羅澤南帶勇由中路入李續賓張丞賓同蔣益澧等帶勇從洲西入賊眾負固不出憑牆施放槍礮我兵伏地以進逼近壘前去其竹木以水澆其地雷哨長葉楚南等從竹籤木樁中踰溝而前直入賊營以路窄人少葉楚南等俱爲賊戕初七日梅家洲賊七八千人分三路進以攻我營之左腋而大姑塘之賊又以四千餘人撲我盩山大營之背胡林翼羅澤南等分營堵禦賊三百餘名賊乃大潰追奔十餘里沿途殺賊數百名至小湖而止水師之在湖口者聞陸軍一至卽出隊從外江進口攢礮環攻賊陣奮力進擊將其鐵鎖鐵籠立時砍斷哨官劉國斌一礮轟中簕上藥箱巨煙突發響若山頽簕已然燒過半而未燒之一面賊仍開礮不絕我軍分一支鈔出立燒大戰船六隻民船二十餘隻賊之登岸者被李孟羣親軍截殺十餘名羅澤南之陸勇擊殺亦眾且放火助燒簕船水陸相輔是日血戰四時之久燒斃溺斃殲斃之賊四百餘名奪獲大礮十餘位生擒一百二十名內有僞將軍梁國汝等皆係簕上賊目兇悍聚斃全軍爲之一快此次陸軍攻城壘水師攻犄角卡冒險摧堅氣不稍餒守備劉國斌攻期田鎮首先衝開鐵鎖此次焚簕又係首先衝入身受子傷守備孫昌國隨同彭玉麟屢次進攻身先士卒劉國斌孫昌國均請以都司即補並賞換花翎其餘出力將弁兵勇籲懇天恩容等彙案保獎以固士心參將童添雲請飭部照參將陣亡例從優議卹把總葉楚南外委楊玉芳六品軍功黃韻南武生陳烈姜凌浩懇恩分別議卹以昭激勸楊需奏到廣濟後探聞安慶望江諸賊皆聚於宿松分股竄擾黃梅當派參將劉富成等各帶兵勇馳赴黃梅堵剿初三日分路進攻直抵城下縱火焚燒城門城樓賊於東西兩門突出轉戰互有損傷初四初五等日疊次進攻賊閉門不出十一日夜賊匪攻撲劉富成營盤卽督兵迎敵賊復鈔襲後路拋擲火彈焚燒營盤官兵盡力抵禦賊始敗退追逐十餘里劉富成營盤爲賊所燒退至石龍鋪駐紮該參將疏於防範應請摘去頂帶以示懲儆見在所調川兵及鄖陽兵尙未到營兵力甚單以九江得失爲吳楚安危所繫當全力拔之故盡揀精銳四千付王國才並飭胡林翼帶勇二千前往協助乃相持十餘日尙未能下而宿松之賊遂乘虛復竄黃梅安徽已革道員何桂珍經檄飭

由英山進剿太湖並飭羅田縣彭仲芳帶勇援助於初八日會合啟程已抵太湖之野雞河地方必攻克太湖宿松方能與南北兩軍相併以目前情形而論必俟我軍攻克九江察看賊勢寬聚何方再與曾國藩塔齊布等熟商辦理 上諭逆賊占踞九江等處意欲牽掣我師東下經曾國藩等派兵分期疊獲勝仗自不難悉數殲除所有尤為出力之守備劉國斌孫昌國均著以都司即補並賞換花翎其餘出力員弁兵勇著曾國藩等據實保奏陣亡之參將童添雲著照參將陣亡例從優議卹把總葉楚南著照守備例議卹外委楊玉芳六品軍功黃韻南武生陳烈姜凌浩均著照把總例議卹○諭軍機大臣等逆賊以全力抗踞九江湖口而宿松之賊復分股竄擾黃梅牽掣北岸之師若非迅復九江水陸各軍不能會合非盡燬湖口賊船則九江不能即克覽曾國藩等所奏情形雖屢獲勝仗攻克城池尙無把握楊需既未能遠攻安慶而赴援黃梅之劉富成等又復不能得力北弱於南殊為可慮楊需所稱必須九江掃蕩後方得確定行止所見甚是湖口賊船自以不放出口全數聚殲為上策但恐江西力不能支一經內竄又分楚軍之力究應如何勦辦方免後患想曾國藩等已能籌畫萬全楊需見駐廣濟即著會合皖兵先取黃梅進取太湖宿松為節節打通之計湖北本境仍應兼顧不但防賊回竄即接捕土匪安定人心亦關緊要小池口及田家鎮等處要隘有無防兵能否與南岸聯絡尤宜妥籌布置著提督豐紳已准其開缺該員所帶駐紮襄陽之陝兵必須派一安員管帶邱聯恩見在帶兵防堵固始一帶皖豫接壤地方甚形喫緊河南帶兵武職見在乏人未便令該員離省署事該督酌量派員署理可也將此由六百里加緊各諭令知之○諭楊需奏施用水雷需用廣東水勇等語據稱仿製西洋水雷擊賊船筏頗為利器惟楚北水勇技藝不精廣東香山澳門一帶精於水性者見已咨行廣東選募著葉名琛等即照該督原咨速行選募剋日委員管帶赴楚交曾國藩等軍營應用毋得稍有延緩將此由六百里諭令知之○諭奕格奏俄羅斯船隻過境應否放行請旨遵辦等語俄羅斯與別國往來自應由外海行走不能聽其取道內地惟本年五月間該國船隻過境既經放行此時若阻其歸路該國不免藉口又滋釁端著奕格隨時查探如該國前此大經過之船仍由黑龍江等處駛回果於沿途地方不至騷擾即著聽其歸國毋庸攔阻若有續來之船並非前此經過船隻即著妥為開導告以內地江面不能聽外國船隻任意往來此後斷不可再從黑龍江行駛致啟猜嫌總以割切曉諭為要將此諭令知之○辛酉諭內閣和春福濟奏攻剿含山賊匪克復縣城一摺十二月初九日編修李鴻章等督勇進攻守備龔應彪等各帶兵勇分東西兩路迎擊賊勢大潰十二日聞賊在東門築濠各兵勇及吉林馬隊分三路進攻殲斃無算計兩日殺賊六七百人割去首級數十顆奪獲器械無數十四日派勇赴城下設伏知縣孔繼黃密約被脅民人乘夜內應十五日夜攜帶攻具梯繩直至城下李鴻章帶勇潛伏復分打東西各門忽南城絕賊百餘李鴻章令談家寶暗處開槍逆屍紛紛隨落城內火藥忽發延燒民房賊自驚亂兵勇攀登擁進兜殺賊由南門竄出截殺二百餘名孔繼黃合力協剿共斃千餘人生擒十三人隨即正法奪獲旂槍刀矛等各數百件鉛藥硝磺一千餘斤救出脅從難民即將含山縣城收復所有此次出力之員弁兵勇著和春福濟擇尤

保委仲朕施恩知縣孔繼黃外委楊占發隨同剿賊尙知愧奮所有應得失陷城池處分著加恩寬免○壬戌諭內閣樂斌奏川兵
攻期貴州下營等處賊匪續獲勝仗一摺貴州賊匪擾及川黔邊界經樂斌派令官兵踰境攻剿自溫水汛剿洗賊巢獲勝後十一
月二十五日署參將蔣玉龍等兵勇進剿至楊杠臺突有股匪二三千人迎拒被我兵進擊潰散直撲下營賊巢槍礮齊施該匪退
守我兵前後鈔擊盡賊無數當將賊巢焚毀餘匪竄匿都司蕭聲遠等亦在羅漢壩等處接殺賊匪數十名生擒九名二十六日
蔣玉龍等進剿糧米溝賊巢約三四人拒敵我兵施放火器轟斃賊匪數十名生擒四十餘人奪獲旗幟礮械數十件該匪窟匿
巖洞我兵用火藥柴草薰燒復斃二三百名將賊巢焚毀又署外委陳正順等帶同紳團攻期張耳村等處賊匪被斃數十名燒毀
賊房數十間生擒首逆穆紹元子等當即正法川兵踰境剿賊尙屬得手著卽督飭趕緊進攻復桐梓仁懷以免蔓延所有打仗
出力及生擒賊首官紳兵勇著該署督等擇尤彙奏請恩施以昭激勸○諭軍機大臣等托明阿等奏浦口官兵擊賊並焦山艇
師獲勝情形一摺近日瓜州鎮江等處沿江賊巢雖略有殲擒而南北岸匪蹤尙復時來竄撲上下游賊船亦未斷絕往來江面豈
能得手吳全美等不能迅將攔江鐵鍊燒毀致該逆又安列礮位紮成水營爲守護之計若再令占麗洲地浦口一帶堵剿更難武
廣等連次接仗均爲賊礮所阻而攻鍊之水師尙須待風行駛雖經奪獲賊船擊沈賊船不過小勝豈能遽慰朕懷著嚴飭武慶與
吳全美等協同攻期勿再遷延貽誤至托明阿等進攻瓜州僅能拋放火器使賊驚慌究竟或誘令出巢或設法進取並無把握卽
鎮江南北夾攻轟塌賊隄賊樓總未直逼城門擣其巢穴著托明阿等督率陸路兵勇起期攻復瓜州一面飭武慶等實力剿除該
逆水營方爲勝算將此由六百里加緊諭令知之○癸亥諭祭 太廟○僧格林沁等奏本月初十日丑刻連鎮逆匪大股向協領
奎星保營牆奔撲勢極兇猛該協領督飭官兵開放槍礮侍郎瑞麟等派兵協同攻擊各營齊開大礮當將該逆擊退見在投誠人
其二千餘名業將隨同打仗出力者分別獎賞該勇等無不急思立功臣知賊內有湖北人詹啟綸一名人極強悍見已投出臣責
其不遵示早降鞭責一百令其趕緊立功贖罪再結以恩信必能得其死力二十二日臣等派委文武督帶投誠勇目施紹恆等敢
舞投誠各勇分路攻期與慶祺營勇目王有明等搶入木城痛加殄洗卽將賊壘焚毀維時西連鎮賊壘經南宗揚等攻其北面施
紹恆等攻其西面逆匪出巢抵敵該勇等奮勇向前短兵相接斬擒無算割取耳級頭顱奪獲銅礮擡槍鳥槍刀矛旗幟甚多被焚
逆匪不知凡幾林瀛詳在東連鎮潛匿死守未敢救援二十四日賊匪撲營當經我兵擊退是夜大股復向瑞昌營牆奔撲我兵俟
該逆逼近開放大礮副都統綿洵令濠內外義勇鈔出賊後該逆力不能支始行敗退生擒賊匪三名割取首級七顆奪獲長梯八
架刀矛旗幟等件甚多二十六日臣等飭派兵勇兩路進攻並豫傳嚴令若不攻破賊巢不准撤隊臣西凌阿帶領馬隊各處指揮
策應侍郎瑞麟等督帶馬步各隊以壯聲威慶祺營義勇一千餘名進攻東連鎮因該處牆垣堅厚防守極嚴未能攻克員外郎瑞
禧等督帶義勇進攻西連鎮直抵賊壘爭先拖拉樹柵一擁而進一面劈開柵門一面拋擲噴筒火彈登時四面火起義勇趁勢由

北面搬進賊巢該逆猝不及防紛紛倒地焚燒連鎮街衙賊屍枕藉生擒賊匪十餘名奪獲大小黃旗槍礮刀矛等物多件義勇由北而南焚燒賊營三座林楓詳恐河西一帶俱爲兵勇攻破即將河東槍礮運過河西林逆帶領強悍賊二千餘名踞住南面賊營死力抗拒維時已交申刻東北風大作兵勇攻戰六時之久俱已疲乏即撤隊回營見在西連鎮僅贖竈戶陳莊及西面一隅之地雖有死黨亦難久踞一有可乘機會即當搆穴檢渠埽除羣醜鑲黃旗護軍參領松林中槍陣亡深堪憫惻應請照例賜卹以慰忠魂 上諭內閣連鎮賊匪被剿窮蹙時思竄逸僧格林沁等派令各營兵勇分路進攻痛加剿洗賊勢益形窮蹙僧格林沁等務當無分晝夜悉力攻剿以期迅速滅事所有此次陣亡之護軍參領松林著交部照例議卹○諭軍機大臣等僧格林沁等奏焚毀西連鎮賊巢逆匪益形窮蹙一摺覽此次進攻情形尙爲得手西面賊營止存一座想不日即可掃蕩我兵全占河西地面以全力併注河東辦理較易爲力林逆既將東面槍礮移置河西則東連鎮賊巢愈形空虛我兵若能分路齊攻使該逆彼此不能相顧尤爲妥善各營官兵站牆巡濠固爲以逸待勞當此事機順利人心鼓舞之時亟應飭令疊戰環攻速行進擊不可專恃投誠人等之力該大臣等務即督飭帶兵各員乘勝進剿刻日殄除以副朕望將此由六百里加緊諭知僧格林沁並諭西凌阿知之○是月綏徽山西歸化等二廳縣山東滕縣等十縣暨濟甯等二衛浙江海甯等十二州縣三衛仁和等四場電地河南鄭州等四十六州縣江蘇橫浦等六場竈戶新舊額賦展緩直隸安州七州縣本年額賦江蘇海門等六十六廳州縣暨蘇州太倉等八衛新舊正雜額賦直隸河間等二縣本年糧租並賞吳橋等二縣災民一月口糧緩徵江蘇蘇州等五十一廳州縣本年漕糧給江蘇邳州等五州縣並徐州等二衛被水災民口糧有差○是歲朝鮮琉球入貢○會計天下民穀數除江蘇安徽湖南湖北福建廣東廣西等省未經造報外直隸等省通其大小男婦二萬九千八百一十五萬二千五百三名口存倉米穀一千八百一十萬三千五百六十六石一斗八升二合九勺

咸豐五年乙卯春正月乙丑朔向榮奏據各路探報九江府城克復會國藩舟師已抵小孤山得旨若果九江克復會國藩之奏報

咸豐五年乙卯春正月乙丑朔向榮奏據各路探報九江府城克復會國藩舟師已抵小孤山得旨若果九江克復會國藩之奏報在途矣彼時令江南接應籌餉再諭汝知○己巳諭內閣樂斌奏川省官兵克復桐梓縣城一摺四川提督萬福晉帶川兵抵黔即能攻克桐梓剿辦尙屬得力即可乘勝進取仁懷著蔣霽遠萬福晉飭川黔兩省官兵協力攻剿盡殲醜類勿畱餘孽所有在事出力官紳兵勇著樂斌等擇尤保奏候朕施恩○庚午諭軍機大臣等勝保奏攻城數次未下並籌辦地道情形一摺據奏連日督帶兵勇進攻西南兩門直抵城濠該逆一味死拒勢難力攻復在城頭死守誘之不出詳覽各情是我兵攻剿總未得手該大臣等勦辦此股敗竄餘匪累月經時仍屬毫無把握似此貽誤遷延殊堪痛恨至籌辦地道空至一百數十餘丈何以尙未成功且恐該逆知覺疎先防備則此舉又將徒勞無益見在賊糧將盡攜帶火藥欲乘夜竄逃若任其潰圍而出再擾他處則勝保等縱寇殃民厥

罪愈重此時惟當乘其窮蹙激厥弁兵迅將賊匪就地殲除不准令其免脫僞藉口賊守甚嚴但以籌剿情形敷衍入告老師糜餉之罪亦斷難屢邀寬宥也將此由六百里加緊諭知勝保並諭德勒克色楞崇恩知之○諭陳啟邁奏南康湖口九江剿匪獲勝情形一摺此股竄匪自官國藩等進攻潯郡以後盡將賊船偪入湖口該逆下游之路已斷勢必由南康一帶上竄阻我江西協剿之兵兼以牽掣九江軍營後路雖經吳錫光等四戰四勝其奔擾瀟溪之賊亦經擊退姑塘等處船簞並被胡林翼等焚燒殆盡辦理尙屬得手但湖口賊黨尙眾南康未可弛防吳錫光所帶兵勇雖單而楚省派來都司蕭捷三戰船已抵南康城下亟須水陸並集以勦爲防江西所贖小船既難得力務即嚴飭鄧仁瑩趕緊仿照湖南船式剋期添造以助攻剿其都昌通達饒州路徑見已派遊擊馬福壽帶勇往紮是否足資堵禦尙應隨時防範官國藩塔齊布雖屢挫賊鋒而該逆尙於九江門外加築土城空濠注水爲負隅抗拒之計若吳錫光等能一面設防一面沿流剿洗則江西省保障益堅即九江賊勢益孤陳啟邁身任地方卽不得以勦賊委之官國藩等致令該逆往來肆竄官國藩等軍營所需礮位藥鉛亦著設法運送九江並著該撫飭令居隆阿譚光宸等會合楚省兵勇悉力圍攻盡殲羣醜毋再遷延干咎將此由六百里諭令知之○向榮奏 昨聞由楚敗竄之賊竊踞池洲大通一帶其餘蕪湖金柱關及兩梁山嘯聚尤多微甯情形喫重當移檄革員鄧紹良挑選兵勇二千名出紮黃池以遏蕪湖內犯之路嗣據鄧紹良呈稱本月十八日帶勇出紮黃池二十一日卯刻賊眾萬餘分三隊蠢擁前來鄧紹良以賊眾我寡飭各營鎮靜以待並於山溝土坎埋伏槍礮高阜處多設旗幟以作疑兵該逆圍攻台勇當盤守備周萬遠等率勇開槍礮轟擊賊百餘名守備劉嘉祥千總昌達等率兵兩路鈔殺砍斃黃衣賊首二人賊黨約五千餘人鏖戰四時之久經鄧紹良飭令兵勇詐退誘至伏所槍礮齊施該逆紛紛倒地鄧紹良揮兵從樹林內殺出該逆不知我兵多寡始各驚潰回奔我兵從後掩殺追趕二十餘里沿途斃賊四五百人撲河溪斃者無數等情查蕪湖賊眾以甯國兵勇出紮黃池竟敢悉眾衝撲幸我兵踊躍用命以少擊多大獲全勝然上游賊船尙多難保不復圖內犯一面諄飭鄧紹良加意嚴防 仍隨時相機策應並催師船進扼上游以期保衛東南全局奏入報聞○辛未祈穀於上帝○壬申諭內閣蔣霽遠等奏分督兵練連日進攻雷台山匪眾潰逃生擒賊首陳良模等多名各處賊巢概行焚洗遵義府城見已解圍此次川省官兵攻克桐梓滇黔官兵攻破雷台山同在十二月中旬數日之間各路獲勝勦辦尙屬得手見在進剿官兵已有旨均歸萬福統帶卽著該提督迅督三省兵勇克復仁懷生擒首逆以期一律肅清並著蔣霽遠派文武員弁分赴被擾各地方撫輯難民嚴搜餘匪毋得再存玩泄○福建巡撫呂佺孫奏閩省錢局鼓鑄之銅鑄議改鑄鐵錢以充民用下部知之○癸酉享 太廟○甲戌諭內閣前因袁甲三條陳准北鹽務並奏參署運司運判有營私捏詳等弊當有旨令怡良派委司道大員嚴切根究茲據該督奏稱查明運判許敦詩前請暫停懸引係因積鹽不銷起見並無挾私舞弊等情運司郭沛霖亦無挾私捏飾等情西壩存鹽包數及口岸銷價銀數亦查無不符之處惟該運判於袁甲三批駁各條延不稟覆實屬各有應得許敦詩著交部議處

所有淮北開綱徵課及籌補減免懸引事宜著責成怡良認真整頓袁甲二見在帶兵皖省毋庸兼辦鹽務其淮北一帶疏通銷路
著福濟協同怡良實力督銷總期畦務日有起色以實庫儲而裕課餉○戶部謹覆兩江總督怡良等奏本年蘇省起運交倉漕米
以河運錢糧作為海運開銷自應就數運京無庸籌補足額惟查本屆江浙海運漕米合計兩省不及一百二十萬石京倉支放攸
關應令該督撫等按照福建捐米章程辦理捐輸附搭正漕由海運京其所稱剝船食耗等米仍備帶本色作正開銷沙船食米抵
通後如有盈餘應由驗米大臣給價收買均應如所奏辦理從之○以魁聯為湖南按察使由福建江○丙子諭內閣吳振械蔣霽
遠奏官軍收復城池追剿餘匪並將賊首楊金犖獲此次克復仁懷餘黨窮蹙奔潰該撫等即當督飭文武會同提督萬福合力兜
剿務盡根株無畱餘孽所有團首雷昭然等著該撫等查明具奏候朕施恩○諭軍機大臣等陶恩培奏總督營盤失利退回漢口
恐逆蹤回竄武漢請撥援兵來鄂等語楊霽於上年十二月十七日在廣濟發報但言逆匪分擾黃梅並無賊擾廣濟之事何以忽
有此敗實所不解究係皖賊上竄抑或另有股匪突起楊霽所帶兵勇為數不少何至遽爾失利即或小有挫失亦不應一退再退
徑回漢口詳細情形著該督速行馳奏陶恩培所稱恐逆賊水陸上竄雖未必即有此事惟大兵全力專注九江該逆知楚省空虛
北軍輒弱乘間回撲亦不可不防此時皖豫兩省均無兵可撥惟有曾國藩塔齊布之兵可以就近赴援著該侍郎提督迅即確探
賊蹤如果實有此事即飛速分撥官兵如胡林翼王國才所帶兵勇無論何人皆可令其折回迎剿既以保障鄂省且免九江官軍
腹背受敵之患陶恩培既經抵省雖城中兵餉未充亦當力籌策禦萬不可稍涉張皇以致人心愈惑楊霽斷無竟回武昌之理見
在作何行止本日已諭知官文酌撥荊州官兵順流下剿該督務即咨催會合前進以剿為防若武漢稍有疏失恐該督不能當此
重咎也將此由六百里加緊各諭令知之○諭楊霽在廣濟失利兵勇潰散退回漢口鎮已諭令曾國藩塔齊布分兵勦辦矣惟曾
國藩等水陸各軍圍攻九江正當喫緊之際分兵少則不足以敷勦辦若分兵過多恐江西賊匪復肆猖獗且該逆或竟由廣濟上
竄武漢正須迎頭截擊藉資得力荊州地居上游兵力較厚著官文調派精兵迅速沿江直下與曾國藩等分派兵勇會合兜擊毋
稍延緩至官文應否親統官兵前進以壯聲勢如未便遽離荊州即派委得力將弁統帶進剿著就見在情形妥籌辦理並迅速由
驛馳奏將此由六百里加緊諭令知之○諭英桂見駐陳州著即確切偵探楚北情形迅速具奏備武漢果有賊警所有楚豫毗連
各處要隘著該撫妥速布置嚴密防範斷不可稍有疏虞將此由六百里加緊諭令知之○諭和春福濟奏淮北鹽課請仍飭迅速
撥解安徽軍營以濟急需等語准北課銀前經諭令分解江蘇安徽兩省接濟軍需並疊飭怡良等趕緊抽撥先儘安徽此次戶部
所咨原係遵照向例辦理惟見在皖省待餉孔殷若令停解待撥必致遷延時日貽誤要需著怡良楊以增仍遵前旨嚴飭海州分
司趕緊徵收每次解皖餉二萬兩再解揚州軍營一萬兩以符前撥之數毋庸拘泥戶部原奏仍將每次撥解銀數隨時咨報戶部
以憑查覈將此由六百里加緊各諭令知之○諭和春福濟奏請將進駐霍山官兵改赴舒城等語前此袁甲三派撥已革道員何

桂珍進駐英山參將劉玉豹等由六安進駐霍山原爲官團藩等官軍接應見在九江未能即復楚師東下之期尙難豫計舒城逆匪又有欲竄六安之說和春等所籌係爲嚴扼北竄即著照所議派撥候楚師將入皖境應如何酌撥布置再行妥籌具奏該提督等擁兵廬州經年累月動以無兵可撥爲詞以致各路皆爲奉掣奏定三專辦舒城亦逾半載孤城未克轉待添兵似此遷延何時啟事著和春等迅督兵勇剋期收復廬城不准再延時日劉玉豹等所帶兵勇既經改赴舒城即歸奏定三專帶備該逆再有北竄朕惟奏定三是問何桂珍仍紮英山能否進取太湖河南兵勇是否已抵六安均著相機調度毋任株守一隅徒延時日將此由六百里加緊各諭令知之○諭廣福奏躡獲銅鉛各礦設局鼓鑄以濟經費並進呈撥錢一摺烏嚕木齊地方尙未開鑛鼓鑄見經廣福督飭鎮道和祥等於羅布淖爾三箇山等處地方躡獲銅鉛兩礦並以鼓鑄工本無款可籌擬請照熱河章程暫開捐例各等情所籌尙屬周妥著廣福即督同該道州委員等照議實心經理所有捐費各生准其隨時請獎經理局務各員如果始終奮勉並准其酌量保奏一切詳細章程仍著妥議具奏其局名著定爲寶迪錢面清文卽用寶迪字樣將此諭令知之○貨烏嚕木齊各營兵食銀○丁丑諭內閣楊需奏參知縣不赴署任藉詞規避一摺並片奏藩司軀疾未痊亦涉驕矜等語湖北穀城縣知縣陳大煥經楊需委令署理黃陂縣事數月未報到任藩司夏廷樾以該員尙有經手捐輸款項爲詞另行改委該員卽有捐款未收儘可移交後任無庸守候清算實屬藉詞規避陳大煥著革職夏廷樾於此等劣員不加申飭催令赴任轉行改委其爲徇庇同鄉情弊顯然且據該督奏稱該藩司辦事紕繆受人蒙混夏廷樾著交部議處卽著來京聽候部議○以胡林翼爲湖北布政使調文俊爲湖北按察使以馬秀儒爲四川按察使由成都補龍茂道遷○榮浙江山陰會稽二縣塘隄○戊寅諭內閣葉名琛柏貴奏官紳兵勇攻克縣城一摺廣東鶴山縣城上年被匪攻陷署典史馮家學與巡檢羅瀛等會合各堡紳士督帶壯勇分路進攻斃賊七百餘名殺斃偽元帥宋亞宗等二名餘匪逃入墟內復被我軍四面合剿乘夜圍燒該匪四散奔逃統計燒斃擊斃賊匪四千餘名擊斃偽副元帥溫亞得一名維時附城各堡義勇先後到齊合圍攻擊城內紳士亦同時夾攻殺斃賊匪二千餘名卽將縣城收復此次官紳兵勇克復城池均尙奮勇出力著葉名琛等查明分別請獎以示鼓勵○諭軍機大臣等前據僧格林沁等奏焚毀西連鎮賊巢逆勢益形窮蹙朕卽日盼捷音乃旬餘以來未據該大臣等奏報實深懸繫茲據巡防王大臣等所呈探報本月初二日我兵攻破竈戶陳莊賊匪僅踞連鎮河東一處初三日復將賊築木城燒毀逆黨尙有二千餘人我軍大礮已運進套隄並陸續投出之賊亦復不少辦理似屬得手乃初九日攻期連鎮兵勇陣亡二十餘名受傷者四十餘人是該逆天爐之餘尙思抵死抗拒探報情形是否屬實究竟此時如何籌畫攻剿大約何時始能滅事該大臣有無確實把握著僧格林沁迅速詳細具奏以慰廬念將此由五百里諭知僧格林沁並諭西凌阿知之○諭吉爾杭阿奏殲斃逆首克復上海縣城一摺覽奏欣慰逆匪占踞上海經吉爾杭阿督率兵勇克復縣城首逆業已就戮全股盡數殲除在事員弁兵勇洵屬奮勇可嘉著該撫迅速查明保奏其善後事宜亟應妥爲辦理著名惡逆

陳阿林潘小鏡子雖經獲犯供稱鐵器是否確有實據仍應嚴密訪查毋使漏網該處兵勇有由向榮調派者此時自應仍歸金陵大營以資勦辦吉爾杭阿見在幫辦向榮軍務即著統帶前往其浙江兵勇在上海防剿頗為得力應否一併帶往金陵或令歸伍著向榮與吉爾杭阿悉心籌畫酌量辦理其餘兵勇或撤或留並著該撫妥為安置至佛蘭西提督味呢喃首先助順英吉利領事阿利國亦聽憑官兵築牆紮營情形向屬恭順上次佛夷並有陣亡受傷之人此時縣城克復應否酌加獎勵以慰其心著怡良吉爾杭阿妥籌具奏務當斟酌盡善以示懷柔將此由六百里加緊諭令知之○兩江總督怡良江蘇巡撫吉爾杭阿奏克復上海縣城得旨吉爾杭阿督師上海雖遲延於前尚能奮迅於後鼓勇先登實爾將士之力全股殲除俾勿蔓延實吉爾杭阿之偉績也○命江蘇巡撫吉爾杭阿馳往欽差大臣向榮軍營幫辦軍務○以克復上海縣城賞巡撫吉爾杭阿頭品頂帶巴圖魯名號○以撥兵籌餉不分畛域予四川總督前任浙江巡撫黃宗漢優敘○予廣東開平殉難知縣慶樟等祭葬世職○己卯諭軍機大臣等兵部奏江西巡撫陳啟邁咨遞廣東南雄州知州孫福謙請撥兵餉果函據情代奏一摺並將該州原稟鈔錄呈覽廣東韶州賊匪前經南康練勇擊退嗣據陳啟邁奏逆匪於十月初十日復窺韶州當經諭令該撫仍派練勇會同廣東兵勇聯絡攻剿未據將辦理情形覆奏茲聞孫福謙原稟稱賊匪自窺韶州後官兵雖屢次獲勝未能痛剿湖南兵勇復於十一月間接仗失利情形危急省城消息不通請飭江西派勇援救並籌解餉銀藉資支放等情江西九江郡城圍攻未下兵力餉需恐難兼顧惟廣東見在道路梗阻韶州南雄等處待援孔亟能否於南康酌撥練勇並酌濟軍餉之處著陳啟邁妥籌辦理至崑壽駐兵韶州與廣東省城如果繞道不通恐致貽誤著葉名琛設法繞道接濟軍餉並將見在情形詳細具奏將此由五百里各諭令知之○辛巳諭內閣前據奕山等奏酌裁伊犁總兵並請另委兼任一摺當交軍機大臣會同該部議奏茲據著親王奕訢等奏稱該鎮管轄營務訓練操防均關緊要若驟行裁撤即令該處領隊大臣兼管綠營事務深恐勢難兼顧等語伊犁鎮總兵著仍遵舊制毋庸裁撤○諭楊需奏賊由黃梅回竄漢鎮見由德安相機進剿一摺楊需督兵廣濟為楚軍後路致令逆賊回竄失利節節退守實屬調度乖方楊需著即革職並拔去花翎暫留本任仍著收集兵勇相機進剿以贖前愆並著官文曾國藩培齊布迅速撥兵援應毋令蔓延○向榮奏據探報湖安慶之賊屢至金陵乞援此時上方橋賊營已空恐其分赴上游別圖竄擾當經飛檄革任提督鄧紹良妥密籌防就近與高淳之兵聯絡策應並抽撥遊擊楊瑞乾義勇三百名三江協兵一百名馳往黃池協剿令都司劉季三帶壯勇出秣陵關移紮高淳去後一面設法進攻金陵藉以牽綴賊眾無如城高池深仰攻不能得力惟有開挖地道轟塌城垣庶有進攻之路查有東北隅戴脖子一帶濠淺無水可以開挖即密派都司李定太選帶精兵潛夜往辦適於城下掘得暗門一處連夜挖穿至正月初一日始成一穴寬廣約五六尺深約二丈可容火藥五六千斤力足轟城乃於初三日夜開派出各營六成隊伍分作三路交總兵德安明安秦分起統帶埋伏朝陽太平兩門及明陵之內另挑奮勇一千名由副將張國棟傳振邦帶領潛藏戴脖子左右一俟城垣轟開即

各鼓勇登陴。於初四日寅刻親出陣前督催攻剿先令李定邦密帶弁兵二百人各負火藥一包及木石土袋諸物於三更潛赴城根聞城上更鼓甚繁乘此將土木運入填堵未乾之處築砌結實再將火藥逐袋裝入約有四千餘斤將引繩安妥帶出封固洞門時近黎明。卽傳令黏發俄聞霹靂一聲黑煙上薄雲霄城頭人畜震落無數不料外面牆甌雖轟去二丈高下並損壞垛口數處而城身堅厚仍復壁立大隊不能擁進該逆始則驚竄暫退繼復蠢擁堵住矢石交下連開大礮我軍逼近城隅未免兩面受敵當卽退出山坡之左會合伏兵盡力攻擊該逆伏堦拒守愈聚愈多槍礮如雨攻至午時不能得手止得撤回又據鄧紹良呈稱探得蕪湖之賊自十二月二十二日被挫後糾黨欲於二十四日內犯當調遊擊蕭知音帶兵由高清赴援該逆始聞風而止二十九日遊擊楊瑞乾帶勇前來時蕭知音已回兵高清前後聯絡堵擊正月初二日戌刻蕪湖賊首復合上下游匪黨六七千人來犯黃池分三路乘夜大進鄧紹良整隊以待並親巡浙省各勇營盤諭令營帶文武鎮靜堅守一面分派楚兵義勇擇要埋伏賊懈出擊初三日辰巳時分前隊賊匪直撲白勇廣勇二營我勇密開槍礮立見執旗上前之賊紛紛倒斃其後隊仍相率繼進我營屹立靜守俟該逆至槍礮可及之處我兵始開大礮排槍礮之斃賊無算鄧紹良親督銳勇衝出手然高槍擊中大黃旗賊渠落馬繼以刀劈復被楊瑞乾各勇率同台廣二勇分路兜鈔沿途殲斃甚眾前隊撲營之賊無一生還我軍追至密山地方賊之後隊業已逃散始整隊回營是日之戰除截斬淹斃不計外共生擒偽官及賊黨三十九名訊明就地梟示查黃池南通甯國東達廣德相距僅百數十里皆元明初年間遁入浙之路實爲第一要隘今賊勢漸覺不支犯浙之念較前更急幸而仰仗天威屢經大創足以遏賊鋒而固門戶鄧紹良節次布置均合機宜臨陣又能手戮數賊以少勝多其保全甯國廣德之力似可稍贖前愆可否仰懇恩施賞給三品頂帶給還花翎以示鼓勵其餘出力將弁兵勇容。彙請保奏頌復接鄧紹良呈稱韋逆率賊已由蕪湖內竄意欲先犯甯國後走灣址方村並分撥東梁山賊股由薛鎮鈔襲黃池以奔甯國又有僞尙書曹雲龍領賊一股仍由舊路來撲黃池等語查該逆分三路同進無非使我首尾不能兼顧。於無可抽撥之中再撥義勇四百五十餘名令于總楊萬青等帶領趕赴黃池歸併楊瑞乾管帶助剿其東壩高瀆一路已飛咨撫。臣。爾杭阿速抽兵勇馳往會堵甯國如果有警鄧紹良卽可抽兵就近趕援見在疊催師船上剿再據余萬清呈稱疊次督攻鎮城該逆負隅堅拒十二月二十六七八等日分路擊殺皆有斬擒。上諭內閣金陵之賊自我軍將城外上方橋賊營八座焚毀大加勦戮後防守益整正月初四日向榮復督飭兵勇穴城攻剿轟塌城牆二丈及垛數處城頭之賊震落無數我軍槍礮盡力攻擊該逆伏堦死守著向榮相機迅圖克復其黃池地方緊要仍飭鄧紹良嚴防紛竄。堵兼施已革提督鄧紹良督兵臨陣手戮賊渠尙知奮勉著賞給三品頂帶並賞還花翎以示鼓勵其餘出力員弁兵勇准其彙案保奏候朕施恩。諭軍機大臣等前因陶恩培奏楊甯自廣濟行營失利退回漢口當諭令曾國藩塔齊布於胡林翼王國才所帶兵勇中酌量折回迎剿茲據楊甯稱賊由黃梅武穴竄至漢鎮該督見駐德安嚴防北竄等語更堪託異自十二月二十九日起

至本月初七日計期不過一旬何以一退再退全軍挫敗該督復退至德安以趕調兵勇爲詞殊屬不成事體曾國藩等督師九江楊需爲其後路應援見在九江尚未攻克漢口又遭竄擾督勦失利在該督罪無可辭而東下之師腹背受敵思之實堪痛恨所有陝甘官兵及宜昌鎮兵二千餘名見已調赴德安沔陽等處練勇亦經調往楊需斷無株守德安之理著一面遏其北竄一面相機進剿其首先潰敗兵勇並著從嚴懲辦仍須於收集之後認真防範毋生他變武昌省城著責成陶恩培竭力保護毋稍疏虞惟湖北兵力既不足恃賊勢又甚猖獗亟須得力將弁前赴援剿著曾國藩與塔齊布悉心商辦或該提督親自督兵往援或派羅澤南胡林翼李孟羣等酌帶兵勇星馳剿辦總期掃除賊氛使水陸各軍均無後顧之慮方爲妥善諒曾國藩等必能統籌全局妥爲辦理至前命官文派兵會剿本日又諭令迅速撥往著楊需飛催前進以資協剿將此由六百里加緊各諭令知之○諭見在武漢情形萬分喫緊雖經續諭曾國藩等迅即派兵前往截擊仍恐兵力未厚不敷剿辦著官文將所派精兵催令星速啟程刻日馳往會同楊需官兵合力防剿無稍遲誤至該將軍應否親統官兵前進著仍遵前旨就見在情形妥籌辦理並著將官兵啟程日期先行馳奏將此由六百里加緊諭令知之○諭湖北與豫境毗連該逆見駐漢口難保不乘突狂奔肆行竄擾英桂駐紮陳州相距較遠前據奏邱聯恩帶兵控制光商一帶所有楚豫交界各要隘即著責成該總兵嚴密布置確探賊蹤所在相機堵剿不得稍有疏虞將此由六百里加緊諭令知之○諭向榮奏金陵穴城轟勦並黃池地處蕪湖江口之內關緊甯國廣德咽喉該逆因楚師東下圖入自應迅速力攻牽綴賊眾使之應接不暇方可再圖進取而黃池地處蕪湖江口之內關緊甯國廣德咽喉該逆因楚師東下圖擾江浙自必力爭黃池以肆其猖獗惟鄧紹良一軍續經獲勝賊眾尚有欲分三路再來內犯之語該大臣所稱委于總楊萬青等帶勇馳往歸併楊瑞乾管帶助剿並咨吉爾杭阿抽撥得勝兵勇往堵東壩高瀆一路均著照所擬辦理吉爾杭阿攻克上海之後朕卽諭令該撫將向榮前此撥往各兵勇仍歸金陵或併帶江浙出力之兵勇前往勦辦原慮金陵大營兵無可撥而各路防剿皆應妥籌周密著吉爾杭阿飛速統帶兵勇馳赴金陵以資攻剿並著該大臣等知會何桂清即將上海凱撤浙兵移調徽甯一帶分布要隘所贖兵勇仍著該大臣等妥商調遣水師各船自十二月初八日經吳全美李德麟等督帶上勦後日久未能揚帆斬鍊若似此遷延江面逆蹤往來自由勦辦何時始能得手見在東風司令兵船易於上駛著卽嚴飭該鎮將激勵士氣迅督戰船分幫銜尾一律進發務將攔江賊鍊卽日掃除若再遷延著卽從重參辦以爲貽誤者戒至鎮江一城余萬清督兵已久尙無克復消息該大臣所奏連日皆有斬擒不過小勝豈能藉慰朕懷著向榮一面嚴催余萬清趕緊攻剿毋但以籌畫布置等詞敷衍入告一面安探黃池等處賊情及鄧紹良等如何堵剿迅速覆奏將此由六百里加緊各諭令知之○諭袁甲三奏統籌全局宜先克廬州一摺詳覽所奏大意以廬州居江北腹地之中一日不克三城重兵爲所牽掣江北防兵不能遽撤曾國藩等帶兵自南而北不如塔齊布統兵數千由六安一帶繞出廬舒以北先攻廬州以次收復舒桐順趨安慶袁甲三所籌各情自係爲全局起見但於見在情形

究未深悉此時九江尙未克復曾國藩塔齊布水陸兩軍互相援應攻剿正在喫緊而安徽上竄之賊又踞漢口湯需退守德安曾國藩等亟須分兵救援豈能繞出廬州以北此論不過徒慮將來於見在軍情難裨實用至克復廬州原爲皖省軍務第一要著和春等統領眾兵累月經年尙未得手若再遷延師老力疲勦辦更難得力該提督等坐擁重兵豈能屢邀寬宥袁甲三旣知北竄之路處處可通卽當嚴密布置總期於事確有把握方爲不負委任若止知徒託空言爲他人慮而於親辦之事一味鋪張毫無實濟豈能以此爲卸責地步耶其盧舒等處仍著和春福濟督飭各路官兵迅速攻剿毋得再事遷延致干重罪將此由六百里加緊各諭令知之○袁甲三奏宿州爲第一衝途署知州郭世亨卓著循聲上年粵匪由正陽出竄界連該境人心惶懼該員督民丁守禦賊不敢犯查宿州毗連之永亳一帶餘孽時虞蠢動非得一賢能之員勦撫兼施恐難安靖郭世亨前蒙恩以知府升用應請將知州開缺卽以知府補用仍留蒙亳宿永一帶勦辦賊匪於綏靖地方更可得力至宿州本屬要地此時遠易生手恐呼應不靈查補用直隸州知州王啟秀辦理團練推誠布公民皆樂從以之接署宿州知州洵堪勝任得旨著再與和春福濟妥商朕以爲郭世亨旣在宿得力何必多一番周折調署牧令亦非汝應干預○壬午僧格林沁等奏逆匪占踞連鎮以來節經痛勦蠶無算臣因該逆詭狡異常時與各營熟籌妥議計出萬全近來陸續投誠人眾三千餘名臣察其並無異心酌量收錄令於圍隄以內屯紮打仗亦頗得力兵勇合力進攻焚毀賊營數座殺賊多名十二月三十日退出竈戶陳莊初一日西凌阿瑞麟統領各路官兵外耶瑞禧督帶投誠義勇合力環攻三晝夜之久始將西連鎮賊巢全行蕩平立將賊隊浮橋拆毀卽飭該義勇在西連鎮沿河築壘屯紮晝夜攻擊並調撥義勇在竈戶陳莊紮營將大礮運進套隄高築礮臺六座隔河轟擊惟該逆死守巢穴四面密布礮火不容兵勇進前雖被困萬無生路或戰或守仍能從容不迫毫無潰亂情形正月初二日林逆心腹四川人蕭瀛山安徽人鍾有年帶領餘匪水手九十一名並大礮擡槍鳥槍刀矛百餘件出降臣稔知蕭鍾二犯在南省自行投入賊營渡河北犯以來俱係該二犯主謀畫策與林逆同惡相濟並據蕭瀛山供係浙江軍營六品軍功保舉縣丞鍾有年供係文生卽使真心投降亦屬罪不容誅更難保非技窮生詐另施鬼域伎倆當將蕭鍾二犯凌遲處死夥賊九十一名全行正法近日復陸續投出六百餘名臣等因賊勢已窮逆匪自知萬無生路始行投出希圖倖逃斷難寬宥當卽隨時正法至見在賊匪不下二千名結成死黨聚於連鎮一隅築砌木城數重抵死拒守自初三日以後不分晝夜兵勇極力環攻業經數次逼近木城拋擲噴筒火彈將欲攻進賊壘皆被該逆拈拈命抵敵未能攻克木城以外房間焚燒殆盡查逆匪疊被勦擊兼之糧米告匱眾心乖離賊勢萬分窮蹙揆度情形指日必可蕩事上諭軍機大臣等逆匪退出竈戶陳莊西連鎮賊巢已全行蕩平其勢極爲窮蹙惟該逆尙有二千名在東連鎮築砌木城數重爲負隅死守之計正可併力進攻將此股逆匪全數殄除大營兵勇數倍於賊若因該逆礮火難近不思搗穴搶渠逆匪雖糧絕勢窮而狡悍異常恐致他變該大臣等務卽督飭員弁兵勇奮力攻剿斷不可專恃坐困待其自斃仍一面嚴防分竄之路毋令乘間逃逸將此

由六百里加緊諭知僧格林沁並諭西凌阿知之○癸未 上御撫辰殿賜蒙古王等及外藩使臣等食○諭內閣河南學政張之萬奏知縣侵吞捐輸縱丁毆辱文生請飭查辦一摺地方官辦理捐輸宜如何潔已奉公妥爲勸導該員既侵吞捐項勒借銀兩復縱門丁毆辱文生似此藐法營私必應嚴行懲辦以儆官邪汪曜奎著卽革職等因交英桂提同各案人證嚴行審訊按律定擬具奏○諭軍機大臣等張之萬奏請通查積弊及裁汰雜派差錢各摺片所奏均係切中時弊見在豫省抗糧糾眾之案層見疊出回由官吏侵漁以致奸民有所藉口而一切無名雜費積習相沿弊在書差門丁者亦復不少該學政所奏但係大概情形其應如何逐細清釐自應由地方大吏慎選賢員通盤盤算務使州縣不能多取於民庶閭閻之困可蘇而正供不至貽誤地方亦臻安謐著英桂按照該學政所陳揀派公正大員將各州縣一切雜費逐款詳查分別裁革妥議章程具奏該學政原奏尙有未備之處亦著一併詳查列入章程毋得稍有含混其尉氏許州等處從前滋事究係因何起釁嗣後如何酌定章程始得官民相安均著詳晰奏聞至差錢一項原不能盡數裁除而如原摺所指鋪堂桌椅下鄉供給等項則皆不尙庸員私立名目豈能任其肆意踵行著該撫卽行嚴飭屬員各就地方情形一一確查雷所必需去其太甚以期官民兩便並將各屬徵銀買鈔之弊嚴行查辦據實參奏嗣後各該州縣儻再蹈從前積弊必當從嚴懲治毋稍瞻徇另摺奏參侵吞捐項毆辱文生之知縣汪曜奎已有旨革職等因著英桂秉公嚴審按律定擬不得因該員曾調首邑意存回護稍有不實不盡原摺著鈔給閱看將此諭令知之尋奏尉氏許州實因匪徒圖緩錢糧及增添車價起釁並非地方官辦理不善其支應兵差車馬已嚴飭該州縣照例發價雇備不准絲毫濫派汪曜奎在孟縣任內訊無侵吞捐項在祥符縣亦無門丁毆辱情事惟借捐銀兩不催令各捐生開報職名悉子議敘究屬率忽業經革職應毋庸議下部議從之○甲申諭軍機大臣等托明阿等奏逆匪糾黨攻撲儀徵截擊獲勝一摺覽連日接仗情形尙屬出力儀徵逆匪既經全數遁回瓜州亟應嚴密防堵近日克復各處城池往往旋克旋陷總因兵過之後守禦無人處處必須留兵駐守安得如許兵力儀徵逆蹤既退卽著嚴飭該地方文武實力備禦毋任該逆再有竄擾余萬清專辦鎮江不能迅速攻復郡城又不能奮力進剿致逆匪屢次糾夥渡江會合瓜州賊黨四出竄擾該革員所司何事殊爲可恨焦山師船所以不令上剿者原爲橫截下游江面以斷瓜鎮賊援覽該大臣等另片所奏周士法等水師雖小有勝仗並未督帶大船聯絡進攻徒用巡哨快船遇賊追擊以致兩處逆賊往來不能阻截厥咎維均該大臣既經嚴飭進剿儻該鎮等仍前疏懈卽著據實嚴參至上海得勝兵勇前經降旨令將向榮所撥之兵撥回金陵並將浙兵移調徽甯係爲江南軍營兵力較單各處要隘不敷分撥但此項官兵數幾及萬卽酌撥一二千名馳赴江北不至過形短少著向榮吉爾杭阿照托明阿等所請酌量分撥江北江南同辦一事不得稍存畛域致誤事機吳全美等所帶師船日久未能斬鍊上駛屢經降旨嚴催總以風色不順爲詞實屬遷延膽玩現在上竄楚北之匪又復占踞漢口會匪潘等兵阻九江連日尙無奏報若不從正游迎擊而上則蕪湖以上沿江賊船何時始能掃蕩楚師腹背受敵而江南師船從密觀望儻

有疏失各將該著向榮寺再行加緊嚴催務令刻日上駛其浦口歸船仍令擇要堵扼不准互相推諉各圖安逸將此由六百里加緊咨諭令知之○諭王懿德奏浙江樂清縣土匪滋事縣城失守一摺浙江溫州府樂清縣土匪聚眾倡亂將縣城攻破搶劫倉庫縱放獄囚業經王懿德於福建省標官兵酌調五百名派員統帶前往剿辦何桂清諒已接到該鎮道稟報著即酌調浙省官兵速赴樂清會同剿捕迅圖克復該縣密邇府城尤宜分投保護毋稍疏虞致令蔓延樂清縣城內文武各員如何下落併著該督撫確查具奏將此由六百里各諭令知之○以廉兆倫爲工部右侍郎_{由內閣}○以克復江西武甯縣城賞遊擊常海副將銜千總吳金鼐等監餉○乙酉參贊大臣郡王僧格林沁等紅旗捷報生擒逆首林鳳詳 上詣 壽康宮 皇貴太妃前賀喜○僧格林沁等奏自本年正月初三日後賊匪蟻聚東連鎮經官兵更番進剿該逆死力抗拒未能攻克倍深憤急當於十七十八等日出隊伴爲進攻密飭兵勇無須向前至十九日寅刻 西凌阿瑞麟經文岱伊勒東阿珠勒亨達崇阿督帶馬步隊官兵在北面進攻慶祺綿洵待衛穆騰阿營總巴揚阿在後面督帶馬步隊官兵並義勇攻打並令瑞昌玉明雙成薩炳阿帶兵在河西扼截以壯聲勢凡我大小將士兵勇莫不踊躍用命該逆不料倉卒開四面受敵仍然死力抗拒我軍一經逼近先將賊巢木城焚然四面火光燭天槍礮向內轟擊殲斃無數逆首林鳳詳身受重傷夥匪稍卸我軍登時將木城攻破兵刃相接痛加殄剿賊巢內屋宇牆垣被火燒塌壓斃逆匪甚多逆黨見勢已敗紛紛投河突有逆匪拚死撲出木城欲向東面奔逃經明慶都興阿督帶馬隊奮力截殺至已刻將逆賊全數殲除奪獲大小礮十餘尊擡槍烏槍刀矛旗幟五百餘件一面嚴接首逆知該逆空有地窖數處當飭兵勇逐一窮搜方將林鳳詳在極深地洞內擒獲該逆潛藏淤泥黑黯之中外有逆匪偽總制偽檢點偽將軍多名擁護一同拏獲當令投誠之勇詳細辨認實係逆首林鳳詳先是該逆受傷後藏入洞中復又服毒見在擡至大營醫解擬即委派大員護解檻送赴京並令沿途查看情形設法逆奄奄將斃立即就地凌遲以免倖逃顯戮 嚴督官兵搜捕餘匪務期盡絕根株不使一名漏網至此尤爲出力之投誠義勇守備銜勇目施恆恆等先行開列懇恩獎勵 上諭內閣本日據僧格林沁西凌阿奏克復連鎮生擒逆首全股賊匪掃數殲除一摺覽奏欣慰此股逆匪自上年竄踞東西連鎮並占踞附近村莊節經僧格林沁等督率各營將弁痛加剿洗自攻克西連鎮後該逆全數蟻聚東連鎮守巢穴僧格林沁等令投誠義勇分紮西連鎮及甯戶陳莊並將大礮運進隔河轟擊逆首林鳳詳薙去長髮意欲乘隙潰圍逃竄賊勢萬分窮蹙十九日寅刻西凌阿瑞麟經文岱伊勒東阿珠勒亨達崇阿督帶馬步隊官兵在北面進攻慶祺綿洵穆騰阿巴揚阿在後面攻打瑞昌玉明雙成薩炳阿帶兵在河西扼截將士兵勇無不踊躍用命先將賊巢木城焚毀火光燭天斃賊無數林鳳詳身受重傷夥匪卻退我軍攻破木城兵刃相接賊巢內屋宇牆垣被火燒塌壓斃及投河死者不計其數奔逃餘匪殲殄盡獲大小礮十餘尊槍刀旗幟五百餘件林鳳詳於地洞內汙泥中潛藏被我軍搜獲並將偽總制偽檢點偽將軍等一併生擒實足以快人心而伸天討科爾沁郡王僧格林沁經朕受爲參贊大臣督兵剿賊疊著勳勞此次

攻克連鎮生擒首逆調度有方深堪嘉尚著加恩封爲博多勒噶台親王伊子乾清門二等侍衛伯彥訥謨祜著在御前行走察哈爾都統西凌阿贊襄軍務克奏厥功著賞給伊精阿巴圖魯名號並賞輕車都尉世職見在畿輔地方一律肅清著僧格林沁等卽移得勝之師前往高唐督辦軍務迅速克復州城盡殲醜類以副朕望○諭載齡奏發遣新疆官犯捐請改發內地一摺已革湖廣總督程商采以帶兵大員毫無布置以致賊匪連陷城池革職後派辦糧臺又敢藉病告假情節較重是以將該革員發往新疆充當苦差前經張芾代奏捐資助餉懇恩免其發遣降旨不准程商采著卽行起解所有伊子程福均呈請捐資改發內地之處仍不准行○諭軍機大臣等高唐逆匪數不盈千勝保統領大軍勦辦至今尙無把握曩爾孤城不能克復總由該大臣平日調度無方以致各營兵勇不能奮勉圖功連鎮賊匪十倍於高唐僧格林沁謀勇兼資竟能悉數殲擒無一漏網勝保聞之能無自愧見在大兵卽日馳赴高唐若必待僧格林沁到後始圖克復州城尙復何顏對朕著勝保督飭各路兵勇迅卽進攻斷不准再事耽延儻仍前玩泄不思奮勉以贖前愆朕惟有執法從事斷難再邀寬宥將此由六百里加緊諭知勝保並諭德勒克色楞額等知之○諭本日已寄諭僧格林沁命其帶兵馳往高唐督辦軍務矣該城餘匪本屬無多勝保自任欽差大臣以來志驕氣惰將士未能用命以致小醜數百日久稽誅被參各款甚多朕以簡任之人一時未卽懲辦疊降諭旨令其改過自省仍然不知愧懼遷延日久殊堪痛恨著僧格林沁於到高唐後將防剿事務布置妥協卽傳旨將勝保拏問派員押解來京一面訪查勝保劣蹟並貽誤事機各情節詳細奏聞如革職不足蔽辜應從重治罪之處卽著迅速密奏勝保所帶將弁何人出力兵勇何營可用詳加訪問必能知其大略該大臣仍當隨時妥爲駕馭其有素不安分擾害地方者卽著從嚴懲辦以肅軍令將此由六百里加緊密諭知之○諭陶恩培奏賊擾漢鎮漢陽並省城防禦情形一摺前據楊需奏賊匪竄回漢口該督退駐德安當經諭催官文由荊州派兵與楊需調集之兵勇合力殲剿並諭楊需相機前進陶恩培保護省垣曾國藩等撥兵援應茲閱該撫所奏李孟羣自下游帶領礮船四十隻曾國藩亦派礮船八十餘隻均經接續趕到武昌當可無虞惟該逆於漢陽濱江築壘意圖抗拒非水陸各路糾集兵力迅速掃除誠恐復成蔓延之勢楊需旣已控師於前若再株守德安任令賊氛猖獗更復何顏對朕此時亟應重整兵威與官文曾國藩等派往各兵勇協同兜剿以贖前愆陶恩培雖以堅守省城爲要務亦不能將宜昌陝甘各兵徒爲保衛武昌之計置漢口漢陽於不顧礮船雖到而陸路尙須精兵協剿曾國藩齊布圍攻九江若楚北賊黨未除後顧甚有可慮著再於陸軍內酌派赴援惟此股賊匪據陶恩培奏俱係江南老賊而英桂前奏則云曾國藩等水軍於上年歲底在九江兩次失利戰船兵勇損傷甚多以致該逆回竄黃梅廣濟等處由蕪黃直達漢江究係何路賊匪九江近日接仗如何朕心實深懸繫著曾國藩等飛速奏聞以慰殷念楚北賊蹤復然於曾國藩等剿賊機宜大有關繫此時惟有會合各兵迎賊攻剿使曾國藩齊布各軍無腹背受敵之患方爲妥善四川陝西餉銀本日已諭令該督撫趕緊籌解到楚後著楊需陶恩培分濟軍食不得全數留於武昌致各軍有匱缺之慮荊州援兵著楊需等

飛催前往將此由六百里加緊各諭令知之○丙戌諭內閣何桂清奏匪徒滋事縣城失守旋即收復一摺浙江樂清縣虹橋地方匪徒瞿鎮海瞿鎮山糾黨二千餘人闖入縣城滋事當經該撫派撥兵勇分路會剿隨將縣城克復擒斬要犯翟鎮海等四名餘匪殲斃無數地方已就安靖此次匪徒滋擾樂清縣城何桂清派兵剿辦旋即克復所有該撫自請議處之處著加恩寬免在事出力官紳准其酌保溫處道俞樹風於所屬匪黨滋事並不即時親往剿辦毫無布置著該撫查明據實嚴參署知縣康正基及同城員弁下落均著確查具奏○諭軍機大臣等僧格林沁等奏連鎮軍務告成選帶馬步兵勇移營高唐會剿一摺覽奏與朕意適合高唐賊匪數不盈千該大臣見已選帶精銳兵勇八千餘名諒已足敷剿辦見定於二十一日移營高唐辦理更爲迅速可見該大臣實心任事籌畫周詳必能乘此銳氣克復高唐盡肅醜類至官兵分起遣撤均派統兵大員管帶自係爲彈壓兵丁起見但該大臣前往高唐軍營中如需大員管帶兵勇仍可酌量奏調以資差遣總兵薩炳阿見帶兵前赴揚州著卽飭該員迅速前往聽候托明阿調遣將此由六百里加緊諭知僧格林沁並諭西凌阿知之○曾國藩塔齊布奏上年十二月初十日胡林翼羅澤南等力攻梅家洲賊壘殺賊三千餘人該逆遁入堅壘不出水師自初六日攻破賊陣後該逆連夜將大礮鑿沈江心實以沙石僅西岸畱一隘口攔以篋纜初十日陸軍攻壘之時約水師同攻此卡彭玉麟孫昌國蕭捷三等督各船繞壘衝入焚其戰船三十餘號民船三百餘號斃賊約數百名十二日陸軍復攻賊壘終日以礮多壘堅卒不能破水師復衝入卡內燔賊戰舟三十餘號民船約五十號自是賊所奪江西戰舟焚燬略盡僅餘夾洲內十餘船自湖口至姑塘四十里賊船肅清矣營官蕭捷三等欲肅清鄱湖以內遂乘勝追至姑塘以上揚帆內駛日暮不歸詎料該逆窺我小船衝入內河卽出小划二十餘號突出卡外圍我軍快礮大船是夜三更該逆復用小划三四十號攢入老營燒我船隻兩岸賊匪數千火箭噴筒迷離施放呼聲震天我軍以內河百餘小船未歸無以禦之被焚大戰船九號小者數號坐船三十餘號各勇狃於屢勝之餘變起倉卒快礮長龍等船挂帆上駛李孟羣彭玉麟不能禁止次日悉回九江大營臣國藩聞信之下不勝憤懣戰船焚失雖屬無多而百餘輕捷之船二千精銳之卒陷入鄱湖內河業被賊卡隔絕外江所存多笨重船隻運掉不靈實覺無以自立副將楊載福自攻破田鎮後卽在武穴養病因飛調來營十七日力疾往下游進剿行抵潯城十五里之張家洲賊船已分兩路上犯楊載福派哨官張榮貴陳金整等由新河下擊自率各哨由老河下擊澄海營官何敦伍亦由老河隨剿塵戰良久該逆敗退下竄追至老灣其快礮船貼靠北岸陸賊護之不能奪取礮斃賊數十名張榮貴等自新河下者遇賊三板及小划約三十隻我軍九船勝之追至湖口縣繞出老河與楊載福會合兩路凡焚船二十六號奪船五號四更收隊自十二日夜水師失利後賊之兇醜頓長梅家洲之賊夜夜往撲胡林翼羅澤南等營併力堅守得摧兇鋒湖口之賊渡江上犯紮營九江對岸之小池口二十一日臣等派副將周鳳山渡江擊之四更渡畢黎明開仗該逆猝不及防踏破賊營一座殺賊二百餘人江邊一支追出街外隄內一支因搶奪馬匹衣物爲賊所乘先勝後挫被追七八里之遙臣等酌商以水師既

陷於內河陸軍復挫於小池口遂調胡林翼羅澤南二軍由湖口回顧九江二十五日駐紮南岸官牌峽是夜三更潯城與小口兩岸之賊各擡小划數十隻入江乘月黑迷漫攢入我軍船夾內火彈噴筒齊放右營被燒戰船一隻各哨慌亂挂帆上駛臣國藩坐三板船督禦黑夜不許開船江闊船多莫能禁止該逆已用小划數十將臣坐船圍住臣國藩遂飭各戰船與羅澤南陸營緊相保護遣人四出追回上駛之船黎明陸續歸隊復將戰船追擊奪回三隻伏查水師自岳州以來屢獲大捷自至湖口苦戰經月破陣焚船費盡氣力賊舟所存無幾詎意各營長龍三板過於勇鶩衝入內湖竟夜不歸而外江老營兩次為該逆所偷襲實堪憤恨皆臣國藩訓練不素調度無方應請旨將臣國藩嚴加議處又奏水師於十二日焚燒湖口卡內賊船乘勝衝入內河後蕭捷三等及各宮長龍三板百一十餘號挂帆上駛行至大姑塘尚無賊蹤即行宿泊十三日上至平峯見賊船民船其二百餘號突起擊之該逆抵死抗拒我軍先燒其民船賊陣遂亂復焚其戰舟凡焚船二百餘號奪獲三十五號奪敵七十餘位十四日該逆以前夕所搶我軍之船冒為官兵自湖口駛上襲我內河之師輔以小划百餘號時蕭捷三等已聞十二夜楚營被燒之信因約各哨寂靜以待逆船撲近眾礮齊發羣子噴飛該逆立刻敗下紛紛覓水擊沈燒去小划三板共五十餘號追至湖口見該逆搭浮橋二道壘卡一道開鎖牢固勢難衝出收隊回泊大姑塘以上各營官以十三所搶民船恐其累重為賊所乘至是盡數焚之十九日至吳城鎮探悉逆匪由彭澤湖口而來者約有數千人竊踞都昌縣城空濠濶有大小船隻四百餘號二十六日水軍各營官熟商以都昌既無逆船竊踞我軍一出仍復滋擾轉不能一律肅清不如趁此時燒盡因派定三板划船四十餘隻營官蕭捷三孫昌國段瑩圖賀虎臣鄧翼升親督之於二十七日五更開行並熟悉河路之翟秉懋前往指引是夜煙霧迷漫嚴戒各船不准放礮出其不意襲之已刻到都昌縣見逆船排於河面大小數百號該逆向未驚覺各營盪擁而前槍礮齊施火礮火箭並發時值東南風頃刻火光貫日將逆匪輜重船數百號燒毀淨盡擊死賊匪及撲水死者不計其數生擒五十一名即時正法餘匪轟入縣城因無陸兵不敢上岸窮追師還路過雞公湖有小划船三百餘號各營官帶勇下水概行燒盡免為賊有伏查水師自衝入內河口三獲全勝勞動可嘉然冒險衝入與外江水師相隔疏失實甚目下外江苦乏小船即擬趕添民划內河水師飭令決戰衝出兩面會剿以期力破湖口一關上諭曾國藩等奏水陸剿賊情形並內河水師三獲勝仗各一摺此次我軍進剿梅家洲賊卡未能攻入小池口復先勝後挫是陸路尚未得手而水師銳氣過盛由湖口駛至姑塘以上長龍三板各船與外江水師隔絕離四十里之內賊踪肅清但江艦板重小船不能相輔以致逆氛頓熾兩次被賊襲營辦理未為得手曾國藩自出岳州以後均能與塔齊布等協力同心掃除醜類此時偶有小挫尚與大局無損曾國藩自請嚴議之處著加恩寬免惟此時百餘輕捷之船二千精健之卒均在鄱湖內河中阻賊卡雖胡林翼羅澤南二軍業經調回九江亟應趕添民划以便運掉輕靈即蕭捷三等接剿都昌之船亦須設法衝出俾內外會勦力破湖口一關攻期方有把握陳啟邁前次派往協剿之佈克慎恩齡等兵勇本為接應楚軍即懼光宸吳錫光等亦應內防腹

地外籌備勦豈能坐聽董提三等懸軍深入不爲援應之理著陳啟運嚴飭該帶兵官會合攻擊毋令稍有疏失曾國藩塔齊布並須步步爲營層層相顧不得任令兵勇輕率僥事不但外江與內河聲勢必須聯絡即陸軍與水營亦須互相依輔免生他變方爲妥善前據陶恩培奏賊擾漢口漢陽曾國藩已派李孟羣等帶領礮船前往救援未知近日楚北情形究竟如何並著隨時奏聞以慰懸繫將此由六百里加緊各諭令知之○以連鎮軍營出力賞三品台吉瓊布林沁二品頂帶餘升賞有差○予江西陣亡典史潘兆奎等祭葬世職○丁亥諭軍機大臣等勝保奏擬將投誠賊眾假扮連鎮遊匪誘賊出城一鼓可以殲滅等語僧格林沁於二十一日啟程約計日內即可馳抵高唐連鎮蕩平之信賊中當已聞知所有令投誠義勇誘賊出城之計據勝保奏已與僧格林沁嚴密函商但此時情形較異是否可行諒僧格林沁已有定見即著妥善辦理兵不厭詐原不妨用間出奇惟仍須斟酌盡善確有把握方爲計出萬全也原摺著鈔給閱看將此由六百里加緊諭令知之○戊子諭內閣激揚大典允宜覈實內外滿漢諸臣竭盡心力認真辦事者固不乏人口祿保位平庸躁妄者正復不少朕非故爲優容實望其或知悔改大廷風氣疲玩實深茲屆三載考績故特宣朕意以示百僚吏部開單題請朕依次詳酌工部尚書彭瀚章吏部右侍郎穆蔭工部左侍郎杜翰夙夜在公辛勤倍著均著交部議敘禮部右侍郎李道生人甚平庸都察院右副都御史富興阿年力漸衰性非安靜均著原品休致餘著照常供職○諭戶部奏遵議袁甲三奏兵餉減數太多請仍照原奏分別裁減一摺該營兵丁見當攻勦喫緊之際若按舊章籌給口食兵丁未免拮据著照袁甲三所請本省兵每月支鹽菜米折銀二兩四錢九分外省兵每月支鹽菜米折銀二兩七錢九分以示體恤○諭軍機大臣等崇恩奏土匪拒捕戕官見派文武大員帶兵往捕一摺山東金鄉縣匪徒陶三相等在境內藏匿擾害經代理濟甯直隸州候補知縣陳應元於金鄉縣途次就近帶領役勇前往查拿被該匪等拒捕戕害該撫已飭令道員達鑄並參將郝上庠等各帶兵勇迅往勦辦諒不難剋期戡事見在高唐攻賊正當喫緊之際崇恩自當先其所急如達鑄等帶兵足數勦匪即毋庸親自前往仍嚴飭帶兵員弁並鄰近州縣一體兜拏迅將首夥各匪悉數殲除毋使漏網署金鄉縣知縣許際清見在如何下落並此案有無起費別故著該撫一併查明具奏將此由四百里諭令知之○兵部議陝西提督桂明在清水鎮行營被賊燒失餉銀仍造冊報銷議以降二級調用得旨著加恩改爲降四級留任拔去花翎○以杜翻爲禮部右侍郎署吏部左侍郎○己丑諭軍機大臣等吳振械蒞甯遠奏勦辦黔西賊匪州城解圍並將甯遠奏遵查被參情節各一摺此次王成璐白人鵬等沿途進剿疊獲全勝黔西南北兩路股匪勢已窮蹙近城一帶已無賊蹤勦辦向屬得手惟首逆楊鳳王三札巴等尚未就擒大定平遠交界處所猶有餘匪嘯聚亟應乘勝殲除河北大小二關雖已奪回而鴨池沿河各隘固當防其鼠擾亦須痛加勦洗以靖邊隅蔣甯遠所奏桐梓匪徒起釁及賊偏郡城並趙萬春等回守烏江各情尚無畏蕙不前等事趙萬春前已降旨革職見在會同王成璐等統領滇黔各兵隨後進剿力解黔西之圍著蔣甯遠萬福嚴飭該革員務將首夥各要犯悉數擒獲毋使渠魁漏網餘匪脫逃致釀後患若再不知奮勉自效即

著蔣蔚遠等從嚴參辦黔境見已漸就肅清蔣蔚遠自請治罪之處並著加恩寬免該撫務當督率帶兵文武剋期滅事以贖前愆將此由六百里諭令知之○庚寅僧格林沁奏本月二十三日接奉諭旨飭查勝保劣蹟並貽誤事機各節臣接見幫辦軍務德勒克色楞額臣崇恩翼長常亮總兵孔廣順等及辦理糧臺天津道張起鵬詳加請飭均無指摘之事應俟隨時查察儘有別項劣蹟再當據實嚴參惟該大臣既經罕問未便在營已傳旨將勝保罕問飭令崇恩派委知府崇厚參將穆隆阿押解赴京聽候諭旨並將欽差大臣關防封固並神雀寶刀齎送軍機處呈繳該大臣所帶將弁何人出力兵勇何營可用臣素稔所帶川勇桀驁不馴交崇恩設法遣散其餘容俟詳加查訪至高唐賊勢臣周歷城垣雖不甚大而修築未久甚為完固周圍濠溝三道亦均寬至數丈該逆占踞十月之久布置均極嚴密若竟輕易進攻不特該逆圖濠過寬未能直薄城下卽設法填濠逼近該逆憑高擊下我兵徒致損傷仍難克捷且李開芳係百戰之餘狡詐異常數月以來深恃人少糧多負固自守臣悉心籌計必須誘其全股出巢再行痛剿或設法安伏內應使該逆內外受制方可得手總之此股賊匪雖不甚多而地勢可憑逆謀狡黠恐倉卒設計未必入我術中見存之兵疲羸過半似宜訓練蓄銳俟有可乘機會始能迅速蕪事 上諭內閣勝保剿辦高唐逆匪日久無功前經拔去花翎並降旨革職責令督率將弁迅圖克復原冀其感奮立功以贖前愆乃數月以來仍復遲延觀望以致數百餘匪日久稽誅糜餉勞師厥罪甚重前經密諭僧格林沁傳旨將勝保罕問著卽解交刑部按律治罪見在僧格林沁已馳抵高唐著督飭各路兵勇剋日進攻迅將此股餘匪悉數殲擒毋畱遺孽德勒克色楞在勝保軍營幫辦軍務未能迅速蕪功亦難辭咎姑念總統全軍責在勝保從寬暫免置議仍著隨同僧格林沁幫辦軍務以觀後效儘再不知奮勉惟有執法懲治決不寬貸所有高唐軍營領兵大員自德勒克色楞以下均歸僧格林沁節制該大臣其中明紀律速奏膚功以慰朕望○諭駁章奏官軍剿賊獲勝並土匪滋擾均經擊退一摺湖南南路界連兩廣賊黨竄擾土匪復乘機勾結攻撲常甯等處城垣經各路兵勇隨時擊斬屢次獲勝著駁章督飭帶兵員弁迅將甯遠嘉禾兩縣土匪掃數殲除毋畱餘孽○論軍機大臣等僧格林沁奏遵旨密查勝保劣蹟並見籌攻剿情形一摺高唐賊匪負隅固守總因將驕兵惰紀律不嚴以致數百小醜日久嗜誅見在該大臣統領得勝官兵接辦軍務逆匪必已聞風膽落正可乘此聲威一鼓殲擒至申明約束整飭戎行尤爲行軍要務儘各營將弁有不遵調度者卽著從嚴懲辦毋稍姑容德勒克色楞與勝保共辦一事日久無功亦屬咎有應得見既寬其既往仍命幫辦軍務尤當知感知懼力贖前愆儘再不知奮勉卽著嚴參治罪該大臣務卽激勵將士力破賊巢盡殲醜類並嚴杜紛竄之路無令逃逸迅奏膚功以慰廑念勝保別項劣蹟仍著查明參奏將此由六百里加緊諭知僧格林沁並諭德勒克色楞西凌阿崇恩知之○湖南巡撫駱秉章奏承順奸匪嘯聚攻撲府城經官兵擊退首逆卽盡見籌按勦得旨勦辦情形續行奏聞○以幫辦連鎮軍營出力賞侍郎瑞麟總兵官慶祺巴圖魯名號副都統綿洵黃馬褂均加都統銜札賚特貝勒拉木棍布札布郡王銜三眼花翎克林沁雙眼花翎○辛卯諭內閣羅惇衍奏近畿百姓疲於

供億請飭直隸總督順天府府尹察看情形將謁 陵大典暫緩舉行一摺前經降旨於三月初三日由京啟鑾恭謁 西陵誠以兩載以來未經展謁朕心依慕實深用特擇日舉行稍申誠悃至畿輔地方兵差絡繹民力未紓無日不在朕廬念之中上年被災被擾地方蠲緩錢糧恩施疊沛若藉口民力而致謁 陵大典久曠不舉非獨朕心不安於政體亦有未協羅惇衍所奏著毋庸議○諭軍機大臣等賈禎譚廷襄奏凱撤官兵應由何路行走請旨遵辦一摺連鎮凱撤官兵見皆由南運河行抵通州除察哈爾官兵由通州取道昌平必須須路過京城外其東三省密雲並哲里木昭烏達熱河各官兵若令一併來京轉多紆折著照賈禎等所請東三省官兵即由通州等處出山海關密雲官兵即由通州順義至密雲縣哲里木昭烏達各盟官兵並熱河官兵即由通州順義出古北口即著咨會伊勒東阿等就近分路撤遣毋庸到京其路過京城之察哈爾官兵著賈禎等照例辦理將此諭令知之○會國藩塔齊布奏上年十二月二十九日_臣等以兩岸之賊偏處水師新挫恐難自立因商派李續賓蔣益澧等帶湘勇一千二百人從二套口渡江攻剿小池口之賊恐湘勇展轉疲勞難以取勝羅澤南帶勇二百大渡江接應_臣塔齊布自率親兵數十人渡江督之李續賓蔣益澧從內隄入逼近賊壘疊戰一時殺賊十餘名前鋒衝入賊營忽賊隊從營外鈔出一支蔣益澧左營卻退江邊之賊復出數千橫截我師羅澤南從外隄往援將江邊賊隊衝退營內之賊愈出愈多李續賓等內隄一支且戰且退_臣塔齊布恰至躍入督陣湘勇回戈擊賊殺賊目二人數次傷入賊壘以野曠賊眾該逆從遠處大圍包鈔我軍眾寡莫敵後隊旗靡前隊亦不能站往陣腳_臣塔齊布回馬衝突羅澤南李續賓亦回馬力戰使悍賊不得窮追有黃馬桂賊三人各帶十餘賊直奔_臣塔齊布馬前羣矛攢擲_臣塔齊布直前砍一黃馬桂賊落地而奪其馬又橫突而西二賊目皆落馬餘黨始靡而大隊賊自內隄出者尙窮追不止_臣塔齊布念悍賊所以苦迫者止欲得一人而甘心也因揮令湘勇大隊沿江西馳而獨馳馬至北路鄉聞自是賊眾不甚西追羅澤南率湘勇收隊渡江餘賊北逐者_臣塔齊布復刺殺一二賊終不敢偏日暮始渡江歸營查_臣等陸軍在北則不能顧南岸在南則不能顧北岸南岸潯城圍攻正在喫緊而北岸小池口之賊相逼已甚不得已分渡南岸之兵擊北岸之賊士卒久勞隔江遠戰主客勢殊眾寡不敵致二十一二十九日兩次挫衄該逆自十六日由湖口分支來踞小池口二十五日大隊復至二十六日分千餘人上竄龍坪武穴二十八日李孟羣駛船在武穴擊之又揮勇登岸力擊賊數十人餘眾敗回復於三十日引大股賊三千人沿江上竄初一日竄至武穴初二日至蘄州聲言直犯武漢至督_臣楊需廣濟一軍臘月十二及二十四等日兩次敗衄聞二十

恐下游江面仍爲賊有欲堅扼潯江則恐上游船少不敷剿辦正在進退兩難之際忽於初四日東北風大作巨浪排擊漂沈長龍三板二十二號擊壞十四號延至午刻又破壞七號其存者亦俱撞損漏裂桅折纜斷倉卒之間止得將壞船委棄而令略好者七十餘號全數開赴上游直趨武漢名爲速剿上犯之賊實則修整已壞之船臣等辦理錯謬之處蓋有二端武漢當留重兵駐守並當留戰船數十號以爲後路聲援茲因江漢無戰舟致該逆乘虛上竄其失一九江未破速攻湖口竄通江西餉道弁兵旨味輕進致輕舟百餘號陷入內河一軍分爲兩截外江無小舟內湖無大船頓形薄弱其失二至兩次被襲之後更遭大風壞船則又事機不順出於意表者也目前籌辦之法謹條列具奏一回救武漢之戰船前後其百號被風擊壞者多其完好可戰者約不過四五十號漢口若被賊踞則修整船隻當在金口以上臣國藩並於沔陽之新隄地方設立船廠飛飭李孟羣彭玉麟等即在鄂濱紮營在新隄整船可以固荆襄之門戶可以期竄漢之新賊第離臣大營太遠各船口糧銀兩及修整破船之費添造三板之資概無所出應請旨飭下湖廣總督湖南巡撫迅籌餉銀交李孟羣彭玉麟水營應用一鄂省兵勇臬司胡林翼帶二千餘人經臣等奏調來潯會剿副將王國才帶三千餘人經督臣楊需飭令來潯都司石清吉帶千餘人經督臣飭令在富池口設防均在南岸臣等聞賊從江北上竄之信卽飛飭胡林翼石清吉先後回援武昌其王國才一軍俟江西供撥餉銀後探明鄂省確耗再定進止一水師陷入內湖者皆三板長龍輕利之船不便宿食不能紮營本擬俟春水生時卽與外江水師併力攻出今外江船壞全回武漢則內湖須添造大船添募水勇各小舟有所依附乃能自成一軍回鄂省之師船有李孟羣彭玉麟經理陷內湖之師船無得力將領統之各勇聞老營被燒衣物全失如鳥失巢人無固志臣國藩擬親至吳城等處統轄此項水師重加整頓或竟至江省一次將造船添勇事宜與撫臣陳啟邁面商妥協仍回大營一陸軍各營銳氣尙盛見在圍攻九江開空地道人踴躍用命若回軍武漢則雄心頓減銳氣消靡以後斷難復振且湖口九江之賊皆將內犯江西省城有礙大局臣等定計月內設法破城一俟內湖水師整理就緒仍當鼓行東下直搗金陵該逆上竄武漢攻我之所必救也我軍下搗賊巢亦攻其所必救該逆縱復踞漢陽我軍亦不肯展轉回顧聽其多方以誤我也臣等自誓有進無退區區愚忱實欲一雪積憤成敗利鈍皆不敢計又奏臣塔齊布陸軍自紮入里坡後日夜圍攻潯城逆匪堅匿不出我軍於東城外潛開地道而令得力兵勇一百四十名帶同夫役二百名紮營其上別撥親兵百人往來巡哨本月初六日卯刻逆黨千餘人從大東門旁開洞門出城來犯逆首羅大綱從小池口率悍賊二千餘渡江助戰一撲開空地道之營一撲副將王國才之營我軍之空地道者逆料賊必來犯密排槍礮以待賊至待其撲近營邊槍礮齊發轟斃帶隊之黃馬桂賊目一名及隨賊數名餘賊仍抵死不退臣塔齊布帶勇馳往應援衝殺十餘賊追至大東門逆黨半由洞門入城半卽絕城而上被官軍槍斃刺斃無數城上礮子如雨我軍傷亡十餘人遂繞城追至沿江一帶賊之分撲王國才營盤者共分三路該營連環開礮賊不敢偏進竄遂以全力移撲周祿等營盤王國才所都司畢金科帶勇五百人從後門潛出鈔周祿營盤之左猝衝賊隊

被斃十餘人逆眾披靡適台營援兵亦至橫截之該逆腹背受敵狂奔不止我軍沿途追殺適塔齊布亦從東門繞出併力追剿逆黨爭舟回渡擁擠翻沈我軍奮追爲城上槍礮所格午刻收隊計殲斃逆匪共二百餘名生擒二十一各查羅大綱兇悍詭譎因官軍堅扼潯城急欲來撲經此次敗挫我軍銳氣愈振日內仍當併力攻剿以殄兇鋒上諭曾國藩塔齊布先後奏報陸軍渡江剿賊並迎剿九江城中撲營逆匪及籌辦情形各摺覽奏殊深懸繫所稱辦理錯誤之處如水師衝入內河以致聲勢隔絕誠不免銳進貪功至武漢收復後未雷後路聲援一節則其勢本有不及水陸兩軍全數進剿猶恐兵力單弱若彼時即分防武漢兵數愈少刻下更不知如何棘手以見在情形而論上竄漢口之賊見有楊需督兵江北李孟羣等師船亦已駛抵武昌統計楊需收集及續調之漢川官兵沔陽等處練勇不下六七千名李孟羣戰船可用者亦尙有四五十號胡林翼等回援之兵復有三千餘名儘可相機夾擊曾國藩等既定直搗金陵之計即著迅速設法攻克九江合軍東下毋得再存顧慮該侍郎等營中糧餉軍資上賴湖南下賴江西接濟此時若輕舍九江回顧武漢不但江西之賊全行竄出卽漢口之賊亦必愈僨愈上兩路餉道皆梗孤軍尤屬可虞自以力攻九江爲扼要之策蕭捷三等衝入內河之船雖屢經獲勝而輕舟散泊不能成軍殊非勝算亟應設法接應出湖以爲陸軍犄角外江大船見既全令上駛添船添勇自係緊要機宜但製造尙須時日而陸軍銳氣正盛覽所奏塔齊布獨當賊隊情形亦屬過於冒險曾國藩既擬親至吳城卽著一面與陳啟邁商酌製船事宜一面諄屬塔齊布加意慎重總須內河師船駛回與城外陸軍會合進攻方有把握曾國藩抵吳城後能將前項船隻卽行帶出固爲應手若一時未能全數出湖亦須察看軍情仍回大營免致與塔齊布內外睽隔居隆阿輝光宸恩齡等見攻九江趙如勝吳錫光等見攻都昌亦係內外分辦總宜速籌會合攻破湖口賊卡以通援應之路本日陳啟邁奏省城見造長龍三板而水營所需乃在大船著該撫卽行趕緊添造毋得遲誤李孟羣彭玉麟等武昌水營需用糧餉鉛藥及修整船隻經費著楊需迅籌接濟並知會駱秉章一體籌款撥解不得推諉楊需自抵德安後未據續有奏報見由何路進剿漢鎮調兵勇已到若干荊州官兵是否卽能下擊均著迅速奏聞該督節節退守已屬咎無可辭若再株守德安致逆賊負隅久踞試問能當此重咎否耶將此由六百里加緊各諭令知之○王辰諭軍機大臣等官文奏漢鎮逆匪突入襄河見在派兵防剿一摺前因逆賊回竄漢口楊需退駐德安屢經諭令官文酌派精兵速往會剿並將能否親往之處速籌馳奏茲閱所奏情形該逆見已竄入襄河擾及沔陽是其意圖上竄仍係上年故智惟究係分股抑或全數西竄摺內未經聲敘官文所派兵勇既須先剿仙桃鎮卽不能遽抵德安徑攻漢鎮楊需前調之陝西宜昌官兵皆近在漢川自應早已到營何以自正月十一日發報後至今竟無續報此股回竄逆匪雖不盡由北岸而來究其所以得入楚境之由實因廣濟一軍不能堵禦所致此次上竄沔陽又從漢川闖入襄河該督豈毫無聞見見在無論該逆全股分股楊需總不能株守德安待援鄰境儻該逆悉數奔突襄河楊需卽應督兵上剿儻漢鎮尙有大股盤踞楊需卽應趕緊進攻擊回賊勢使不得上窺荊襄旁犯武昌若竟一籌莫展徒以扼

賊北竄爲名獨不思沿襄河而上安陸荆門處處皆可上竄耶官文所派兵勇不下四千餘名如仙桃鎮賊匪擊退亟應沿河東下若因荊州緊要卽於載增貴陞二人中酌派一人帶兵前往該將軍能親自督兵進剿更足以壯聲威至德安武昌兩處兵餉前已有旨飭催四川前撥銀十萬兩陝西前撥銀五萬兩此項銀兩均由荊襄一路行走所有官文一軍需用款項卽著於此款內通融動用將此由六百里加緊各諭令知之○諭本日據官文等奏漢鎮逆匪突入襄河已諭令官文楊需等督兵堵剿矣該逆見由漢鎮分股至襄河搶船意圖上竄是豫省西路各要隘防堵最關緊要英桂前奏已於信陽州三關等處層層設備光商一帶責成邱聯恩嚴密防堵見在西路情形喫緊著英桂妥爲布置嚴防逆匪乘虛北竄所有添兵募勇各事宜務須確探賊蹤體察事機迅速籌辦毋稍疏虞將此由六百里加緊諭令知之○諭易棠奏酌擬變通制錢分兩一摺甘肅省銅價甚貴且須兼鑄大錢若制錢分兩仍按每文重一錢二分鼓鑄非獨工料過重亦易啟奸民私銷改鑄之弊所有該省寶華局鼓鑄制錢分兩著照易棠所請酌量變通每錢一文減爲八分每千以重五斤爲率仍著督飭局員認真經理務期制作精良俾輪廓字畫分明不至有漏風缺邊等弊以重國法而便行用將此諭令知之○癸巳諭軍機大臣等昨據官文等奏漢鎮逆匪突入襄河擾及沔陽本日楊需奏稱賊由漢鎮分竄漢川之麥旺甯經沔陽鄉勇截擊餘匪窮蹙仍思折回漢鎮復經鄉團圍截殲斃多名僅賸四五百人奔至侏儒山未能竄出等語與該將軍所奏情形不同若如該督所奏是襄河一帶賊勢尚不十分喫緊但逆匪係分股上竄希圖牽掣我兵然仙桃鎮已被焚擄所稱僅四五百人尙恐未確官文已派兵勇前往剿辦自應飛飭各員確探賊蹤迎頭截擊漢陽漢口賊匪不過六七千人並未搶有船隻李孟羣敵船已抵省城王國才胡林翼陸路兵勇彭玉麟水勇指日均可抵省軍威已壯武昌可保無虞但李孟羣等亦斷無株守省垣之理漢口賊匪尙多攻剿漢口卽以保護武昌況有胡林翼玉山劉富成等陸路兵勇接應水師亦不爲孤著楊需飭令各該員等先剿漢鎮以掃賊巢勿任負隅久踞至襄河一帶師船能否駛入該逆竄擾仙桃鎮業經官文酌派滿洲兵四百名並調團勇四千名協同沔陽州知州蕭蔭恩力圖攻剿如果賊勢猖獗兵力尙單楊需仍須飭令李孟羣等水軍設法追剿並能否添派陸軍策應之處相機酌辦務將上竄之匪盡數殲除勿令滋蔓官文奉到昨降諭旨是否親自帶兵前進諒該將軍必能斟酌盡善妥爲籌辦也將此由六百里加緊各諭令知之○是月貸山西汾陽等三縣倉穀籽種緩徵山西臨汾等二縣應還倉穀湖南長沙等十縣暨岳州衛災區額賦屯餉山東臨清等五十四州縣被水被擾額賦並德州等四衛承阜等三場竈地錢糧直隸安州等四十九州縣災歉額賦加賞保定東光民旗一月口糧平糶江西武甯等十縣被水被擾倉穀

咸豐東華錄四十五

二月甲午朔諭軍機大臣等王懿德等奏夷商販茶請准租屋居住一摺福建省因茶販不通暫開海禁各國夷商多來買販該督撫爲廣收茶稅務順輿情起見准該夷領事承租南臺天安寺雙江臺後空曠地基並准夷商等承租大橋以南觀音井下橋等處

屋地六所爲儲貨棲身之地均係民夷兩願並立租約益用印信係照從前和約辦理該夷等向化遠來自應處以館舍用示懷柔惟民夷雜居必須嚴加約束且南臺一帶逼近省垣既已租與屋地著該督撫諭令該夷領事官金執爾等稽查彈壓務令與本地居人相安無事免生嫌隙方爲妥善其續到夷商需租房屋並著飭令該地方一律辦理將此諭令知之○荊州將軍官文等奏遊調滿營精兵仍由貴陞統帶迅赴下游會剿得旨汝未便遠離荊州自屬實情惟貴陞能否得力殊深潔念川陝軍餉已有寄諭令伊等催解矣○湖北巡撫陶恩培奏逆賊分踞漢口漢陽水師獲勝臬司帶兵回省見籌以戰爲守之策請迅撥餉銀以濟急需得旨各處餉銀已有旨令楊需官文等迅速分解汝既知以戰爲守豈能聚集多兵林守武昌況逆匪見已分股上竄更應追剿○乙未諭內閣吳振械蔣霽遠奏與義首匪徒戮除淨盡地方肅清勦辦尙屬迅速所有雲南會勦官兵著吳振械等酌量裁撤歸伍至遵義府屬匪徒竄往黔西前經官兵疊獲勝仗諒不難剋日蕪事惟首逆楊鳳等尙未就獲著蔣霽遠嚴飭文武各員迅速緝拏務獲毋任漏網稽誅○諭軍機大臣等御史伍輔祥奏黔匪漸就肅清請飭劃清黔蜀疆界駐紮武弁以資彈壓一摺據稱四川之綦江貴州之桐梓仁懷該三縣疆界錯雜最易藏奸應將各處所插之地分別歸併無許犬牙相錯各於交界要隘酌駐武弁其黔蜀本省有似此夾雜者亦請一律劃清等語各省交界處所遇有盜賊地方官互相推諉原係向來惡習該御史請明定黔蜀疆界互相歸併自爲巡緝奸宄使盜賊無可隱匿著該督撫會同體察情形如無流弊卽行酌量歸併儘有窒礙難行之處仍可仍照舊章責成該地方文武不分畛域認真緝捕儘有藉詞推諉捕務廢弛者卽著嚴參懲辦原摺鈔給閱看將此各諭令知之○諭和春福濟奏遵查甯國等屬捐輸防堵各案未經請獎原委一摺所奏自係實情各屬勸諭捐輸辦理防堵如果實能出力著有成效原應亟予請敘以獎其勞茲閱另單開列各案藩司展轉駁詰均出有因若以款目混淆之捐項小有斬獲之微勞率行臚列多人紛紛給獎誠不足以重餉項而服人心著和春等卽責成該藩司道府迅速查明務使捐餉不至虛糜而獎勵亦無冒濫再行奏請恩施儘所屬府縣有浮銷捐項含混詳報以致展轉飭查遲延請獎者卽著據實參辦庶足以鼓舞人心俾捐生不至藉口另片奏捐輸防費及軍餉各項請分別給獎等語著照所請所有捐輸防費之員卽照常例給予封典職銜其偏近賊氛捐費堵剿著有成效者仍照籌餉事例給予職官選補以示區別將此由五百里諭令知之○諭吉爾杭阿奏酌擬獎賞等語佛蘭西提督嘛呢囑於官軍攻剿上海逆匪情殷助順吉爾杭阿請賞給綉四卷銀一萬兩以示懷柔尙爲妥協著卽照所擬辦理將此諭令知之○諭各省辦理捐輸原以接濟兵餉若任令不肖州縣恣意侵吞藉端需索徒飽官吏之橐無補餉項之實誤國病民深堪痛恨前據河南學政張之萬奏參知縣汪曜奎侵吞捐輸業經革職等因恐他省似此者亦復不少前次載齡奏道經山陝訪聞州縣多有吞捐冒銷等弊是該署撫未到任時早有見聞必應嚴杜弊端以歸覈實著載齡嚴密訪查如有侵漁情弊卽行據實嚴參從重懲辦將此諭令知之○和春等奏官軍晝夜環攻廬舒巢等縣賊匪屢有斬擒得旨覽奏不過小有斬獲實難指日克復汝等屢次奏摺率

云斃賊數百或不計其數若果盡屬從實何以愈殺愈眾每至攻城必為所覺傷亡想亦不少雖逆賊張何官兵無能至此瑣瑣贅言全屬搪塞和春福濟督師皖境一載有餘遲延委靡之罪百喙難辭朕尚不處治汝等原望奮勉圖功以贖前愆朕猶不惜諄諄手諭若仍恃奏章為敷衍則罪由自取朕惟知以軍法從事勿謂言之不先也懷之特諭○以克復含山縣城賞翰林院編修李鴻章知府銜花翎佐領輯順多隆武常壽參將扎隆武守備俞應彪等花翎銜升擢有差○丙申駱秉章奏自田家鎮半壁山水陸大勝後九江府城原可乘機克復因北岸廣濟黃梅賊勢尚熾塔齊布羅澤南率諸軍盡銳攻期始克兩城賊以其暇得嚴密布置比塔齊布等回軍渡江則九江已屹然堅城難以遽下矣曾國藩偵湖口以內賊船甚多慮其出江為害即分軍剿之是時黃梅復陷九江對岸小池口一帶復有賊蹤曾國藩水師無陸軍夾護而三板戰船又已盡入湖口冬令水枯急切不復得出以致有十二月二十五日劫營之挫督臣楊需駐軍廣濟賊至即潰正月初二日退至黃州初五日退至漢口其出也盡率兵勇萬餘以行武昌省會重地僅留逃潰疲弱之兵數百飭藩司夏延樾等居守撫臣陶恩培到任甫數月一切未及布置當督臣退至漢口時賊匪於初七日尾追而至民人扶老挈幼號泣奔走情形極為慘痛而督臣又不知退駐何處矣頃據平江縣稟稱賊匪大股均聚與國州其為犯鄂無疑鄂城餉竭兵單勢甚危急督臣所帶兵勇多已潰散曾國藩塔齊布糧臺坐船多被燒毀軍實蕩然勢難驟振臣惟湖北湖南唇齒相依自去秋以來本省南路防剿兩粵之賊無日不事戒嚴披除腹地之匪一時尚未就緒茲復值北路警報沓至時勢更非上年可比見在一面抽調南路兵勇赴省並飭局趕造船礮一面飭北界各府縣督飭鄉團添募壯勇為援期之計一俟諸務稍集即當相機辦理奏入得旨所造船礮仍應接濟曾國藩是為至要○戊戌祭 大社 大稷○諭內閣德勒克多爾濟奏喀爾喀土謝圖汗車臣汗兩處汗王貝勒貝子公扎薩克等呈稱因賊匪尚未蕩平情願捐助馬匹以備軍需求為轉奏等語喀爾喀兩處汗王貝勒貝子公扎薩克等因賊匪尚未蕩平屢請捐助銀兩馬匹實為出於至誠朕甚嘉悅若再捐助馬匹朕心實為不忍見在直省賊匪已經殲除河北賊匪亦就肅清著德勒克多爾濟傳諭土謝圖汗車臣汗兩處汗王貝勒貝子公扎薩克等伊等所捐馬匹著勿庸賞收以示朕嘉尚體恤蒙古世僕之至意○論軍機大臣等英桂奏密縣土匪戕弁焚署並宣擾鄭州一摺該州縣密邇省城突有土匪竊發何至如此披猖據該府縣所稟又無起釁根由顯係地方官辦理不善意存諱飾見在河南東南兩面偏近皖楚賊氛甚關緊要而河北各屬聚眾抗漕之處尚復不少若不速將此股撲滅設有蔓延旬結全省將不可問余炳燾出省勦辦所帶兵勇僅止數百名是否足資勦捕著英桂體察該省邊境情形儘安徵邊界防務稍鬆即添撥官兵星速馳往如牛鑑張維翰等無論何人皆可酌量派往崇安於輝縣之案如已辦結亦可帶兵會剿總以迅速殄除毋致釀成巨患為要仍著英桂查明此股土匪究由何處竊發因何起釁並余炳燾出省後如何勦辦情形迅速詳細具奏至楚省軍情據該撫奏報與楊需所奏大致尚同惟塔齊布已到漢鎮之語未為確實竄擾仙桃鎮之賊是否已被荊州兵勇擊退亦未據楚省奏報著英桂一面嚴防信陽等

處一面確切探明隨時奏將此由六百里加緊諭令知之○向榮奏疊次攻剿鎮江賊匪並備調兵勇布置上下游要隘得旨吉爾杭阿已有旨幫辦軍務自可督師迅克鎮江汝仍在金陵扼賊防竄爲要一面嚴飭吳全美等速行斬鍊上駛以期水陸合擊上游師船已回武昌俟回竄楚北之賊剿滅淨盡方能再下九江潯郡安慶克復方能直搗金陵見在事機不順一至於此惟冀汝等協力和衷無論江鎮兩城先克一處庶幾漸有握勝之機也○命魁聯爲候補按察使仍留湖南辦理防剿事宜調文格爲湖南按察使以張敬修爲廣西按察使由右江○己亥 上御經筵○僧格林沁等奏伏思高唐逆匪爲數無多踞守十月之久堅匿不出自臣移營以來該逆逐夜出巢探路冀圖逃竄正月二十九夜開密令南面站牆官兵分隊伍停止更籌故作疏防之勢設該逆潰出俟其離濠漸遠再行截擊子刻該逆果然撲出見此段毫無官兵全股直往南竄臣等督帶馬隊五百餘名街尾緊追該逆死狂奔至距高唐五十餘里之枉平縣屬馮官屯入村踞守該處三村相連周圍挑有深深當即催調後隊馬步兵義勇於初一日辰刻趕到由西面撲入村中一面救護該村男婦一面用火焚攻痛加戮勦立將西面二村奪回斃匪二百餘名生擒十餘名據供逆眾八百餘名欲向濟甯奔竄官兵擊殺甚多僅膽五百餘名等語見已將大礮運到向內轟擊以期殄滅無遺頭等侍衛達崇阿吉林協領委營總豐山委參領豐玉同時陣亡均請照例賜卹以慰忠魂 上諭內閣僧格林沁等設法誘賊出巢收復高唐州城逆匪南竄見被痛剿僅餘五百餘名蟻聚馮官屯村莊東南一隅抵死抗拒該大臣等務當激勵兵勇晝夜環攻立將醜類盡殲及早蕪事以慰朕望其陣亡之頭等侍衛達崇阿吉林協領委營總豐山委參領豐玉均著交部照例議卹○諭軍機大臣等僧格林沁等奏收復高唐賊竄馮官屯一摺該逆窮蹙餘生困守一隅大兵四面合圍諒不至再有竄逸見在大礮已經運到即應盡力轟擊村莊設備雖爲嚴密究不能如城池之堅固在城則利其竄出以便跟追在村則必須兜圍以防奔突計自初二日進仗後又已數日當必更形得手務宜於奮勇之中加以慎重儻任其旁竄他處或困守村莊則又蹈從前故轍諒該大臣等必已早有成算不令釜魚檻獸日久稽誅也崇恩奏資遣裁撤練勇等語著即照所擬妥爲籌辦刑部主事楊熙本由四川帶勇前來見在裁撤川勇需人彈壓著崇恩詳加察看如該員尚能約束即飭令管帶回籍毋令沿途滋事儘此外尚有帶勇之員無須該員管帶即飭令回京當差將此由六百里加緊諭知僧格林沁並傳諭德勒克色楞西凌阿崇恩知之○先是葉爾羌參贊大臣常清奏籌畫新疆南路八城全局酌裁防兵以減經費並折徵加鑄以濟兵餉命軍機大臣會同戶部兵部議至是會奏葉爾羌滿洲揆防官兵二百五十五員名既議全行裁撤應令烏魯木齊都統於綠營兵內照數添派赴葉爾羌等城換防抵減內地調派以節糜費喀什噶爾滿洲揆防官兵出隊得力綠營換防官兵分守各城要隘均無庸議裁以重邊防其折徵倉糧一節既因各城倉糧儲積愈多出糶不易應自咸豐五年起將正科糧石徵收本色一半折價一半所收折價由該大臣酌中定價以示均平至加鑄原以裕餉葉爾羌所屬及烏什喀什噶爾兩城既經採有銅苗可資鼓鑄應令該大臣商同各城大臣廣行開採加鑄鼓鑄各項大錢分成搭放兵餉

以濟銀兩之不足從之○庚子諭內閣王懿德等奏仙遊軍務完竣地方肅清一摺福建仙遊縣匪徒滋事經該督派撥兵勇進剿攻破賊巢擒獲首要各犯分別正法惟逆首林俊尚未拏獲據獲犯供稱業已被火焚斃是否屬實仍著該督等確切查究嚴飭搜捕毋令漏網見在該處匪黨盡殲地方安靜官兵悉數凱撤所有在事文武員弁著該督等擇其尤爲出力者酌保數員候朕施恩○論軍機大臣等文煜奏逆匪竄撲沙頭等處擊退竄回仍嚴密防堵一摺瓜州逆匪屢次攻撲沙頭營盤雖經兵勇擊退而該處爲裹下河最要門戶文煜所帶之勇爲數無多設該逆乘虛擡裏下河一帶在在堪虞托明阿統領全軍藪爾瓜州日久未能克復若再令該逆紛紛旁竄致完善之地復遭蹂躪辦更形棘手所有沙頭等處各路要隘著該大臣等嚴密布置如有東竄匪黨卽水陸夾擊以杜紛擾薩炳阿見帶兵二千名馳赴瓜州軍營托明阿等得此精兵援應更足以資分撥仍一面迅圖克復瓜州毋再遷延貽患所有此次堵剿出力員弁准其酌量保奏將此由五百里諭知托明阿陳金綬雷以誠並傳諭文煜知之○改撥山東解部銀二萬兩山西解部銀五萬兩解從高唐軍營備軍需○癸卯諭內閣樂斌奏匪徒聚眾戕官攻城見已殲擒殆盡地方一律肅清此股匪徒因搶劫起釁膽敢戕官攻城肆行焚掠竄屬罪大惡極除張老八等業經正法外所有見獲匪黨著樂斌督飭委員嚴行審訊從重按律定擬仍嚴飭各該地方官搜捕餘匪務期淨絕根株毋任漏網○甲辰諭軍機大臣等本日據軍機大臣會同戶部詳議鈔法章程一摺民間完納錢糧自咸豐六年上忙起凡應搭官票改換寶鈔議令直隸山東河南三省先行遵辦內如部頒寶鈔令各省藩司獨立號簿蓋用印信再行解部所用騎縫印信篆文大略相同恐小民難於辨認應否添設簡明標識之處著各該督撫斟酌奏辦其各省收到寶鈔並准由各官銀錢號兌賣事屬官民交涉防範稍有未周易啟勒措把持之弊至酌給羨餘一層應由該督撫體察所屬情形通盤覈計酌立定額固未可過於苛刻亦豈容稍涉冒濫立法之始不厭周詳著桂良崇恩英桂各就該地方情形悉心斟酌妥擬詳細章程迅速具奏總期寶鈔得以流通而兵民亦藉紓困累原摺著鈔給閱看將此各諭令知之○諭僧格林沁等奏連日勦賊情形一摺據稱賊匪匿馮官屯沿牆掘地穴伏以避槍礮一時攻勦尚未得手該逆竄出之後屢被大兵痛剿所賸狡悍之賊諒已無多仍當激勵兵勇設法速攻以期及早肅事尤須加意慎重勿致窮兇乘間竄突復擾他處劉自明係由連鎮技獲之犯其所獻地攻之法未免曠日持久且該犯曾爲賊僞將軍是否可恃並著該大臣確加體察勿墮奸計總之馮官屯旣不若高唐之有城垣可守又不若連鎮地勢之寬廣該大臣旣能勦除連鎮大股悍匪豈有區區殘寇不能悉數殲擒猶待遷延時日耶所需軍餉已於直隸山西等省飭撥務當迅速奏功以慰朕望將此由六百里加緊諭知僧格林沁並諭德勒克色楞西凌阿崇恩知之○袁甲三奏前請以郭世亨開缺畱於承宿蒙毫一帶並以王啟秀接署宿州知州奉旨著再與和春福濟等安商此案因綏靖地方需員甚急是以一面具奏一面鈔彙知會福濟等嗣據覆函深以爲然並稱先得我心實深感激等語此次接奉硃批復恭錄行知並加函商旋准和春福濟函覆極稱因公起見整頓地方之苦衷知府陸希湜不能久出在外

必須添派幹員惟 聖意既不肯更易熟手不若將見隨 臣營之知府張家駒駐紮潁亳如 臣別有所見即請單銜具奏等語是和春等於 臣前奏仍未稍有異議且陸希澧本任所屬太和阜陽霍邱潁上均逼近楚豫界連六安正陽處處均須防禦誠如福濟等所云勢難久出在外至張家駒委駐潁亳原可期其得力惟 臣營委員本少若張家駒再駐該處則 臣營遇有緊要事件實在無可差遣此次和春等所見既與 臣並無不合其擬改委張家駒之處係於 臣營之員差委情形尚未深知可否再懇 天恩准將升用知府見署宿州知州郭世亨開缺以知府補用畱於蒙臺宿示一帶剿辦賊匪並准以王啟秀接署宿州知州以資臂助 上諭袁甲三奏通籌皖省軍務請分撥北路勁兵數萬先復廬州一摺該省見在軍情自以急籌攻克廬城爲要見當連鎮蕩平北路勁兵原可酌量抽撥但廬州郡城自前年失守後已越年餘和春福濟所統官兵數逾巨萬豈不能四面環攻迅圖克復必待北路分兵且連鎮官兵本無數萬之數除撥赴揚州外隨往高唐一帶者不過數千即使撥往安徽尙不能如和春等見帶官兵之多安得有如袁甲三所請之數耶和春等前此奏報進仗情形摺內朕已嚴切批示該提督等惟當就見有兵力迅速籌攻不准再事耽延以尙待添兵爲藉口袁甲三既駐臨淮皖省東北兩路有可進取之機亦宜隨時籌勦不得徒以籌畫剖析之詞空言入奏也至郭世亨王啟秀二員前據袁甲三奏請將該員等分別開缺調署朕所以批令與和春福濟妥商者原以調署牧令必須與督撫會銜並非不准袁甲三與聞舉劾乃閱另摺覆奏止稱往返函商仍未聯銜具奏且援引前事曉曉置辯尤失敷陳之體袁甲三著傳旨申飭仍著福濟會同和春袁甲三詳細酌度如郭世亨於潁亳地方辦理實在得力即將該員奏補實缺知府亦無不可其宿州知州應否即以王啟秀接署之處亦著一併會奏另片奏請將失察私鑄槍礮販買私硝處分別變通等語其如何稽察如何拏禁總在地方官實力辦理如果於此等私鑄私販匪孽獲較多不但寬其處分並可酌量請獎若先將處分寬免是豫聞一寬縱之條於緝捕轉無實際著和春福濟袁甲三嚴飭地方文武員弁認真緝拏總以杜絕奸萌爲要無庸另立章程將此由六百里各諭令知之○乙已諭內閣陶恩培奏請飭催道員赴任等語湖北荆宜施道雷維翰例限久逾延不到任著該部迅速飭催赴任並查明該員因何遲延逾限之處先行照例議處湖北督糧道金安清前經黃宗漢委令赴上海防勦見在該縣業已克復並著飭催迅速赴任此外部選及揀發該省各員著一併飭催並查明逾限人員據實參奏其湖北按察使文俊著迅赴新任無庸來京請訓○諭軍機大臣等楊需奏克復漢川斬水進攻漢口並截勦上竄賊匪一摺又據陶恩培奏逆賊勾結興國州通山縣土匪肆擾官垣喫緊並請飭會國藩塔齊布回軍江漢各摺片詳覽楊需所奏見在劉富成等兵勇已至蔡店進偪漢陽與胡林翼等水陸夾擊漢川既經克復上竄岳口之賊與漢口之賊隔絕不通見派兵勇分路進攻惟該督駐紮德安原爲防賊北竄而陶恩培奏稱逆賊勾結興國等處土匪大肆殺掠省垣愈形喫緊該督與省城聲息隔絕此時總當迅速克復漢陽漢口爲保守武昌之計該督萬勿株守德安稽詞延誤況該督由北路節節攻進距漢鎮僅二百餘里能否分兵兼顧武昌較之會國藩等折回援應尤爲便捷見在武昌

兵力單弱督隊打仗僅胡林翼常恩二員設該省稍有疏虞貽誤之罪楊需豈能該卸耶曾國藩等前因戰船損壞全數開赴上游修理又因陸軍銳氣尙盛仍欲鼓行東下直搗金陵原以逆匪上竄牽掣我師若展轉回顧不但前功可惜且恐兵勇之氣不能復振是以論令該侍郎等攻克九江即合軍東下惟見在賊踞漢口漢陽武昌情形關繫緊要設有疏失該逆勢踞上游我兵仍係腹背受敵應如何設法協濟武昌而於攻勦九江大局仍無妨礙著曾國藩等體察見在情形或該侍郎帶兵自行前往仍留塔齊布會同江西兵勇攻勦九江務當統籌全局斟酌辦理楊需曾國藩接奉此旨即將如何籌辦情形迅速具奏以慰廑念陶恩培仍當督飭胡林翼等以勦為防固守省垣以待援兵之至所需軍餉已飭鄰省撥解矣該撫片奏省城見任候補各員聞警逃匿等語實出情理之外著即查明參辦安清等已有旨飭催矣將此由六百里加緊各諭令知之○丙午諭軍機大臣等英桂奏遵旨布置豫邊防並密縣鄭州等處勦匪情形一摺又片奏請飭調北路凱撤官兵更換豫省兵勇等語河南省外禦鄰氛內捕土匪防勦兼施所有防堵正陽六安兩處及南陽新野唐縣信陽關各要隘在在需兵河北各屬匪蹤亦未淨絕該撫欲請調連鎮得勝之兵二三千名赴皖以便豫省防皖各兵遣回更換一俟高唐竄匪殲除即行酌調赴皖俾豫省防兵得以撤回供本省之用此時豫省勇多兵少該撫惟當仍飭牛鑑等實力扼守並飭張維翰等將近皖餘捻輝縣逆逃趕緊搜捕鄭密禹州各境內藏匿匪徒亦應跟蹤追勦盡絕根株內患既清便可專防邊隘協濟楚皖昨據楊需奏克復漢川斬水劉富成之兵已至禁店進逼漢陽又據陶恩培奏逆賊句結興國通山土匪大肆殺掠武昌頗屬喫重襄河亦有匪蹤見雖南陽一帶未聞警報防範仍須嚴密光商一路該撫已派成景帶兵駐紮邱聯恩移紮信陽藉以控制南陽該撫見在陳州居中調度務須隨時偵探何路喫緊即往何路策應毋稍遲延署密縣知縣胡燕清前已降旨革職著毋庸議並責令隨同剿捕不准稍畱餘孽將此由五百里諭令知之○托明阿等奏焦山水師進剿連毀北岸賊隄屢有斬獲得旨水師雖有斬獲亦屬小勝仍應趕緊督催勿任疲玩○丁未諭軍機大臣等官文等奏仙桃鎮擊賊獲勝岳家口追賊失利一摺詳覽所奏賊蹤距荆郡不過百餘里之遙該處官兵既須分布設防又須沿河下擊實有無可抽撥之勢楊需安坐德安所帶兵勇至一萬七千餘名之多於襄河之賊則稱為意圖牽掣於漢鎮之賊則稱為勢難久踞且應赴上游應勦漢口尙在游移未定究竟一月以來所辦何事該督摺內已有賊至岳口之語則該逆之窺伺荆襄已無疑義猶以收復漢川斬水謂為賊匪聲勢隔絕抑何憤憤至此貴陞此次失利誠不免孟浪失機何以與賊接仗之時僅有荆州官兵而該督所派之李錦燾葛以敦蔣立松等並未見隨同接應是該督直置荆襄門戶於不顧而終日籌畫不出楊店蔡店數十里之間殊為可恨見在荆州緊急載增既已出城郡城重地亦不可無人鎮守官文所稱親督進剿之處務須斟酌盡善不可輕為嘗試楊需前派各兵著即飛催前進並於進攻漢陽兵勇內酌量改撥折赴上游以遏襄河賊勢若再事耽延是楊需屢次玩誤朕不能再以薄罰示懲也逆匪由江入漢竟分兩岸北趨顯係水陸並進昨據陶恩培奏賊船放入襄河口內為數不少且有我軍戰艦二十餘隻該

逆無船可據之說斷不可信李孟羣等水師僅在外江轟擊亦須追入內河方能破其藏匿之路其沔陽以上沿河船隻亦應一體撤赴上游方能絕其搶掠以武昌見在情形而論患不在江面而在與國通山一路土匪曾國藩等進攻九江連日不知勝負若何或酌分陸軍以救武昌東路或再添派水師沿江而上協濟李孟羣等之師使得進剿襄河則上游可冀得手於潯郡事機亦有裨益著卽妥爲籌酌迅速奏聞貴陞實在下落仍著官文確查具奏將此由六百里加緊各諭令知之○諭沈祖懋奏賊匪竄入徽境擾及黟縣一摺正月二十一等日賊匪大隊犯石埭之琉璃嶺霧露嶺四川遊擊周天受帶兵迎剿因賊寡不敵致失嶺隘賊由石埭擾及太平縣距歙不過數十里又分隊徑趨黟縣之羊棧嶺二十七八等日另股賊匪攻入黟縣有進犯休甯之信黟縣至徽州府城止一百四十里沈祖懋僅帶練勇二百名在漁亭堵禦此外惟徐榮在徽防堵兵力實形單弱何桂清想已接該學政咨報著卽撥兵赴徽援應堵賊內竄之路並著向榮速飭鄧紹良等撥兵由南路赴黟援務須前後夾擊以遏逆匪猖狂之勢毋令乘虛深入徽郡爲要將此由六百里加緊諭知向榮何桂清並傳諭沈祖懋知之○己酉諭軍機大臣等諄齡奏廓番舉動情形一摺廓爾喀國前欲唐古忒認出幫兵使費已屬有意尋覓見復私給千布康松江堆頂翎到濟曉傳集村民欲接管營官事務巴勒布舊頭人熱瑪松達爾又欲進藏呈遞表章亦與由塘轉遞例案不符居心叵測一切舉動甚屬謬妄惟先後呈遞該大臣稟內並無違悖之詞此次差人赴藏呈遞表章稟信亦似尙知名分此時辦理機宜總當不動聲色嚴密設防該大臣見派噶爾倫汪曲結布及糧務張祺等先後馳往後藏定日一帶藉查辦案件爲名暗爲布置如該夷呈遞表文卽飛遞該大臣等照例譯閱如有悖謬干求之語一面據理駁斥一面迅速具奏所有藏屬要隘密加防範之處仍當處以鎮靜不得過事矜張將此諭令知之○曾國藩塔齊布奏潯城一面臨江兩面瀕湖惟東門有陸路可入因於東門外小嶺下築一新營開掘地道冀轟城垣詎該逆業已偵知於東城內深掘溝溝添築子城東門外增修木壘暗通城內自正月十四日後日由木壘潛出撲我新營塔齊布與諸將熟商乘其屢來撲營設計陷之遂於十八日將新營器物夜中運歸營內暗藏地雷火礮掩以茅草賊果於十九日黎明出千餘人撲我地道徧擲火毬新營地雷火礮齊發燒斃賊匪二百餘人賊眾敗潰塔齊布督令參將彭三元都司周岐山率各營兵勇追襲斃匪四十餘人其自平嶺來攻者王國才李四川練丁禦之浙江甯紹台道羅澤南率領湘勇自東路直抵平嶺安慶府知府李續賓自北路繞出平嶺之後兩路夾攻迨至城根賊眾遁入木壘其伏於寶塔松林中者經羅澤南王國才殲斃百餘名松林之賊盡由老鶴塘奔入九華門三路共斃賊四百餘名生擒十二名此地道停工設計陷賊大獲勝仗之情形也水師之陷入內湖者輕舟百餘精卒二千本向來所藉以衝鋒陷陣者也然三板小艇一旦與老營隔絕座船被燒弁兵饑凍備嘗自開赴江西省撫陳啟邁給以口糧優以犒賞眾心始安繼聞外江被風戰船回鄂老營之相離愈遠內湖之軍心愈搖曾國藩奏明馳至江省親自統帶而安輯之與陳啟邁商定將江省見造之長龍三十號先撥軍應用又慮春夏水盛江湖並漲非巨艦不足以壓浪而立營擬再造

快驍大船十餘號酌派員弁回楚續招水勇自成一軍期與外江水師會合夾攻此內湖水師重加整理之情形也探聞湖廣督臣楊需於初五日回至漢口逆匪於初七日竄入漢鎮等即飛飭王國才回援武漢又據探逆黨句結與國州匪徒復行滋擾並圖竄入江西武甯縣境撫臣陳啟邁與臣曾國藩熟商王國才回鄂之師若取道武甯山路則免其蔓延江境而繞出興國之背勦辦亦易復札飭王國才由武甯與國勦洗回鄂此湖北來潯會勦諸軍旋鄂之情形也見今攻圍潯城臣塔齊布仍日日操練以期蓄養精銳水師一軍分爲兩截各自整飭成軍庶幾轉敗爲功上諭水師陷入內湖久與外江聲勢隔絕曾國藩恐兵心渙散馳往南昌省垣親自安輯已與陳啟邁商定將江省見造之長龍三十號調撥應用惟江湖水盛既非巨艦不能壓浪若尙待鄱陽春漲始行衝出恐稽時日急宜與江西所撥船隻合力設法將支河賊船淨駛出湖口以便與外江戰舸聯爲一氣則水陸會攻方能得力見在水師已上援武漢塔齊布陸軍攻勦九江尤爲喫重陳啟邁擬造快驍各船著即派員迅速督辦以便與湖南師船會同出江吳錫光所帶兵勇既難資堵截亦應另行籌撥藉壯聲威王國才業已由武甯回援武漢繞出興國之背惟該州一帶土匪橫行王國才能否速到武昌尙難豫料而有此一軍勦捕土匪即可稍分武昌喫緊之勢曾國藩續由楚省招募水勇亦恐有需時日必得將湖內長龍一百餘號速圖駛出與塔齊布陸兵會合迅殲醜類克復九江始能與武漢水師聲援聯絡所需軍餉並著陳啟邁就近隨時接濟爲要將此由六百里加緊各諭令知之○諭昨因官文等奏岳口失利當經諭令楊需將派調各兵飛催前進並於進攻漢陽官兵內酌撥改赴上游以遏襄河賊勢諒已遵旨妥辦本日據陶恩培奏賊由襄河渡江直撲省城經官兵擊退水軍楊昌泗等迅速前進至襄河一帶賊勢蔓延官文所派之兵能否迅抵武昌殊難懸定楊需等惟有遵照前降諭旨一面進攻漢陽漢口一面抽撥兵勇折赴上游以遏賊蹤至興國通山土匪滋擾最爲省城之患茲據曾國藩等奏稱見派副將王國才管帶兵勇三千餘人取道武甯繞出興國之背一路勦洗到鄂此項兵勇即著陶恩培就近迎探催提若興國土匪期除淨盡於省城防勦事機亦有裨益李孟羣等水師能否追入內地與陸兵會合夾擊襄河爲賊窟占踞荆郡情形喫重官文等督兵進勦務須熟籌安辦並將近日情形迅速具奏四川陝西餉銀前已有旨飭催此項銀兩均由荆襄行走解到時即著官文楊需陶恩培均勻分用毋得專顧一處致誤軍需將此由六百里加緊各諭令知之○諭曾國藩等在九江水陸屢獲勝仗惟水師船隻被風損壞居多茲據奏稱擬再造巨艦並赴楚招募水勇等語駱秉章已飭紳士丁善慶等趕造大三板艇五十隻並長龍快驍等船此時自己造船竣工督與捐辦船廠一併備齊下駛以資曾國藩等江面攻勦毋稍遲誤將此由五百里諭令知之○諭和春福濟奏移營進勦廬州賊眾連獲大勝一摺廬郡賊匪向恃南路賊營爲外援經我兵於得勝門外步步進逼檢斬三千餘眾踏破賊營八處並陣殲逆首陳宗勝等若再乘勢移營愈愈近孤城當可克復惟皖省賊勢蔓延附近廬州一帶如舒巢等處尙未克復廬州之賊雖被痛勦救援

應未必盡絕著一面督兵迅圖攻克廬郡一面將七里站巢湖一帶分兵駐守毋令得而復失方爲善策若賊去則收復空城敗來則仍被占踞並或旁竄他處更肆鴟張和春等擁兵巨萬縱徑往來獲咎更重據奏首逆就誅羣盜無主然該郡渠魁是否實係陳宗勝城中賊夥尙多克復有無把握和春等不得因有小勝稍存玩誤至前次賊攻廬州時朕聞實因已革知府胡元煒駐守北門緘城逃出以致府城被陷巡撫江忠源殉難六安州失守時知州宋培之亦有開門迎賊之事胡元煒宋培之下落前經降旨飭查未據和春等覆奏見聞賊匪僞示多有胡元煒宋培之兩人僞銜是其降逆已屬顯然和春福濟豈皆毫無聞見著迅速查奏並嚴拏務獲懲辦該撫另片奏鳳順泗滁等屬錢糧未能輸納擬請儘徵儘解等語該省疊遭蹂躪民力凋敝自係實情惟行軍以籌餉爲先見在關稅鹽課等項既多支絀若地丁正項亦任令各州縣藉端惰徵軍需何所取給著除尙未收復奏請緩辦之安廬涇太等府州屬外其餘被災被擾較輕處所仍嚴飭地方官將應徵錢糧實力催徵如敢藉口遷延卽行從嚴參辦將此由六百里加緊諭令知之○和春福濟奏河南候補道張維翰穎州府知府陸希湜於上年十二月間在亳州泥臺店等處會拏捻匪張注禮等一百六十餘名二十三日帶兵赴渦河以南接捕行至臨河鋪有土匪七八百人叢擁而來陸希湜聞勇分路前進塵戰兩時斃匪百餘生擒三十六名聞捻首鄧朝軒業於接仗時轟斃續據署蒙城縣知縣劉瀛階等拏獲捻匪郝奉裁白小卽小白澄等兩起共三十八名及捻首貞沅和尙一名均卽正法查潁亳一帶捻匪經官兵前後殲斃不下數千稍寒逆膽惟此輩東拏西竄愈難芟刈根株見與袁甲三函商擬再添派幹員前往協助一面咨會英桂牛鑑分別派兵會剿報聞○庚戌諭內閣前據載齡等奏強盜等案請從嚴辦理一摺當交惠親王恭親王奕訢大學士九卿等妥議具奏嗣據刑部遵議王慶雲請覈定搶案罪名及御史唐王森奏請釐剔弊端各摺片均交原議王大臣等議奏茲據惠親王等詳議以聞朕惟立法貴乎因時安良必先除莠康熙雍正年間辦理盜案將法所難宥情有可原之犯分別正法發遣乾隆年間經大學士會同刑部議將夥盜曾經轉糾黨與等項仍問擬斬決參稽例意原於法外施仁之中仍寓除惡務盡之意立法本極周詳辦理無虞輕縱無如地方官奉行不善每辦一案把風接贓之人常陪於入室接贓之盜甚或將病故在逃之犯指爲法所難宥見獲之犯歸入情有可原以致匪徒漏網無怪盜風日熾嗣後凡遇盜劫之案著照王大臣等所議仍依強盜已行但得財者不分首從皆斬本律俱擬斬決其中把風接贓等犯雖未分贓亦係同惡相濟著照爲首之罪一律問擬此外實在情有可原之犯如年止十五歲以下被人誘脅隨行上盜者仍照本例問擬儻地方官仍蹈積習或另設名目巧爲開脫一經發覺卽照諱盜例嚴行參辦至搶奪之案總以人數多寡及有無兇器爲斷如果糾眾夥謀持械接掠兇暴情形與強盜無異若不從嚴懲辦勢必釀成巨案亦著照所議凡聚眾持械搶劫兇暴兇著者無論白晝昏夜均照強盜本律不分首從一概擬斬以儆兇頑而靖地方經此次嚴定章程之後各該地方官務當力圖整頓有案必懲用副朕執法持平明慎用刑之至意其吏兵二部所擬獲犯保舉及諱盜處分均依議行至尋常盜犯業經就獲自應按律懲辦御史唐王森請照格殺

勿論之例准州縣便宜從事殊非慎重刑章之道著毋庸議○諭軍機大臣等前因人奏吳健彰通夷養賊各款當降旨交怡良吉爾杭阿按照所參情節逐一嚴審定擬罪名具奏並諭黃宗漢派員訪查茲據黃宗漢奏稱查明吳健彰實與賊首劉麗川同鄉該逆起事時吳健彰眷屬奔避夷館庫中存銀悉為賊有並與夷人夥開旗昌行及所雇船勇俱係粵人每有攻城之舉往往漏洩致船勇與滬城之匪暗通信息各情惟道庫存銀是否三四十萬吳健彰所雇挖罟船價曾否於關稅取償其徵收關稅有無捏報隱匿並夥開旗昌行有無約據其上火輪船與逆匪如何談論貨船漏稅實有若干銀兩未得確據怡良近在蘇省見聞切近吉爾杭阿與吳健彰同在上海日久更難諉為不知該道琴問已久尚未據該督撫將原參各款查明具奏見在上海克復所有應訊人證不難傳集著即逐款查明並此外有無別項劣蹟一併確查據實參奏毋稍徇隱原摺著鈔給閱看將此由四百里諭令知之○諭黃宗漢奏遵查交辦事件並陳徽甯防剿情形一摺前因王茂蔭奏請將徽郡暫歸浙省管轄當經諭令黃宗漢悉心籌畫並查辦知府達秀被參款迹茲據奏稱該督在浙撫任內於該郡撥兵籌餉事宜皆經通融辦理若必改歸管轄於地方公事權難歸一自未便輕議更張達秀業經病故局務另行整頓嗣後收捐款項著何桂清飭令該府縣等認真覈實無任冒銷黃宗漢所奏徽甯防務已與近日情形不同前據沈祖懋奏股匪攻入黟縣聲言欲犯休甯當諭令何桂清撥兵赴援諒已遵旨辦理見在該處帶兵防堵有徐榮恩禱周天受等著即飭令協同堵禦保徽即以保浙何桂清務當不分畛域力杜內竄之路所需軍餉仍源源協濟毋稍貽誤至徽甯兩郡每月防費不貲並著責令徽州府李純甯國府鄧瀛等勸諭紳富實力捐輸所有錢漕正課設法徵收藉資接濟將此由五百里諭令知之○辛亥諭內閣惇郡王奕諤恭親王奕訢均著如恩賞穿黃馬褂○壬子諭軍機大臣等楊需奏進攻漢陽漢口獲勝並分勦繫馬口等處賊匪情形一摺官軍連日分投進剿雖據報各有斬獲而傷亡兵勇甚多漢陽漢口並未克復岳家口仙桃鎮之賊亦未能剿除淨盡賊勢各路蔓延亟圖上竄北岸天門等處僅有守備穆昶索朗等督帶兵勇勦辦殊形單弱著楊需飭楊昌泗帶兵與劉富成會合前進並著官文飭令魁玉錫齡阿會督兵勇無分南北岸併力夾擊杜賊上竄之路或尙須添撥兵勇俾敷攻剿仍著官文楊需妥為調派毋稍疏忽李孟羣等進攻漢陽均以賊匪鈔襲未能攻入見駐武昌兵勇足資援應著陶恩培飭令胡林翼等斟酌情形渡江協剿以期及早收復此時兵勇既已分路進剿楊需自應飛速前進臨陣調度斷不准株守德安致滋貽誤另片奏請飭山西陝西四川按月籌餉五萬兩等語見已諭知各該省籌解仍著官文等於解到後分撥應用毋得專顧一處所請撥高唐兵丁俟竄往馬官屯之餘匪盡肅當即酌撥前往昨據軍機大臣議覆禮部侍郎杜勳奏請汰冗兵一摺內稱各省徵調官兵未必盡皆精銳應由各督撫及帶兵大員於徵調之初到營之後認真簡閱裁汰疲弱等語自為撙節軍餉起見著官文等按照所議認真辦理毋得視為具文原摺著鈔給閱看將此由六百里加緊各諭令知之○諭逆匪回竄湖北占踞漢口漢陽等處見已厚集兵勇分投攻剿所需軍餉刻不容緩並省城戡守兵勇及添募水勇修理船隻等項費用在在均關緊

要著樂斌王慶雲載齡安達等源源接濟按月撥解見當該省剿賊喫緊之時斷不可以無款可籌一奏塞責致誤要需其前兩次撥給湖北川餉並著該督迅速催解毋稍延誤將此由六百里各諭令知之○癸丑荊州將軍官文等奏逆匪攻陷天門等處已添派兵勇堵剿旋經兵勇克復天門縣城擊退漢河兩岸賊匪報聞○子浙江被戕鹽大使傅垣祭葬世職○甲寅子江西陣亡巡檢許道卿等祭葬世職○乙卯諭內閣惠親王軍機大臣會同刑部具奏定擬保罪名一摺已革都統勝保經朕特授爲欽差大臣勦辦逆匪自賊踞高唐州後勝保帶兵圍攻九月有餘未能克復糜餉勞師罪無可追惟念勝保前由揚州帶兵解懷慶之圍追賊山西不遺餘力其另股賊匪由山東臨清竄出後復沿途追剿直至江蘇豐縣悉數殲除尙屬著有勞績勝保著照擬於斬罪上減等發往新疆效力贖罪○諭軍機大臣等前因襄河賊匪上竄岳口官軍失利曾諭旨國藩等或酌分陸軍或添派水師折回會剿嗣據曾國藩等奏整頓水師情形並湖北赴海協剿官軍已先後回援復諭令該侍郎等迅將陷入內河各船設法駛出爲水陸夾擊之計該侍郎等諒必籌畫盡善不至顧此失彼茲據侍郎王茂蔭奏賊以九江爲扼要故用全力守之曾國藩等不可回救武漢亦不可多分兵力等語見在塔齊布圍攻九江並未撤兵王茂蔭尙未知悉且不知此時荆襄緊急武漢兵勇不能得力有不得不分兵援應之勢其所稱由間道入江西從南康星子水陸橫衝而出內外夾攻亦尙未知曾國藩已抵南昌籌捷三等師船尙在都昌一帶軍情移步換形固不容專顧一隅亦豈可處處受賊牽掣著曾國藩塔齊布仍遵疊奉諭旨迅圖克復九江則上下游江路自通賊踪可斷其應撥兵回援及如何前後兜剿之處均著妥速籌辦王茂蔭摺是否有可採擇即著酌量辦理又軍機大臣議覆禮部侍郎杜翻奏請裁汰冗兵一摺內稱各省徵調官兵未必盡皆精銳應由各督撫及帶兵大員於徵調之初到營之後認真簡閱裁汰疲弱等語自爲撙節軍餉起見著曾國藩塔齊布按照所議妥爲籌辦並知照陳啟邁一體慎選辦理原摺各一件均著鈔給閱看將此由六百里諭令知之○丁巳陝甘總督易奏抽釐流弊滋多甘肅礙難辦理得旨既有窒礙著不必行○戊午諭內閣恭親王奕訢等奏訊明職官違例放債並室室大員借貸屬員銀錢各情分別定擬一摺此案已革內管領達魁違謹身係職官輒敢舉放利債指扣兵丁錢糧復夥同木商承買木植實屬目無法紀達魁違謹均著從重發往新疆效力贖罪所有該革員等查封財產及玉田縣地畝著一併查鈔入官已革外委司泳茂派辦木植變價輒取屬令木商短寫價值欲行侵用著從重發往軍臺效力贖罪已革馬蘭鎮總兵宗室慶錫於司泳茂承辦木植起意詐贓未能查出已屬形同竊贖復向達魁借借銀錢種種乖謬著從重發往黑龍江充當苦差解任工部員外郎宗室耆英於伊子慶錫在朝陽門外違例設立馬撥並不阻止復令遞送信件實屬悖謬著即革職圈禁半年仍罰養贍錢糧六箇月解任道政司參議慶賢於伊兄慶錫差令官弁來家伺候紮營違例容留並給該弁銀物殊屬不合著交部議處○諭軍機大臣等前因沈祖懋奏賊入夥縣聲言欲犯休甯諭令何桂清撥兵援應力杜內竄茲覽何桂清奏報漁亭失利道員徐榮督戰陣亡該逆雖未越過休甯有欲分竄屯溪之信徹郡賊氛日偏勦辦更形棘手且此次

接仗實因微勇先潰以致逆匪與土匪乘機勾結愈肆猖獗未知該府縣兩年以來所謂設防者安在實堪痛恨見在巖鎮有恩蔭等駐紮七里頭一帶有魁齡等堵截當乘賊匪未越休甯之先扼其來路方不至旁竄屯溪等處並飛飭赴徽之知府石景芬接辦防務督率向榮前派之周天受江長貴等所帶川兵及該撫續派之陳貴華等見有兵勇隨時確探合力進剿勿令深入內犯以固浙省藩籬徽州素稱富饒兼有險隘可守該地方官既不嚴督紳富實行團練亦不豫籌濟餉言守則專恃客兵聞警則盡行遷徙以完善之地任賊來去自如該撫所稱必須主客同心方能濟事固屬實情已諭令怡良和春福濟嚴飭該府縣等將練勇籌餉事宜實心辦理不得專恃鄉省濟兵濟餉何柱清仍當不分畛域力圖援應其聯絡團練勸輸徵納錢漕等事仍一面責令李純鄧瀛安速經理如該府縣仍前玩泄並紳士等不肯協同籌辦但顧身家即著從嚴參辦將此由六百里加緊諭令知之○諭徽郡為南路要隘疊經諭令該地方官會同紳士舉辦團練如果平日辦事妥善何至賊鋒甫至即行潰散可見該地方官於防剿事宜並未悉心經理微甯紳富亦未能實心出力保衛鄉閭專恃浙省及江南大營分撥之兵藉資堵禦見在賊勢猖獗浙省既不能多撥兵勇屢次代籌糧餉即江南大營官兵亦勢難多撥怡良福濟均有地方之責著即嚴飭該管道府州縣及紳士等激發天良團勇集貨協力堵禦如有因循不振貽誤地方者即著從嚴參辦和春福濟攻剿廬州賊匪前已踏毀賊營附城合圍即日諒可克復此時徽郡情形萬分喫重和春等務當悉心籌畫設法援應不得以南北隔絕勢難兼顧為詞自圖諉卸前據王茂蔭奏請飭已革江西巡撫張芾前往微甯一路籌辦團練防堵事務等語著和春等酌量情形奏明辦理將此由六百里加緊各諭令知之○諭楊需奏賊匪大股上竄連日進攻情形並扼要截擊一摺覽奏實深憤急該督自賊由黃梅回竄節節退避迨賊竄漢鎮復株守德安屢次諭令迅速進攻而月餘以來毫無布置所派兵勇遇賊輒潰以致該逆窺我虛實紛紛上竄該督遷延貽誤罪無可辭此時逆賊欲窺伺襄陽該郡北接河南儻稍有疏虞致逆賊句結豫省土匪肆行猖獗為害愈烈該督見馳赴隨州一帶意在迎頭邀截但賊勢剽疾所稱派兵於山徑埋伏截剿亦恐不足深恃且賊情詭譎往往避實擊虛德安雖輕於襄陽楊昌泗收集之兵勇是否足資堵禦楊需惟當確探賊蹤就見有兵勇酌量調度以遏賊鋒斷不可任賊蔓延所調四川兵勇已諭令樂斌迅速派赴楚北並諭札拉芬帶兵由潼關前往該督務即飛速迎提再高唐裁撤川勇已據崇恩奏派楊熙等管帶資遣回籍該督亦可酌量截留以厚兵力前據官文奏襄河南北兩岸擊賊下竄荊州情形如果稍緩亦可分撥兵勇與楊需會合進剿逆匪大股上竄則漢陽漢口賊巢自必空虛陶恩培亦當督飭胡林翼李孟羣水陸諸軍乘勢進剿儘能得手即可分投追擊使該逆首尾不能相顧辦較易為力楊需督兵剿賊既不能杜賊回竄若再令該逆擾及襄陽朕惟執法從事決不寬貸所有見在賊情著該督等迅速馳奏以慰懸繫將此由六百里加緊各諭令知之○諭前因逆匪回竄湖北占踞漢口漢陽等處疊經諭令楊需等厚集兵勇分投攻剿本日據楊需奏進攻漢陽官兵傷亡甚多本月十三等日有賊匪數千竄至漢川並竄新溝地方其兇悍之賊分道由漢川應城等處小路

上竄儻直達襄陽該郡恐爲所襲等語見在楊需由隨州一帶迎頭截擊如上竄之賊徑犯襄陽該郡兵勇爲數無多恐難抵禦蓋
扎拉芬接奉此旨後即帶兵前赴湖北與楊需等會同攻剿探明襄樊等處何路緊急卽由何路進攻以剿爲防該將軍務當確切
偵探相機進剿毋稍遲延並著將帶兵啟程日期及探報楚省見在情形先行由驛具奏將此由六百里加緊諭令知之○諭本日
已諭令扎拉芬帶防守潼關官兵赴湖北襄陽一帶接剿所有楚陝毗連要隘應如何嚴密設防之處並著載齡確探賊蹤相機調
度毋稍延誤將此由六百里諭令知之○諭楚北賊匪由應城所屬西竄擊獲賊眾有該逆悉索兇悍之黨意圖徑犯襄陽欲與豫
匪勾結等語胡林翼李孟羣等水陸各軍向在沌口一帶楊需派楊昌泗防守德安自帶兵勇馳赴隨州意恐該匪由應城間道竄
出安陸天門之上爲迎前截遏之計是襄陽十分喫重該處地接河南平曠無險楊需等所帶兵勇屢屢潰散果能遏逆氣尙無
把握而德安北邇三關各屬上年曾遭蹂躪城空地瘠卽楊昌泗兵力亦單恐未能抵禦英桂昨奏已飭南陽府會同在防將備堵
守此時河南邊界毗連襄陽德安兩郡地方較前喫緊該撫前派邱聯恩移師紮營信陽州之西雙河居中調度原爲控制三關策
應南陽起見著卽嚴飭該鎮將等將南路邊防嚴密布置一面偵探賊蹤隨時援應勿令逆匪北犯英桂近在陳州更應探明何路
緊急馳往堵剿不得稍存大意致有疏虞將此由六百里加緊諭令知之○于安徽陣亡道員徐榮榮祭世職○調四川兵勇各一
千名赴湖北剿賊○已未諭內閣慧成奏糧臺大員不應越分保薦並密陳托明阿忠介勇敢公正不阿爲緩急可倚之良臣等語
托明阿係朕特簡統帥豈有不知其人何待慧成保奏至所稱托明阿保薦多而參劾少請朕加以策勉則更爲全才尤屬膽大慧
成係革職自斃之員止應聽候該大員差委乃敢妄加評議竟以監軍自居有乖體制謬妄已極至糧臺藩臬大員原准奏事遇有
本營軍餉事宜及特旨交辦事件豈能一律會銜具奏卽間有保奏隨員之家是否允准朕自有權衡何待該革員曉曉瑣瑣慧成
著傳旨申飭○諭軍機大臣等英桂奏楚北逆氛復熾豫省邊防喫緊一摺逆賊占踞漢陽等處官軍疊次進剿未能得手該逆由
應城上竄逼近南陽豫省素多捻匪儻逆匪北來句結貽患非輕該撫見已由陳州馳赴信陽相機布置惟豫省兵勇疊經調赴正
陽六安並以各屬土匪滋事紛紛調撥見在邊防萬分喫緊在防官兵過於單弱自應迅派重兵前往遏賊北竄著恪格林沁於所
帶官兵及勝保前存兵丁內挑選馬步兵三四千名派委得力大員統帶星馳赴河南交英桂調遣毋得稍涉延緩至調撥以後
大營兵力或恐不敷東省官兵有得力可用者卽著歸併大營協剿如東省官兵可以徑赴河南亦著斟酌辦理總期一律精銳毋
許稍有老弱致滋貽誤該官兵啟程日期並著迅速馳奏馮官屯餘匪無多豈容任其久踞十數日來未接奏報實深焦念著恪格
林沁等督飭兵勇迅速進攻務將該匪卽日悉數殲除俾南賊聞風靡落不至再圖北竄將此由六百里加緊諭令恪格林沁並諭
令德勒克色楞西凌阿崇恩知之○諭本日據英桂奏楚北逆氛復熾見飭南路加意戒備等語該逆由應城上竄非西犯襄陽卽
北竄南陽楚豫交界防堵萬分喫緊邱聯恩雖見駐信陽所帶之兵僅有七百餘名各路防兵亦皆單弱本日已諭恪格林沁等於

大營內挑選精兵三四千名派委大員管帶並速馳赴豫省聽候英桂調遣矣該撫偵探賊蹤何路喫重即飛催帶兵大員馳往何路策應斷勿令賊匪竄入豫境句結蔓延惟北兵抵豫尙需時日英桂見起信陽其各路防兵有可移緩就急之處或添募壯勇激勵鄉團務當安速布置加意堵截不可專待北兵致誤事機其德安失守之信是否屬實仍著確探速奏所請接濟經費已飭令兵部迅速籌議矣將此由六百里加緊諭令知之○予湖北陣亡荊州副都統賈陞祭葬世職○庚申和春福濟奏查署宿州知州郭世亨曾任蒙亳地方於情形自必周知福濟履任之初和春亦統兵來皖沿途採訪察看年餘郭世亨緝捕之長究不及撫綏之善宿民因其慈祥愷悌服頰深較之在蒙亳時尤著循聲至願毫勦辦捻匪固關緊要知府陸希湜不避艱險駐毫籌防疊有斬擒寶能勝任前此袁甲三奏請以郭世亨王啟秀二員分別開缺委署事前本未會商拜摺後方行咨照及奉旨飭令與臣等妥議伊函稱如意見相同即會銜否則單銜具奏等公同函覆以宿州係南北關鍵郭世亨素得民心藉資捍衛不可驟離詎袁甲三堅執前言單銜覆奏並將臣等不肯更易之詞全行抹煞止以前後稱美浮言濫瀆聖聽等如隨聲附和見好同僚下無以對黔黎上無以酬高厚查知州王啟秀在嶺止能幫辦未可獨當一面再四籌思更易則彼此無益仍舊則官民俱安其潁州協勦仍應派張家駒前往會同陸希湜勦辦至袁甲三此次來函堅持已見百折不回等無從會銜又奏袁甲三統帶兵勇以來從不自請撥餉過者動輒截留用款亦不咨報藩司顯有不實不盡查各州縣雇募防勇每日制錢百餘臨淮距賊尙遠事同一例乃袁甲三竟照大營征勇日給一錢五分以此冒銷私肥囊橐無怪道路之口閨傳其油篋藏銀派勇送陳州本籍半途遇盜言者稱快信任劣員候補同知李安中妄陳鹽務設卡巡河擾害閭閻強勒小戶捐輸敲骨吸髓以致民間怨恨等受恩深重不敢不據實密陳上諭內閣前因袁甲三奏請將安徽署宿州知州郭世亨開缺專辦蒙亳等處捻匪並請以補用直隸州知州王啟秀接署宿州知州朕以地方公事應由該撫覈辦批令會同和春福濟具奏嗣據袁甲三奏稱和春等函令單銜入奏茲據和春等奏袁甲三接奉批摺後仍堅持已見無從會銜並稱宿州地方緊要請留熟手接辦無庸更易以期官民相安自係實在情形所有郭世亨王啟秀開缺接署之處著無庸議各省辦理防勦大員遇有官吏廉能出眾者原准保奏貪污不職者亦許糾參惟於升補委署總應會商地方大吏豈容擅自更調袁甲三經朕屢次批諭輒敢固執不遵又敢飾詞具奏以遂其專擅之私實屬大負委任都察院左副都御史袁甲三著先行交部嚴加議處即著來京候旨至所參袁甲三擅截餘銀冒銷肥己等情著和春福濟確切查明據實具奏○諭軍機大臣等和春福濟奏知州未可更調並請飭臨淮前派兵勇仍駐亳州各摺月陸希湜於穎毫一帶勦匪事宜既據該提督等察看實能勝任即著責成該府會同張家駒認真勦辦其郭世亨王啟秀二員已明降諭旨毋庸更調以資熟手張家駒所帶兵勇係由臨淮派赴亳州見在該處既有捻匪劫奪礙位甚至文武均各受傷此項兵勇著即留於亳州務將此股捻匪悉數殲除免致蔓延句結臨淮控制全河爲南北要衝雖據該提督等聲稱距賊尙遠而滁州全椒等處路徑紛岐前年逆賊長驅北

犯實因臨淮無人扼守所致見在袁甲三已交部嚴加議處飭令來京其所帶兵勇斷不可竟行裁撤著和春等酌委得力大員前往接替毋得稍涉大意廬州賊情既形窮蹙亟應趕圖克復俾大兵得以分路披剿毋再延緩另片所參袁甲三舉錯乖方各情如浮文兵勇口糧及油簍賊銀寄回原籍等款是否確有實據著和春等確切查明據實具奏再前據軍機大臣議覆禮部侍郎杜翻奏裁汰冗兵一摺內稱各省徵調官兵未必盡皆精銳應由各省督撫及帶兵大員於徵調之初到營之後認真簡閱裁汰疲弱等語自爲撙節軍餉起見和春等所帶兵勇已閱年餘有無應行淘汰之處著照所議嚴查妥辦原摺鈔給閱看將此由六百里諭令知之○辛酉諭內閣前據慧成奏糧臺大員越分保薦有礙大體等語朕因糧臺藩臬大員遇有闕涉本營軍餉事宜原准奏事慧成係革職之員不應越分言事且有評隲統帥大員之語當經降旨申飭本日據托明阿等奏稱藩司文煜接辦糧臺保奏李樹穀有意討好與慧成適相符合顯係該革員從中怙憑此種詭譎伎倆難逃朕鑒托明阿身為統帥若文煜所保不公卽當早行參奏何以遲至數月之久始行入告又稱文煜於沙頭案內奉旨准保各員係藩司專摺奏請不敢妄參未議隱約其詞殊失大臣進言之體托明阿陳金綬雷以誠均著交部議處文煜保舉李樹穀旋經雷以誠奏參該員製造軍械草率取巧業經降旨革職可見所保不實文煜著一併交部議處糧臺大員原准奏事惟自糧臺移設揚州與距大營較遠者不同嗣後文煜遇有舉劾糧臺各員著與托明阿會銜具奏此次沙頭案內准保人員係屬勦賊出力更非糧臺可比著托明阿查覈彙奏該大臣等當此軍務孔亟之時務須一秉公忠於事有濟毋得各執己見致干重咎○僧格林沁等奏逆匪竄至馮官屯占踞且等因該逆猝死抵拒兵勇難於偏近將運到大礮四面安設向內轟擊村內房屋皆被擊塌該逆狡悍異常因房屋不能棲止在村內掘挖土濠盤旋三匝可由地下一通行卽於溝內掘窖潛藏以避礮火圍濠之外復挖小孔逆匪伏於地下向外瞭視俟我軍逼近鳥槍可及之處卽向上開槍是以日日進攻兵勇皆有傷士卒未能得手伏思此股逆匪止數百人見被重兵圍困竟不能迅速滅事訊據投出之人供稱村內糧米充勿逆匪足數日用_臣等展轉籌度擬用水灌或可奏功因馮官屯外舊有河形可以引水當經委員詳細履勘溯查來源據稟馮官屯旁舊有漢河可通徒駭河若由上河廳三孔橋挑開引放運河之水始能灌入惟挑築築壩處所均應妥爲修理以免泛濫旁洩等情見已移咨東河總督山東巡撫設法辦理如水勢暢旺馮官屯雖不能淹沒而周圍濠內必可滿溢該逆旣難潛匿必拌命出鬪當可卽時掃蕩仍一面激勵兵勇趕緊進攻斷不敢藉候引水稍涉遷延見在該逆每夜出巢竄探李開芳時親向義勇等巧言引誘以冀要結眾心俱被各勇槍礮擊回 上諭軍機大臣等該大臣見擬由上河廳三孔橋挑開引放運河以水灌賊此計未免迂緩且恐辦理稍不周妥或有泛濫旁洩之虞轉使該逆有險可恃該大臣務當斟酌妥善一面迅速辦理仍一面設法進攻毋令負隅久踞逆賊詭譎多端慣於勾結此次義勇雖將該逆擊回仍當隨時稽查好細毋令潛相煽惑以致窺我虛實將此由六百里加緊諭知僧格林沁並諭德勒克色楞西凌阿崇恩知之○托明阿等奏定擬軍流人犯張懋德等被賊勒送禮物實因懼禍圖

全並非甘心路賊情願指贖罪得旨見在賊氛正熾懲勸最宜分明該商等既肯贖賊何不捐贖保衛鄉閭免死發遣已屬從寬所奏著不准行○以已革刑部右侍郎基溥爲太僕寺卿○王戍諭內閣王茂蔭奏請暫緩臨幸御園一摺見在並未傳旨於何日幸圓明園不知該侍郎聞自何人當令軍機大臣傳問王茂蔭堅稱得自傳聞未能指實殊屬非是在廷諸臣陳奏事件如果確有見聞朕心虛衷採納若以道路傳聞率行入奏殊失進言之體王茂蔭身任大員不當以無據之詞登請奏贖著交部議處原摺擲還○是月緩徵福建雲霄等二十七廳州縣暨羅溪縣丞所屬被擾地方額賦安徽亳州等十九州縣被災被賊地方額賦並屯坐各衛丁漕銀米有差

咸豐東華錄四十六

三月癸亥朔祀 先農 親耕藉田○閩浙總督王懿德奏閩省商茶擬請設關徵收下戶部速議尋議奏閩省崇安等州縣爲產

茶盛旺之區自閩省暫開海禁運道便捷各商赴閩愈多所請附省扼要處所及畝連粵東浙江等處分設關卡徵收茶稅應請准

其照辦專款存儲三月奏報一次聽候部撥試辦一二年後奏明定額永遠遵行從之○甲子諭內閣葉名琛柏貴奏海豐縣城被

匪攻陷旋經收復一摺上年閏七月間廣東賊匪攻陷海豐縣城經署陸豐縣知縣陳景略等帶兵往剿在平岡口等處屢次斃賊

一千三百餘名收復縣城嗣賊匪糾眾復徧縣城經護礮石鎮總兵何芳等督飭員弁分路進剿斃賊無數生擒鍾阿夏等二十三

名將橫山庵等處匪鄉盡行焚燬收復長沙礮臺署通判許鈞身等分往太平剿捕亦斃匪三百餘名其餘匪門礮臺亦經署都司蔡

先攀等會同紳士克復各路匪巢俱已一律焚毀仍著該督等嚴飭文武員弁搜捕淨盡毋留餘孽○諭葉名琛柏貴奏番禺縣屬

河面匪船闖閩省河疊經擊退復勝一摺廣東省河之南番禺縣屬沙灣交塘等司一帶河面匪船滋擾經葉名琛等派令守備黃

彬等帶勇堵剿該匪復敢駕船三百餘隻駛進大石柵口欲圖襲我勇船黃彬及水師遊擊曾琪等分投擊毀賊船二十餘隻斃匪

八百餘名剿辦尙爲得手仍著葉名琛等督飭將弁兵勇趕緊剿除淨盡毋使蔓延在事出力人員准其擇九保奏候朕施恩○諭

向榮奏截剿分竄高資賊匪蕩平賊壘一摺瓜州賊黨於二月初九日由鮎魚套夾江竄至高資一帶經余萬清虎嵩林兩面分剿

擊殺賊目一人並斃賊百餘人該匪復於初十日沿江築壘我軍奮勇殺入賊陣斬賊無算立將賊寨二營踏平敗匪竄至句容縣

高家邊復經向榮派總兵德安前往攔截將賊營衝出之騎馬紅衣賊首砍落馬下餘賊慌敗官兵直逼賊濠虎嵩林等由東路攻

至東方橋斃賊多人二十日賊分五股由北面撲營並從江邊另股鈔出劉開泰親督兵勇砍倒大黃旗數桿追殺賊匪百餘人生

擒六名其鮎魚套口賊簿高資港內賊划亦經我軍連日拆毀並贏沈賊船七隻著向榮飭令余萬清乘勝攻克鎮江郡城並令虎

嵩林等實力會剿毋令他竄○諭前據刑部議覆王慶雲奏發遣新疆官犯准其捐輸改發內地當降旨令查明原案情節奏明請

旨原以發遣官犯情節輕重不同若概令犯罪較重之員紛紛捐請寬典徒邀尙復成何政體茲據載齡奏請停止捐改內地章程

一摺所奏甚是。所有發遣官犯捐改內地章穉著即行停止。○向榮奏：二月初四日探有賊踞南陵之牛角井糾合六里丁之賊共四五百人來犯涇邑。遊擊楊瑞乾帶勇從旁衝入，將賊隊截爲兩段，殺賊頗多。先派理伏義勇，並將賊踞之戴家墟焚燬。該逆驚潰，散回六里丁。涇太已無匪蹤。十三日連接浙江撫臣何桂清兩函，我軍在漁亭堵剿失利。初三日都司許上達奮往直前，力戰陣亡。該逆竄至休甯，有分擾屯溪之信。請撥勁兵赴徽，並由威坪地方援堵，以扼入浙之路。查該逆垂涎蘇浙，曾屢犯東壩黃池。被我兵挫敗。今既竄擾徽州，逼近浙中，則東南全局皆震。且係大營糧臺後路，尤關緊要。當即飛檄楊瑞乾帶領義勇七百五十名，由甯國繞赴浙省威坪，會同各軍堵紮。要衝再由浙出勦徽境之賊。並於金陵撥兵五百名交都司馬永清管帶，由蘇入浙聽候。撫臣何桂清調遣因思革任巡撫許乃鈞兩載在營，頗知賊情。又係浙人，明於該省地利業令星馳赴浙，與何桂清籌商堵剿機宜。至都司許上達力戰陣亡，殊堪憫惜。相應請旨飭部從優議卹。又奏：正緒摺開續接浙江撫臣何桂清函稱，徽州已於十三日失陷。此時浙江倍加緊急。已檄令鄧紹夏添帶楚兵五百名，由黃池兼程赴浙。飛咨浙撫即將各路防勦兵勇併歸鄧紹夏統帶，以專責成。上諭軍機大臣等：逆匪久欲窺伺蘇浙，見既竄擾徽州，逼近浙省，於東南大局關繫緊要。何桂清前派石景芬等帶勇馳往，此時當已抵徽。向榮見飭楊瑞乾帶領義勇繞赴浙省威坪，會同堵剿。並於金陵抽撥川兵交馬永清管帶，由蘇入浙復令鄧紹夏添帶楚兵由黃池赴浙，統帶各路兵勇，自可與浙省合力救援。徽郡該郡爲浙江門戶，著飭鄧紹夏迅速馳往扼截，勿稍延緩。許乃鈞准其前赴浙江，與何桂清會籌防勦事宜。至金陵兵勇抽撥較多，怡良著仍駐常州扼守。蘇杭前路徽州距蘇尚遠，該督此時毋庸即行回省。仍一面嚴防金陵鎮江南竄之賊，一面多設偵探察看情形，緩急再行酌量進止。吉爾杭阿雖在向榮軍營，亦可與怡良督飭在省藩臬大員嚴查好細，以杜句結，不可稍存大意。徽州賊勢及浙省見在如何布置情形，著何桂清隨時奏報，以慰懸繫。將此由六百里加緊各諭令知之。○諭葉名琛等奏省城北路殲賊殆盡，西路勦賊獲勝，並番禺海豐等處均獲勝仗，惠來竄出之賊亦經官軍截殺。廣東勦捕事宜似有頭緒。惟所奏情形向係十一月以前，距今又逾數月，各屬匪徒想可漸次掃除。而此次摺內未據提及肇慶韶州潮州等處作何勦辦，朕心實深懸繫。著穆特恩葉名琛柏貴迅即乘勝攻勦，盡殲醜類，並將各路軍情詳細入奏。其附近江西湖南一帶，是否尚有匪蹤，亦著隨時確探奏聞，以慰殷念。本日據王懿德奏潮州等處道路已通，所有調撥赴粵之精兵一千名，見已飭令臺灣鎮總兵呂大陞統領改由平和陸路前進。已於二月十一日全數啟程。其前次慶寅管帶官兵亦於上年十一月由海道赴援。著該將軍等飛速迎提，以期厚積兵力，早殄逆氛。見在英德清遠等縣驛路尚有阻梗，仍須設法疏通，勿再延緩。將此由六百里諭令知之。○予江南陣亡道員劉廷銓等廣東陣亡知縣羅才綸等祭葬世職。○乙丑 上奉 皇貴太妃啟鑿謁西陵詣 皇貴太妃行宮問安至還宮皆如之。○楊霽奏：二月二十五日接藩司胡林翼鹽法道常恩稟，二十三十六等日漢陽之賊至沌口，攻撲胡林翼營盤，均經擊退。十七日早賊匪分股攻撲省城漢口賊船渡江攻撲塘角省城兵勇水陸堵禦，自辰至

未盡戰四時之久眾寡不敵賊匪乘勢入城常恩於城外白沙洲督兵力戰胡林翼督兵擊退前後撲營之賊見省城火起水師戰船全行上駛不能渡江撫臣陶恩培於十七日午刻與護臬司署武昌府知府多山遊擊陶德壽同時力戰陣亡臣聞信之下痛憤交加竊念自廣濟挫敗以來原慮省城兵力太單賊匪剽悍思急攻漢陽以援省城因調兵不能驟集致省城失守實屬罪無可這相應請旨將臣從重治罪至胡林翼王國才石清吉等兵勇約計雖有六七千人惟糧餉缺乏急須接濟且賊眾兵單金口南岸恐難駐紮若湖南可以就近撥餉金口尙能紮營則相機進剿若不能紮營則設法渡江上扼漢川等處以固荆襄門戶總期阻遏狂氛勿令紛竄官文載增奏據布政使胡林翼稟與國通山嘉魚各匪於十七日攻陷省城撫臣陶恩培等遇害該司因奉檄在漢陽縣屬沌口防勦隔江三十餘里無船可渡李孟羣彭玉麟各紮京山合兵遏賊上竄並籌商水陸進剿之計統計水陸各軍尙有萬餘待餉甚殷請速撥兵餉以保全大局等情臣聞信之餘五內焦急當飭署荆宜施道莊受祺湊撥銀七千兩錢四千串先行接濟但所需甚鉅惟有仰懇 天恩迅催山西陝西甘肅四川各省應撥餉銀星夜馳解來楚又據京山天門鍾祥沔陽等州縣稟稱漢川賊眾竄入府河由長江埤於二月十六日攻陷應城縣分股欲撲德安等語查應城爲適中扼要之地與安陸襄陽荊州各相距不遠且民船多藏府河之中儻爲賊擄難保不分擾上游前已派魁玉等扼要堵剿而上游兵力實形單薄應請旨飭湖南撫臣迅撥水陸各軍由岳州分路應援並籌餉先爲接濟再請迅派川兵來荆由外江內湖並下與督臣兵勇會合兜擊庶不難剿洗賊蹤又奏楚北省城不可無大員鎮定見值軍務事繁刻不容緩臣等與督臣又各處一隅勢難兼顧所遺湖北巡撫員缺請旨迅賜簡放以資鎮定惟到任需時所有巡撫關防可否即令藩司胡林翼暫爲代理 上諭內閣官文楊需奏武昌失守撫臣殉難各等語覽奏殊深憤懣逆匪上竄漢口武昌省城兵力本單嗣因胡林翼李孟羣等水陸赴援屢有勝仗方冀危城克保乃該逆遽由興國通山沌口塘角等處四面攻撲官兵竟日鏖戰眾寡不敵以致省城失陷巡撫捐軀楊需以總督統領全軍自退至漢口後屢次進攻毫無把握此次省城被賊環撲又不能迅速救援即按律懲辦亦屬罪無可這惟見在江北一帶防勦需人該督業已革職著仍暫留本任戴罪自效如再不將回竄逆匪一律肅清迅圖克復致令逆蹤擾及上游或久踞武漢卽行從重治罪決不寬貸臣論僧格林沁等奏勒辦逆匪情形一摺馮官屯賊匪於二十八日潛行出巢向西南奔撲我軍槍礮擊回未容竄出次日該逆開挖地道撲上礮臺雖經該大臣等督兵奮擊仍退回巢惟勇兵陣亡三十餘名受傷者甚多實屬疏於防範僧格林沁著交部議處臣諭副都統德興阿奏革員擅用關防一摺慧成係革職人員在揚州軍營效力乃敢與欽差大臣托明阿等會銜行文並擅用辦理防勦事務閩浙總督關防調遣帶兵大員謬妄已極慧成及伊子晉康著托明阿一併飭令回旗毋庸再畱軍營臣僧格林沁等奏二月二十八日子刻該逆潛行出巢向西南奔撲因我兵防守嚴密不能免脫詎料該逆暗施詭謀在賊巢內向西南礮臺邊開挖地道於二十九日夜間將礮臺前矮牆轟塌卽曰此處衝出昏夜倉卒兵勇一時潰亂幸礮臺以外尙有圍濠臣聞警馳至調集兵勇

截剿始將該逆擊退仍潛入溝內依前死拒伏思此股逆匪人數無多臣握帶重兵不能迅速賊功已屬有負倚畀今有此挫失尤屬調度無方應請旨將臣僧格林沁交部議處至挑挖引河業已開工其引河兩旁遇有低窪處先行培土築堤以免旁洩漫沒民田計期十日內外即可竣工上諭軍機大臣等馮官屯賊匪狡悍異常雖人數無多尚思竄逸若不實力進攻遷延時日該逆轉得乘我之懈肆其猖獗何日始能蕙事僧格林沁前奏馮官屯屋宇均經轟坍該逆僅恃空窖潛藏以避礮火豈尚容其久延殘喘著僧格林沁等督飭兵勇一面奮力圍攻一面嚴密防範斷不准任其竄出再致滋擾另行奏遵旨挑選馬步兵四千名派副都統常亮等統帶赴豫等語見在河南南陽信陽等處在在喫緊此項馬步兵一俟行抵豫省尚應速籌進剿著僧格林沁等飛催該副都統等星夜統帶前進毋許稍有逗畱致滋貽誤將此由六百里加緊諭知僧格林沁並諭令德勒克色楞西凌阿崇恩知之○諭楊需奏餉需緊急請飭四川山西陝西迅即撥解等語湖北賊氛復熾武昌失守漢川應城天門等處均被滋擾勦辦萬分喫緊楊需營中之餉早已不敷據稱川陝報解餉數僅銀四萬五千兩爲數既少計日向遲若使接濟不及兵勇枵腹荷戈殊爲可慮著樂斌王慶雲載齡無論何款迅速籌撥解赴楊需大營以應急需楊需兵勇屢經挫失前飭樂斌撥兵勇各一千名派顏朝斌陳有才管帶赴楚即著飛催前進此外有無可撥官兵並著悉心籌畫添派前往以助攻剿至陝西前次撥解楚省大錢見在該省未能一律通行無以濟軍營之急此次撥調湖北軍餉毋庸搭解大錢軍務緊要該督撫等接奉此旨迅速遵辦毋稍遷延將此由六百里各諭令知之○諭官文楊需奏此次武昌失陷雖因兵力饑疲奸匪內應究因漢川進攻之兵不能得力以致省城孤立無援見在胡林翼等兵勇尚在金口南岸李孟羣等師船尙紮京山或不難攻復武昌斷賊南竄湖南之路而楊昌泗劉富成之兵遇賊卽退萬分怯懦雖楊需續派兵勇前往爲數僅止二千若再有挫失則德安迤北可以徑達信陽德安迤西又爲徑趨襄陽之路逆勢蔓延豈堪復問官文所請酌派湖南官兵已諭駱秉章酌辦能否抽撥尙難豫計卽使稍有接濟亦於北岸防剿無裨前諭僧格林沁籌撥之兵本日據奏已挑選馬隊一千五百名步隊二千五百名卽日啟程業經諭令英桂徑行催赴襄襄一帶楊需務當妥爲調遣或力扼襄陽或進攻德安總以迅速剿辦爲要不得再有疏失儻荆襄稍有蹉跌或該逆聲東擊西乘我兵力全注襄陽又從德安竄撲豫境朕必將楊需從重治罪決不能再邀寬典也前調四川兵勇各一千名本日復經降旨飭催此項兵勇先從荆州經過官文本轄兵勇如尙敷布置不可率行截畱俟續有川兵到時再行分撥會剿此時楚省賊勢南北蔓延幾至無從著手官文等分辦合辦同係一事大江以北朕統責之楊需荆州防守事宜卽責成官文布置南岸攻剿事宜卽責成胡林翼安辦其如何互相援應迅速肅清之處該將軍等務當熟計兼權亦不能自分畛域也將此由六百里加緊各諭令知之○諭據楊需奏胡林翼王國才石清吉等兵勇約計雖有六七千人惟糧餉缺乏川陝各餉尙未解到若湖南就近可以接濟金口尙能駐紮則相機進剿若不能駐紮則設法渡江上扼漢川等處以固荆襄門戶等語著駱秉章悉心籌畫湖南兵勇儻有可籌撥卽當派得力將弁管帶

赴下游速為援應所需糧餉就近設法接濟如或該省兵勇不敷抽撥而胡林翼等兵勇又復上扼漢川則金口一帶勢難兼顧恐逆匪乘虛上駛該省與湖北毗連在在可慮尤宜於南北交界處所水陸要隘加意嚴防毋得稍有疏懈將此由六百里加緊諭令知之○以胡林翼署湖北巡撫文倭為湖北布政使李孟羣署湖北按察使由廣西平樂○予湖北殉難巡撫陶恩培祭葬世職諡文節署武昌府知府多山遊擊陶得壽祭葬世職○免經過地方額賦十分之三○丙寅諭內閣勞崇光惠慶奏勦辦龍州匪徒將

賊官首要各犯殲擒殆盡一摺上年六月間遊匪陸成泰等在太平府屬龍州廳地方滋擾拒捕戕官復敢糾約匪黨疊次抗拒經甯明州知州劉作肅士思州黃政業等率同兵練分投痛剿將匪首陸成泰等及戕官各犯悉數殲擒並將夥匪殲除殆盡辦理尙屬妥協在事出力文武兵練著該撫等酌量保奏毋許冒濫其在逃零匪仍著嚴飭地方文武實力投拏務期淨絕根株毋畱餘孽

○諭勞崇光惠慶奏梧州艇匪被勦竄遁並藤縣被擾旋經克復一摺廣西艇匪梁培友等攻撲梧州府城自上年閏七月初五日至八月十二等日疊經署梧州府知府陳瑞芝等督兵殲斃多名該匪退泊三角菁分遣匪黨竄赴藤縣知縣羅登莪等登陴守禦因眾寡不敵被匪闖入二十四日藤縣匪徒馮六並廣東另股匪徒關亞巨等先後到梧分水陸五路進撲郡城陳瑞芝等督帶兵勇分投截勦該匪等仍退泊三角菁二十八日按察使張敬修帶兵抵梧於三角菁一帶沿岸擊先斃匪四百餘名擊沈賊船

二十餘隻九月初四至十月初八等日該匪疊由長洲白馬廟黃埠頭趨水關等處登岸向城攻撲張敬修等內外夾擊奪獲賊船四十六隻隨用大船裝載沙石將三角菁江面填塞賊勢日蹙猶於十二等日悉眾來撲十六日夜官軍乘風縱火燒斃匪徒不計其數餘匪東竄兵勇跟蹤追擊竄匪於雁龍江口等處屯踞與藤縣城內匪徒互為援應經水陸兵勇會合勦捕生擒匪首莫木一圭公潘張斯文養歐亞洗葉大骨志等五名當將縣城收復零匪翻山奔竄此股艇匪黨多勢悍見經官軍勦除殆盡仍著勞崇光

等飭屬將首匪梁培友等嚴密搜拏並將敗竄餘匪悉數殲擒毋任一名漏網在事出力員弁並著勞崇光等擇尤保奏毋許冒濫○予廣西被戕州同廣壽等祭葬世職○丁卯諭內閣葉名琛柏貴奏克復佛山一摺廣東匪徒自上年六月占據佛山鎮恣意橫行經葉名琛派委員弁紳士水陸攻勦大小二十餘戰省城股匪屢被創擊羅道沈棟輝於十一月初三日偵知該匪有放火延燒街市情事即飛稟該督撫添調兵勇戰船督帶進剿該道馳抵佛山逆匪築臺列礮釘椿激水抵死抗拒復於文昌廟前兩沙屯聚多賊以為犄角初六初七日官軍陸路連獲大勝將賊營次第踏平初八至初十等日官軍水陸進攻復沈毀賊船無數嗣後軍

威愈振沈棟輝隨即四面分布官軍同時進搗所向披靡統計一月內擊殺賊匪一萬九千七百餘名斬獲首級三千二十餘顆生擒五百十七名其焚溺轟斃捆解遣散者不計其數佛山全鎮一律肅清沈棟輝應雙知機督勦而月即將負隅巨匪全股蕩平實堪嘉尚著葉名琛等即行據實保奏候朕施恩其餘員弁紳士同心協力無戰不捷亦屬著有微勞著一併查明分別酌保無遺無

濫仍著該地方文武將勦殘餘匪一體認真搜緝以期淨絕根株○賞看守各行宮弁兵半月錢糧○予廣東殉難道員任為琦等

濫仍著該地方文武將勦殘餘匪一體認真搜緝以期淨絕根株○賞看守各行宮弁兵半月錢糧○予廣東殉難道員任為琦等

祭糞世職○戊辰 上謁秦陵 秦東陵 昌陵 昌西陵 幕陵是日回鑾○辛未 上幸 皇貴太妃還宮○壬申諭內閣

果振械蔣壽遠等奏兜剿竄逃賊匪殲斃黔西首逆一招此股賊徒經官兵疊加剿洗猶敢糾集餘黨合力死拒我軍追捕奮力殲擒並將逆首王三札巴殲斃辦理尙爲得手惟首逆楊瀾仍未就獲該撫等務當督飭兵練搜捕務獲無任漏網並將竄逃餘匪一律搜除淨盡以絕根株所有在事出力文武員弁人等著擇尤保奏候朕施恩○諭軍機大臣等見在逆匪意圖上竄湖北荆襄一帶情形緊要官文駐紮荆州兵力未免單弱楊需一軍又屢經挫失自武昌復陷胡林翼李孟羣等所帶水陸兵勇亦不免勢孤殊爲可慮黃宗漢前奏由河南陝西赴川計此時將次抵任著偵探荆州一帶情形如賊蹤尙未掃除卽與樂斌商酌督帶兵勇馳赴夔巫一帶相機進剿其四川總督事務仍著樂斌署理如探知楊需各軍剿辦得手逆匪不至上竄該督卽可無庸前往仍飭前調兵勇迅速赴楚毋稍延誤樂斌黃宗漢務當斟酌緩急妥籌辦理不得稍分畛域將此由六百里各諭令知之○癸酉諭內閣何桂清奏請將廢弛防務之員革職等語安徽甯池太廣道兼署徽州府印務恩禧於徽州軍務既不實心辦理復扣餉項積欠勇糧以致兵勇不能用命實屬貽誤地方殊堪痛恨恩禧著先行革職仍著何桂清查明該員下落據實具奏○何桂清奏逆賊裹脅各路土匪分踞徽州歙縣黟縣休甯四城一聞大兵雲集卽有著黃西竄之意石景芬在霞井軍營先密派勇目許庭桂等潛入郡城探知賊情擬於二十三日潛師夜遁飛報回營石景芬卽由霞井移營進紮大阜派令勇首夏寶慶等管帶槍勇爲第一隊直抵東門又令勇首李恆淞等管帶台勇爲第二隊由護嘉興協副將魁齡督帶直抵北門其第三隊由石景芬親督直抵南門從紫陽橋一帶連環施放槍礮長驅直入勢如破竹該逆聞風喪膽馬隊飛竄西門我軍步追十餘里生擒賊目二十餘名土匪數十人一併軍前正法其餘轟斃死者不計其數該逆由屯溪一路竄往休甯是夜不及窮追收隊入城查勘郡邑兩城各衙署尙存石景芬卽將各勇分派各城門紮營嚴守臣查此次進剿徽州逆匪浙江將士勇於用命旬日間克復郡邑兩城實爲至幸鄧紹良統帶兵勇指日抵徽卽會合攻克黟休二城以冀早紓宸廑至金華府知府石景芬於大兵未集以前深入賊巢功成一夕實屬奮勇有爲徽郡善後事宜卽責成該員一手經理合無仰懇天恩先予超擢以作士氣上諭逆匪攻陷徽郡並將歙縣城池占踞經何桂清派知府石景芬督飭勇目夏寶慶李恆淞並副將魁齡等帶領槍勇台勇分隊攻打東南北三門逆眾聞風喪膽逃竄西門我軍追殺十餘里生擒賊目二十餘名土匪數十人卽正法其轟斃死者不計其數立將徽州歙縣收復見在何榮所派鄧紹良各軍將次雲集著何桂清飭鄧紹良督率乘勝進剿克復休甯黟縣二城以清徽境石景芬善記名以道員用並賞加鹽運使銜以示鼓勵○諭軍機大臣等何桂清奏克復徽州歙縣兩城並添兵勇進攻黟休二城各摺片見在賊眾蟻聚休甯二城必須乘此聲威迅圖克復此時鄧紹良統帶兵勇諒已馳抵徽郡所有各路帶兵官弁均歸鄧紹良調遣以專責成該撫卽督飭該員卽日進剿休甯賊黨並酌留兵勇防守徽歙毋令乘虛回竄再致蔓延其徽浙各路軍務及一切支應事宜卽飭臬司妥籌實實力督辦勿

稍貽誤將此由六百里加緊諭令知之○甲戌諭軍機大臣等托明阿等奏籌防浦口兼顧北岸上下游全局一摺金陵逆首既有欲由浦口北竄並詐襲各岸營盤及裝載柴火圖燒師船之意則自揚城以西儀徵六合浦口至江浦等處皆須節節嚴防而瓜州鎮賊匪欲撲揚州三汊河樸樹灣一帶蓄謀亦非一日此時薩炳阿管帶之馬步官兵見已抵揚泊承陞所統挖呂戰船已至焦山吉爾杭阿亦督率上海得勝兵勇攻剿鎮賊自應南北進兵水陸並舉以陸路分攻瓜鎮以水軍攻取金山使該逆三路不能兼顧方爲上策浦口緊對金陵本爲賊蹤往來之地江浦後路復可暗襲浦口武慶等兵力甚單托明阿所稱抽撥精兵僅止四百餘名是否足資堵禦江北屏障之區布置不容罅漏仍須責令武慶溫紹原等實力扼守其浦口以上梁山以下烏江一路本有恩錫張光第在彼駐紮亦可與該司道聯絡聲勢藉免後顧之慮惟橫江賊鍊賊韓日久未斷終恐衝突爲患托明阿等與向榮雖各統各軍實同辦一事著卽公同嚴督上下水師設法會剿先毀賊鍊遇有兩岸接仗迅速駛赴江岸協擊以牽賊勢向榮前奏李德麟吳全美等紅單局艇各船俱有損傷刻下當已修整卽應趕緊進剿不得以敵風穴靈日事延閣其五龍山江面雖設有闌鍊木樁而江漲日寬風濤撞激究未可恃至瓜州賊匪巢不出卽築就長圍不過杜其出擾總宜亟籌戰取以覆賊巢吉爾杭阿早至鎮江亦著飭令余萬清等剋期攻克毋再遷延俾上下游南北岸漸就殲除方無他慮將此由六百里加緊各諭令知之○諭曾國藩塔齊布奏軍餉不支請飭閩浙二省籌銀接濟等語見在曾國藩等駐兵江西省城因湖北武漢一帶爲賊占踞糧道已斷四川湖南之餉不能運解前往其水路各軍兵勇口食僅恃江西一省捐項不敷支放必須鄰省通融接濟方足以資攻剿著王懿德何桂清於該省無論何款項下各籌銀二萬兩派委委員解赴曾國藩等軍營應用該督等務迅速籌解毋誤要需將此由六百里各諭令知之○曾國藩塔齊布奏等就湖北安徽江西三省全局論之陸路須有勁兵四支水路須有勁兵兩支乃足以資剿辦北岸自蕪水廣濟黃梅以達太湖宿松是爲內一路自漢口黃州蘄州田鎮武穴濱江而下以至小池口望江縣是爲外一路南岸自九江以上興國通山崇陽武甯等屬皆土匪勾結粵賊之淵藪是爲西一路自湖口以下東流建德饒池徽甯四府皆逆匪覬覦浙江之要途是爲東一路北岸之黃梅太湖前臨大江後枕滌岳一山屏蔽舒蘆爲該逆必爭之地南岸池州雖係瘠區而大通鎮殷家匯水陸交衝南窺徽嚴東障蕪湖亦爲該逆必爭之地故南岸以東一路爲最要而西路次之北岸以內一路爲最要而濱江一路次之四路者須陸兵四支缺一不可者也水師自武昌以達湖口爲上一支自小孤山逾東西梁山以達太平采石爲下一支乃與紅單船相接兩支各自成軍分段肅清庶免首尾不顧腹背受敵之患亦缺一不可者也今等水軍陷入鄱湖之船百餘號回救鄱首之船百餘號業已分爲上下兩支似有因禍得福之機然內湖一軍國藩來江整理造船添勇無難就緒回鄂一軍以被風擊壞之船當將士疲勞之後與漢口新竄之賊相持等又不能分身前往統領日夜懸念每聞春風怒號則寸心欲碎見賊帆上駛則繞屋徬徨不知李孟羣等果能添置小船復振軍威否等止此一軍欲分爲兩支則立形單弱欲常聚一處而事勢所迫有不

得不分者又不敢過於持重致失機宜謹就目前的急務度_臣等力所能辦者分條布置爲我 皇上陳之一見在賊竄饒州樂平分擾景德鎮祁門徽州等處所謂東路者也爲江浙轉餉之路亦爲奏報入京之路關係大局非輕_臣等分派羅澤南帶湘勇三千由江西省城繞至湖東攻剿饒州之賊又與撫_臣陳啟邁合募平江勇四千同剿東路俟饒郡克復卽引兵直下或趨景德鎮或由建德進攻池州北路有重兵使安慶之賊震動則浙江之患可以少紓_臣等前摺所謂賊攻我之所必救我亦攻賊之所必救也一俾賊石達聞等堅守九江及對岸之小池口_臣塔齊布一軍仍留五千人穩駐潯郡伺隙攻城使賊不敢全數上竄武漢亦不敢奔突他處惟前此攻圍潯城至萬五千人之多兩次派胡林翼王國才回援鄂省者六千餘人此次派羅澤南馳剿饒州者又三千人在潯官軍過形單薄俟籌添兵勇續行具奏一正月二十八日_臣曾國藩派水師船六十餘號至康山地方駐紮外防大江之賊駛船入湖內防饒州之賊擄船出湖其餘弁勇尚在江省修船日內修完大隊進紮南康青山一帶其湖口賊卡浮橋既堅鋪以木板填以土石人力難以速破俟春江漲盛水陸併攻卽當力破浮橋衝出大江一_臣曾國藩來江已逾月餘日內船隻修齊卽駐紮鄱陽湖內四處游弋西近塔齊布九江一軍聲息常通東近羅澤南饒州一軍調度亦便兩軍相隔已在六百里外全賴水師在湖中接遞信息庶可彼此相應如東路攻剿得手能至彭澤東流等處將來水師出江乃得所依護而無孤懸之患以上四條就目前的急務_臣等力所能行者籌商辦理是否有當伏乞 皇上訓示施行又奏論中原之大勢則江北重於江南論此賊力爭長江堅守廬州之情亦必須梅太舒桐一帶有大支堅強可恃之兵然後內可以克廬郡外可以清江面此時江北縱不能籌備兩軍亦不可不添置一軍伏查鳳陽之臨淮關由壽州光固以達於麻城黃州程途不過八百餘里副都御史真甲三在臨淮駐紮年餘壽州相隔咫尺光固亦其桑梓之地若令該副都御史招募二處之勇練成五千勁旅由麻城出黃州之背不過十餘日可到入地既熟道途無梗出其不意邀而擊之則斬黃各屬可復皖鄂兩省之氣可通相應請旨飭下袁甲三招募壽州光固之勇由麻城迅出黃州以全江北大局又奏_臣等一軍曾經奏請江西湖南四川三省勸捐助餉今賊匪占踞漢口_臣軍遠隔下游糧道已斷四川湖南之餉不能運解來營卽去歲奏准陝西協餉下欠十二萬兩亦不能解到僅恃江西一省捐項_臣等水陸萬餘人殊不足以資接濟相應請旨飭下江西撫_臣陳啟邁在於四年漕折項下每月酌撥銀兩准川陝之款卽可撥歸江北一軍應用惟性上游西通川陝北通河南來源尚廣_臣軍僅取給於江西來源太隘勢難久支不揣冒昧請旨飭下福建督_臣王懿德浙江撫_臣何桂清每月各籌銀二萬兩解赴_臣軍俾兵勇口食不匱免生他虞 上諭據奏楚皖江西三省全局陸路須分兵四支水路須分兵兩支於勦辦機宜頗爲明晰惟據楊甯等奏武漢復遭蹂躪賊勢益張該侍郎等水陸兩軍已成孤立之勢見在賊竄饒州樂平分擾景德等處羅澤南已帶勇進剿著卽飭該員趕緊克復郡城以次掃除昨據何桂清奏賊破徽州已經收復見擾休黟等處羅澤南如勦除饒州府賊匪卽可相機前進攻剿池州安慶之賊塔齊布圍攻九江亦未便撤動仍當添募兵勇奮力攻擊以率制逆匪使不得肆行奔突

曾國藩師船並江西所造戰船尤須設法將湖口賊卡浮橋併力攻毀駛出大江與塔齊布在九江會合以圖克復袁甲三見已革
職飭令來京臨淮兵勇本不甚多既不能撥赴麻城黃州若募勇訓練尙恐緩不濟急本日已諭令和春等酌量辦理其能否添撥
進剿之處尙未可定總俟山東軍務告竣不但兵力可分並可派員前往於江北一帶妥爲布置至曾國藩等所需餉銀已諭閩浙
兩省照數籌解但恐尙須時日著陳啟邁於四年漕折項下每月酌撥銀兩以濟要需四川湖南等處餉銀仍當設法催提俾資接
濟將此由六百里加緊各諭令知之○諭前因袁甲三交部嚴議飭令來京其所帶兵勇當諭令和春等酌委得力大員前往尙未
奏殊深懸繫臨淮控制全淮爲南北兩路要衝防守機宜斷不可稍涉大意本日據托明阿等奏浦口六合等處拳獲奸細有金
陵逆首擬由水陸攻襲浦口大股北竄等供托明阿等攻剿瓜州賊匪正當喫緊勢難多撥兵勇赴浦口防禦武慶等兵力甚單設
有疏虞關繫甚鉅浦口與皖省接壤其烏江一帶前官軍屢次攻毀賊壘卽著嚴飭廬鳳道張光第等實力防禦與武慶等浦口之
師聲勢聯絡以杜賊匪北伺之意參將劉玉豹駐紮全椒屬之官渡亦可就近策應毋任稍有疏懈又據曾國藩等奏稱臨淮關
由壽州光固以達麻城程途甚邇若令袁甲三由臨淮招募壽光二處練勇五千由麻城出黃州之背併力邀擊則斬黃可復皖鄂
兩省便可聲息相通等語該侍郎所籌自因江北一帶並無得力勁旅故擬添此一軍以資進剿惟臨淮防務亦甚緊要此時能否
分兵前進著和春等酌度情形妥籌辦理廬州賊匪既已窮蹙官軍長圍已合何以日久尙未得手總須早復廬郡大兵便足敷分
撥務卽迅圖克復毋再遲延將此由六百里加緊諭令知之○乙亥諭軍機大臣等和春福濟奏請飭怡良撥兵勇一二千名交張
芾統帶赴徽甯一路督辦防剿等語張芾係發往軍營差委之員該提督等請明降諭旨令其馳赴徽甯調度各軍於事恐爲無益
見在鄧紹良已行過浙境各路赴徽援剿兵勇均歸調遣昨復諭知何桂清督飭該員迅圖剿辦若再戶派統率之人轉致事權不
一張著著仍遵前旨文和春等差遣委用是否令其卽赴徽甯隨同攻剿並著何桂清酌量辦理至上海凱撤之師本係勇多兵少
見已分赴金陵鎮江怡良駐紮常州帶兵亦屬無多徽郡兵勇經向榮何桂清派往者已有數千毋庸怡良等再事籌撥至廬州軍
營卽使差委之人亦何至專保廢員始收指臂之助福濟所請令黃恩彤赴廬州差委之處著不准行將此由六百里加緊各諭令
知之○和春福濟奏奉 上諭酌委得力大員接替袁甲三查見辦團練侍衛多慧幹練老成機宜熟悉已飭該員尅日前往臨淮
接替所有袁甲三原帶文武將弁悉歸節制以一事權報聞○丙子諭內閣怡良奏查明鹽船積弊並土匪私設鹽卡授書票法一
摺准北綱鹽行銷皖豫二省日形壅滯據怡良查明因各商販運經由阜陽霍邱固始三縣交界處所有船戶等肆行舞弊致虧客
本又信陽羅山一處爲行銷最暢之區光山係必由之路聞該境私設鹽卡盤踞需索以致往來客販畏葸不前自應亟加整頓以
肅澁政著英桂福濟嚴飭各該地方官凡准鹽經過處所如船戶人等有敢行盜賣並水手攪和沙土等弊一經查出卽行拏究毋
得稍分畛域至土匪私設鹽卡尤屬大干法紀並著該撫等密速查拏從重懲辦斷不准稍涉疏縱以除積弊而裕國課○諭軍機

大臣等前此僧格林沁故撤高唐南面之兵原爲誘賊離巢迫易於得手乃自竄馮官屯以後又已月餘該逆匪抵死堅匿而官軍竟無計可破前月二十九日之賊甚至傷亡兵勇遺失礮位似此情形轉不如任其坐困高唐猶得以糧盡制其死命該大臣所用水攻之法見已竣工惟聞該屯地勢微高逆匪在濠內添土築壘巧爲抵禦是水勢雖形暢旺不過灌滿四面濠溝而止該逆在屯內仍能暗施詭計即見在掘濠耳灌自下而上亦難得力如果此舉再無成效該大臣又計將安出以萬餘兵勇圍數百之賊百計經營迄無把握朕心實深焦灼著僧格林沁即將見在水勢若何攻剿能否得手及水攻儘不可恃應作何設法之處迅速具奏總期剋日蕙事以慰懸望至撥赴河南之馬步隊官兵四千名業經降旨令赴湖北迎剿河南兵力空虛防堵倍形喫緊前此諭知該大臣等如東省官兵可期得力卽酌量歸併大營嗣據覆奏大營兵勇足敷圍剿是山東官兵見尙可以抽調著僧格林沁會同崇恩卽行選派三四千名派委得力將弁管帶前往河南交英桂調遣專備該省防堵之用仍咨明英桂沿途安速迎提毋任稽留延緩將此由六百里諭知僧格林沁並諭德勒克色楞西凌阿崇恩知之○諭前因襄樊緊急曾諭令扎拉芬帶兵迅赴湖北與楊需等會同攻剿本日據載齡奏請飭扎拉芬駐紮棗陽扼守由楚入陝要隘等語該將軍帶兵赴楚原爲探明賊蹤以剿爲防見在該逆上竄尙無定向若令扎拉芬專駐棗陽轉成株守務須確探賊蹤若棗陽緊急卽會同楊需實力截剿儘該逆紛竄他處卽當帶兵迅出賊前迎頭截擊切勿止顧一隅致誤事機將此由六百里加緊諭令知之○以基溥爲左副都御史由太僕寺調遷○辛巳諭內閣托明阿等奏浦口各營獲勝焦山水師攻獲賊船並向榮奏師船斬鍊攻出上游各一摺三月初七日已革總兵王鵬年會同吳全美李德麟督率各船分南北岸進至七里洲沙嘴攻該逆礮臺礮隄吳全美由南岸鈔到轟沈賊船二十餘隻時九洲亦出賊船七八十隻李德麟自北岸兜截斃賊無數武慶亦督帶陸路官兵由三板棹直搗九洲洲賊船王鵬年復將護鍊賊船擊溺多隻某常春周希濂分領浦口局艇從兩岸前來會合各勇由七里洲九洲夾攻接應紅單挖罟各船全幫駛出上游將賊船擊沈焚毀自辰至申鏖戰五時斬鍊兩道焚擊賊船三百數十隻斃賊無數焦山水師總兵周士法等亦同日進攻金山賊營時江面賊船隱動北固山賊隄亦從內開礮我軍一面迎擊賊隄一面汧流上攻賊窳賊勢不支落水淹斃者無算著托明阿向榮等督飭各營水陸會剿克復瓜州鎮江並著將江面上下游賊船一律剿除此次出力員弁兵勇等准托明阿向榮擇尤保奏以示鼓勵○諭何柱清奏克復休甯縣城一摺徽州賊匪自我軍克復郡城後竄往休甯二月二十四日石景芬飭令勇目夏寶慶等帶隊進逼休城署休甯縣知縣唐寶昌密約紳士吳益文等帶領練勇同時進剿於初更時一擁入城賊匪驚竄殺斃甚多縣丞張奇炳署徽州左營守備汪連陞先後趕至隨同追擊三十餘里卽將縣城克復著何柱清卽行督飭石景芬等迅速進剿肅清徽境毋稍遲延在事出力紳勇著何柱清覈實酌保朕施恩○僧格林沁等奏本月初四日引河工竣初五日將圖濠灌滿隨復向北浸淹惟馮官屯地勢微高見雖將水浸入賊濠二道深已三四尺不等濠外低窪處所亦有一二尺尙未能浸灌逆匪地窖臣等展轉思維若啟隄

水勢過大恐引河內漫溢有礙民田若先將引河兩岸培厚加高又恐工程浩大不敢輕舉惟有趕造水車用人力掣灌方為萬全見已趕緊製造以資應用且該逆詭謀惟恃挖掘地雷前於放水次日見西北溝內漂出藥袋藥簍甚多自係該逆暗放地雷之所此時地已溼透斷難施此伎倆至前次撥赴豫省馬步隊官兵業於初二日分起前進初八日全數啟程又奉到諭旨著會同崇恩選派山東官兵三四千名赴豫查見在東省兵力單薄惟豫省防堵尤關緊要與崇恩悉心籌度見擬選派官兵一千名東勇一千名即日馳赴河南聽候調遣上諭軍機大臣等本日據英桂奏前派馬隊一千五百名於荆襄一帶地勢不甚相宜請截留改撥等語此項官兵已據信格林沁奏派副都統常亮等帶赴信陽防次業經啟程即可毋庸折回改撥其續調山東兵勇共一千名務即挑選精壯步隊飛催前進毋稍遲誤馮官屯賊匪為數無多我兵圍剿月餘尚未殄滅實深焦灼本日據奏水攻之法尚須趕造水車用人力掣灌不免又稽時日總須著力攻剿勿徒恃水攻方為妥善將此由六百里加緊諭知信格林沁並諭德勒克色楞西凌阿崇恩知之○諭英桂奏馳抵信陽添兵扼守關隘以資攻剿本日據信格林沁奏選派兵勇共二千名前往河南交英桂調遣以防賊匪北竄俟此項官兵抵豫後或可與常亮所帶馬隊官兵互相調換以期得力見在賊踞德安南汝光商均屬接壤英桂已抵信陽即可就近調度邱聯恩見赴三關防堵著飭令該總兵加意嚴防以固邊圉泥台敗竄捻匪雖經擒斬多名並須嚴飭該道府等淨絕根株勿令餘孽復萌致滋後患楚北軍情並著英桂隨時確探迅速具奏將此由六百里加緊諭令知之○諭托明阿等奏浦口水陸各營大獲勝仗一摺並據向榮奏師船斬鍊攻出上游亟籌調兵由陸路接應並請調馬隊助剿各摺片紅單各船自駛入大江總未能痛剿賊船此次水陸進攻斬斷鍊兩道焚毀賊船三百餘隻水師初次得力正可趁此聲勢南北約會各攻瓜鎮兩城並嚴飭水師將弁剿除金山賊營以孤賊勢逆匪分踞瓜州鎮江全恃江面賊船往來接應此時賊船既攻出上游即當節節進扼使南北兩岸之賊不能互相勾結則剿辦自易為力據向榮奏稱兩梁山尚有賊設關鍊礮船林立蕪湖太平逆黨尚多必須亟籌陸路一軍沿江接應自係實在情形著即設法布置該逆見欲窺伺黃池甯國鄧紹良即可進攻蕪湖以圖與舟師會合剿除梁山賊匪該逆經此次懲創尚恐另生詭計以牽掣我軍托明阿向榮仍當督飭水陸各軍一面進剿一面嚴密設防杜其奔竄向榮調吉林馬隊一千名來江助剿如金陵大營需兵緊急可先於托明阿所帶馬隊官兵內商酌數百名渡江協剿該大臣等雖分勦南北兩岸之賊實則其辦一事務當統籌全局以期迅掃賊氛將此由六百里加緊各諭令知之○英桂奏聞亳州擒匪滋擾當飭張維翰於皖豫交界扼要處所會督合辦據該道稟二月二十三日帶兵抵亳與陸希湜分路兜剿會同參將全喜等由淠河集至泥臺店二十四日黎明該匪蠡擁而至各營槍礮環施斃賊百數十名餘匪四散竄匿二十五日泥臺敗竄之賊適遇於麻種集擒斬尤多該道即由耿黃寺觀音堂至劉家集一路追捕又獲捻匪十七名復經夏邑鹿邑等縣地方官先後擊獲潰竄捻匪三十九名惟首犯尚未弋獲仍飭該道等嚴密搜拏以清萌孽報聞○予安徽殉難知縣廉驥元等祭葬世職○癸未諭內閣惠親

王恭親王奕訢奏錢法亟宜整頓酌擬章程五條呈覽一摺戶工兩局並鑄錢局數鑄當十大錢凡官收民用均應恪遵功令一律行使近以私錢過多人懷疑銀市奸商並敢將大錢與制錢各定價值任意輕軒兵餉民食攸關自應亟籌整頓著照惠親王等所請嗣後順天直隸山東山西等省徵收地丁錢糧凡零星小戶及銀鈔尾零完納錢文者俱准呈交銅鐵當十大錢並鉛鐵制錢如官吏書差勒索挑剔不肯收納准該民人控告突辦其餘較遠省分以次遞推遵照辦理其民間買賣交易儻敢聽信奸商把持任意阻撓初犯者枷號示眾再犯者發極邊煙瘴充軍遇赦不赦其有故意刁難致大錢買物之價昂於制錢者亦即照阻撓律治罪至私鑄錢文本干例禁尤宜嚴加懲治嗣後凡私鑄大錢人犯拏獲到官除將該犯按新定律例訊置重典外仍將該犯家產入官並准軍民人等首告誣告者仍反坐所有一切詳細章程即照所擬著巡防王大臣步軍統領順天府五城出示曉諭並著近京各直省督撫等一體遵行務期家喻戶曉藉導壅滯至錢文之鼓鑄間有未善則民間不知寶貴並著戶工兩部錢法堂侍郎督率該監督等將兩局當十大錢加工鼓鑄務使分兩均齊制作精良以重國法而裕國用○諭軍機大臣等惠親王恭親王奕訢奏請飭催鐵斤等語前經惠親王等會同戶部奏准令山西省每歲採辦生鐵一千二百萬斤解京交局先將一半生鐵六百萬斤於三月內掃數解到以濟鼓鑄本日據王慶雲奏催起解片鐵一百萬斤見在局中存鐵無多若多延時日必致有悞要需著王慶雲督率藩司飭令該委員妥速籌辦除見解一百萬斤外再將生鐵五百萬斤星速解京其餘一半並著及早採買源源續解至鐵價每斤三十文既經招商承辦以後不得再議加增以歸覈實其鐵斤起解日期即著咨報鐵錢局查覈毋得稍有遲誤將此諭令知之○惠親王恭親王奕訢等面奉諭旨惇親王奕誼著降為貝勒革去一切差使加恩仍著戴用紅絨結頂服用金黃蟒袍在內廷行走上書房讀書○河南巡撫英桂奏德安賊匪東竄見飭弁兵出關堵剿得旨覽奏萬勝焦急以後情形迅速馳奏汝能隨時相機調遣勿稍拘泥方安○于陣亡遊擊明恆祭葬世職○甲申諭內閣步軍統領衙門奏軍營撤回官兵攜帶幼孩查辦情形一摺軍營凱撤官兵沿途攜帶良民子女本有治罪專條此次該衙門查出官兵所帶幼孩均係被脅難民投營後隨從來京與沿途攜帶良民子女者不同既據該官兵交出自應妥為安置惟此項幼孩或故鄉被擾或親屬無存若概行遞回原籍恐其中無家可歸者轉致流離失所著在京各旗營衙門一體查明除見在交出三名外凡有攜回幼孩均飭該官兵等按名呈出如有親屬可投及力能自還本籍者著即准其回籍毋庸官為遞送不願回籍者准其在京自謀生理○恭親王奕訢面奉諭旨貝勒奕誼著仍服四圍龍補服內廷王公班次著在載銳之次王公班次著在奕訢之前○乙酉諭內閣多羅貝勒奕誼第一子著命名載灃○諭多羅貝勒載中著改名載治○諭軍機大臣等御史宗稷辰奏大江南北設卡抽釐收捐太雜出入總數毫無稽覈並有常鎮散勇與江南土豪在江邊距圍山關相近地方樹幟攔船肆行盤踞與營卡比列莫辨公私請將釐捐事宜責成江督經理等語江南省捐釐濟餉雷以誠拊議於前文煜接辦於後原期集餉安民兩無窒礙其暢通一帶設立各卡均有章程可稽豈容任意添設若如所奏官

收捐項已極繁瑣復有匪徒冒名勒索擾累行旅更屬大千法紀著托明阿等確切訪查如有奸徒把持漁利即著從嚴拏究以靖地方至該御史所奏百里之間設卡過多應行歸併刪減之處善酌量情形奏明辦理其所請責成江督稽覈及簡員管理事多窒礙著毋庸議至官軍發項未能按期支給如果抽釐事務辦理得宜所捐款項悉歸實用於軍餉亦有裨益該大臣等務當悉心妥辦毋得擾害閭閻徒使奸徒中飽而於軍餉仍無實濟原捐著鈔給閱看將此由四百里諭知托明阿向榮吉爾杭阿陳金綬雷以誠並傳諭文煜知之○丙戌諭軍機大臣等陳啟邁奏饒郡賊匪紛竄合力兜剿一摺竄擾饒州之賊意在窺伺廣信撫建等屬此次連竄樂平德興復掠撫民船攻撲石鎮街雖經立時剿退與安一帶亦有官兵防守已由黃柏塘小路突入弋陽境內該邑為浙江屏障又與江西省撫建二縣毗連賊勢紛竄腹地滋蔓堪虞況徽郡游匪雖據何桂清奏疊次收復徽歙休甯府縣三城餘黨尚聚夥縣浙省不免戒嚴若再令由廣信逸出與徽賊句結不但阻梗驛路更恐掣動蘇杭羅澤南所帶湘勇並新募平江練勇馳往會同林福祥合剿著即責令該道府等迅掃妖氛饒州尚有股匪亦著陳啟邁飭令都司吳錫光就近渡湖以次攻復都昌直抵饒郡與羅澤南分路夾擊使該逆首尾不能相顧期辦方有把握若令其四處紛突更肆猖獗大局豈復可問該撫因徽浙防堵緊要將遊擊常海官帶浙兵六百名派往常山玉山一帶探明何處緊急即由何處應援自應如此不分畛域督團藩一軍所需軍餉已飭部速議仍著陳啟邁竭力設法接濟毋使匱乏將此由六百里諭令知之○丁亥都察院奏據河南武生李景瑞等呈稱上年二月間逆匪蘇添幅等聚眾焚掠永城縣內並城西丈八集數十村屢經稟請剿捕前兩廣總督徐廣縉置若罔聞幸署太康縣知縣祝壇率商邱柘城鹿邑鄒團破賊於裴橋殺賊千餘蘇添幅逃入亳州四月該匪句毫搶王大王柱等在蘇鹽店西賈莊肆搶五月又句毫搶數千竄永亳交界之耿黃寺均經祝壇集團擊退嗣祝壇因公西旋蘇添幅又句張落刑等萬餘人焚毀大王集等村鎮蔓延六十餘里徐廣縉始終不發一兵祝壇遣帶壯勇數千進剿賊始大懼因造報離之謠徐廣縉附和其說遂將祝壇調回賊勢從此益熾該匪紛竄天齊廟滄源集等處徐廣縉不得已始次會亭驛閏七月賊撲會亭驛徐廣縉聞賊來即走軍裝盡失殺掠之慘更不忍言從此任難民日日哭訴總以不可結讎為詞九月賊大聚於毫境張家集閭家集盧廟商境黃家界溝馬頭寺營郭等集恣意殺掠又西擾柘城老王集等村十月間道員張維翰帶兵剿辦鄉團協拾槍首多人十二月張落刑復糾眾數千人由亳州闖家集至商境界溝集四出焚掠與夏邑劉隄圍逆匪互相勾結皆在包河北岸竭力拒守奈統領無人眾心不一等語伏乞 皇上聖鑒 上諭軍機大臣等亳州逆匪蘇添幅在永城夏邑等處疊次搶掠該處民不堪命徐廣縉以戴罪大員專司勦捕何竟置若罔聞署太康縣祝壇督率商邱等縣鄉團勦辦得手何以遽令調回此案前經學政張之萬奏參曾諭令該撫迅即查奏迄今尚未覆奏該撫接奉此旨著督同藩臬兩司將該武生等呈內所控各節逐一嚴查如果徐廣縉畏葸避退以致閭閻慘遭荼毒即著嚴參治罪不得稍涉瞻徇其亳州歸德等處賊氛未靖著嚴飭張維翰率同地方文武及防堵員弁迅速籌辦務將匪黨悉數殲除毋

任貽誤地方原摺原呈均著鈔給閱看將此諭令知之○戊子諭軍機大臣等寄諭直隸總督桂良全慶文彩奏海運漕船被劫一摺據稱孫德茂等沙船裝載江浙漕糧米石並公項銀兩於二月二十五日行至山東黑水洋石島地方被艇匪搶劫銀米並有勒銀贖船情事已諭令山東江蘇各督撫嚴密防範並將疏防之登州鎮總兵田浩然摘頂示懲矣本年海運米船已到期未及十分之二隨後各船尚有數百餘隻並有隨帶公項銀兩為數甚多著該督卽飭天津鎮道率同地方文武員弁於附近口岸加意巡防儼有好徒溷迹乘間搶竊立即嚴拏懲辦毋稍疏虞將此諭令知之○諭前據怡良等奏浙省及象山一帶洋面間有擄蓬盜船游駛派令總兵葉萬清統帶師船於海運米船開行時往來護送並派副將侯學鳳駕船先赴天津迎護進口兼飭參將黃登第等出洋巡緝以利漕行見在該船等經過東省既有被劫之恐蘇省洋面匪徒難免聞風效尤海運漕糧關緊正供見在源源北上之時自應倍加慎重著怡良吉爾杭阿飭令葉萬清於江蘇浙江海運漕船開行時務須督飭兵船梭織往來妥速護送以期匪徒斂迹不敢窺伺至洋面盜船本不容聽其滋擾並著責成黃登第等親身出洋實力搜拏毋許稍有疏懈以免貽誤侯學鳳係該督等派令隨同頭起米船赴津何以該船戶等失事之時並未見該副將督兵救護並著怡良等查明據實具奏將此由六百里諭令知之○諭前據崇恩奏報海運防衛事宜聲明內洋口岸責成登州府汪承鏞親歷各島稽查彈壓外洋巡哨責成登州鎮田浩然親督師船節節迎護是該總兵卽應剋日出洋探明來船妥為防護乃據全慶文彩奏江蘇運船孫德茂浙江運船盛寶安均於二月二十五日在石島以南洋面被匪搶去銀米貨物江蘇運船宋源昌張協隆二號先被搶劫復於二十九日被賊劫入島內勒銀贖船且有裝豆衛船數十餘隻同被擄困等語覽奏殊堪駭異石島為榮城縣所屬地方商船往來必經之路卽無海運船隻亦應認真巡哨以安行旅況海運為天庾正供甫入東境卽被搶掠並未見有該省師船為之防護任令艇匪肆行無忌殊堪痛憾該總兵田浩然於所轄洋面漫無防範著先行摘去頂帶責令將洋面艇匪盡數搜剿不准稍事耽延儻此後續過海運漕船再有疏失朕必將該總兵從重治罪卽崇恩亦不能辭咎至石島池上煙臺俚島廟島等處均係海口要路並著崇恩嚴飭派出員弁實力搜捕其石島以南失事地方員弁並著查明參奏將此由六百里諭令知之○吉爾杭阿奏於二月初一日自上海啟程行抵蘇州得鎮江探報該逆分竄高資勢將內犯遂飭劉存厚會同余萬清虎嵩林等相機堵剿卽由常州改道馳赴丹陽知高資賊壘已為我兵掃蕩卽由丹陽句容而至金陵大營與向榮和衷籌議該逆注意蘇常必先截其內犯之路以固根本再絕其南北之援以圖進取二十八日折回丹徒鎮會同余萬清察看鎮江東南京峴山大營布置頗屬周密惟自京峴山東北至象山江濱尚多空際因與余萬清商定將空隙處所深挖濠溝取土築牆設法安礮以杜竄逸又會同余萬清渡江前赴焦山水營總兵泊承陞管帶挖營船十隻與總兵周士法等所帶艇師各船聯幫停泊於焦山北面擬俟象山牆溝工竣將泊承陞所帶挖營船移泊於焦山南面象山之下則南北兩岸下游皆可無虞至南面統帶潮勇之副將站住言語不通恐有扞格商之向榮余萬清添派熟悉潮勇性情

之遊擊饒永福會同管帶再將見駐甘棠橋之四川官兵移紮觀音山切近湖營藉圖鈐制其西路本甚空虚設被蔓延至馬陵榨樹岡一帶則丹陽可虞常州亦即震動 暫行屯紮榨樹岡勒定離城五里之九華山爲由鎮江至馬陵榨樹岡總徑虎嵩林劉存厚等統帶兵勇在九華山東北屯紮東制鎮城北窺金山爲隘扼拊背之計三月初十三等日瞭見瓜州賊船連檣渡江而南瓜鎮金山之賊分作數股傾巢而來另股逆匪奔上九華山北惟時劉存厚等皆已督兵出隊 帶領小隊在劉存厚營前山坡督戰將山梁之賊登時擊退花營艇師等船亦起舵攻擊北固山甘露寺磯隄以分其勢因南風過盛不能直抵金山賊仍分數股傾巢而來 與余萬清督兵分途圍襲斃賊不計其數滿擬四面合圍適大霧漫對面不能相見致大股仍被脫旒殊爲可惜見在會商向榮余萬清或先取金山或徑拔鎮城隨機進剿以副 聖慮報聞○已丑諭軍機大臣等和春等奏逆匪外援驟至官軍攻勦立破賊壘一摺我軍攻勦廬州四面合圍逆匪兩次來援均經擊敗乃安慶賊匪及金陵之賊於西南各處連築營壘意在分我兵勢經該提督等督兵攻勦斬賊甚眾舒城樂縣逆匪亦被我兵擊敗辦理尙屬得手此時廬州之賊勢孤援絕正可乘此機會督率各路兵勇奮力攻勦剋期收復其舒城等處並著嚴飭秦定三等營兵進攻無得日久遷延致該逆又圖句結另摺奏皖首兵餉支細請飭山東等省按月協濟已令戶部速議具奏見在高唐餘匪竄踞柱平縣馮官屯地方經大兵圍剿尙未掃除淨盡能否協濟尙未可定該提督等仍當於本省地方設法籌撥以濟軍食毋得專待他省之款致滋貽誤將此由六百里諭令知之○子安徽殉難同知胡子離吳廷香等祭葬世職吳廷香並建祠○辛卯諭內閣吳振械蔣蔚遠萬福奏逆首就殲官兵陸續凱撤一摺貴州逆匪楊鳳等經官軍疊次圍剿情勢窮蹙由羅斛地方竄蘆山搭漢山等處經參將閃雲等督兵堵截斃賊百數十名生擒九十餘名該匪復竄擾大塘並由都勻獨山等地方竄撲麻哈州城經護貴東道鹿不宗並署知州何鏡內外夾擊斃賊多名該匪復由平越獲安竄入餘慶縣屬之龍溪場署清江通判韓超雲南鹽法道王成璐等督率兵練四面兜圍於三月初七日分路齊進殺賊無數賊匪突圍敗逃官軍奮力追殺至石阡府屬之葛莊司河邊楊鳳先已渡河兵練梟水趕上立時殲斃並斃賊一三百名生擒一百餘名落水死者不計其數該逆楊鳳等聚眾倡亂擾害地方經四川雲南官兵會同貴州兵練悉力勦捕俾首逆就殲餘黨解散地方漸就肅清辦理尙無貽誤貴州巡撫蔣蔚遠著開復革職再任處分仍著將在逃零匪悉數殺除毋得稍畱餘孽其一切善後事宜並著飭各該地方官妥爲經理○諭軍機大臣等吳振械蔣蔚遠萬福奏官軍追勦賊匪陣斬首逆殲除匪黨地方漸就肅清一摺首逆楊鳳經官兵在石阡府地方殲斃並將匪黨疊次勦殺多名諒不至再有蔓延所有川滇兵丁自應酌量裁撤以節糜費其一切善後事宜並著該撫妥籌辦理至川兵隨營糧臺前經諭令蔣蔚遠派員督辦見在首逆業經伏誅貴州軍務將次告厥著照蔣蔚遠所請軍營兵餉仍畱川省委員支放其報銷各事宜並著責令該委員一手經理以歸畫一將此由六百里各諭令知之○諭王懿德奏派兵赴浙防剿一摺該督因聞徽州警信派令總兵饒廷選護參將王煜遊擊高士濬管帶閩兵一千名於三月初八

日啟程前赴嚴州扼剿計此時當可抵浙見在徽郡賊已敗竄浙江兵勇已進剿夥縣嚴州防務似可稍鬆而江西之賊由樂平德興擾及弋陽逼近廣信浙江衢州一帶較嚴郡更形喫重雖經王懿德另派官兵四百名前往河口等處仍恐兵力單弱此項赴嚴閩兵自應急援江西為要著何桂清斟酌情形妥為調遣如果徽郡尚須添兵即飭饒廷選帶兵前往會剿儻廣信賊情較緊即將該總兵所帶之兵調赴廣信並可與江西官兵合力進剿饒州總宜何處喫緊即從何處進兵毋得株守一隅再據御史宗稷辰奏黃巖縣六品職銜黃萬年曾剿漁山海寇出力其人頗有才略黃宗漢檄令募勇為遊擊王邦慶所阻等語著何桂清詳細查看如果實在可用即飭令帶勇隨剿亦可藉資驅策儻係有名無實亦毋庸率行收錄將此由六百里諭令知之○子禦賊被害主簿孔廣幹祭葬世職○是月豁免河南永城縣被擾地方額賦

咸豐東華錄四十七

夏四月癸巳朔山東巡撫崇恩奏石疊盜艇截劫浙江海運米石檄飭登州鎮設法按捕得信田浩然前在江南朕未聞其捕務若何見在登鎮是否勝任有無捏飾稟報身履屏弱等情著迅速飭查據實覆奏○甲午常粵祀 天於 團丘○乙未諭內閣何桂清奏遵查革員貽誤地方各情一摺已革安徽甯池太廣道兼署徽州府印務恩禧於賊匪竄擾徽州不能實力堵剿致府縣數城先後失陷實屬貽誤地方經學政沈祖懋於該郡失守後查恩禧尚無下落乃敢以由績溪關道往迎鄧紹良會剿等詞希圖掩飾並於原參扣留捐項積欠勇糧各情曉曉置辨更屬狡詐恩禧業經革職著即革問交何桂清嚴行審訊按律定擬具奏○諭何桂清奏克復婺源縣城徽境平靖一摺逆匪自休甯敗潰後由黟縣一帶糾同餘黨擄脅多人復竄陷婺源縣城鄧紹良石景芬接據探報各督率將弁拔營前進齊抵婺源縣境分投布置遊擊周天受等帶川兵進攻東門已革知縣唐寶昌等帶勇由陸路前進石景芬等由水路前進直逼北門該逆見我軍初到大隊齊出我軍奮力接仗自寅至辰鏖戰三時之久城中伏有練勇同時內應賊匪潰亂奔出官兵奮勇夾擊共撿斬五百餘名落水溺斃不計其數當將婺源縣城克復逆匪竄擾徽郡疊陷城池經鄧紹良等跟蹤合剿全股掃蕩剿辦尚屬迅速所有出力各員著何桂清覈實保奏○諭軍機大臣等何桂清奏克復婺源縣城徽州全境平靖一摺逆賊竄擾徽郡經官軍協力攻剿月餘以來將郡縣城池次第克復辦理尚為迅速此後防堵事宜自應合徽甯兩府通盤籌畫應如何派撥兵勇扼守要隘之處即著妥為布置至逆賊之以肆擾總由土匪潛為勾結此次不法匪徒亟宜密速按捕以淨根株並著何桂清諭令石景芬等勸諭該處紳士辦理保甲團練事宜內絕土匪之句通外杜賊匪之窺伺務期實力舉行毋得有名無實其餘一切善後章程均著隨時奏報廣德州捐輸前經該撫奏明照甯國府辦理該州逼近賊氛其如何辦理團練以期聯絡聲勢之處並著設法勸導以期周密江西省賊匪由樂平德興竄入弋陽浙省衢州府情形喫重該撫前後調派兵勇約共五六千名除留守徽州外當尚足敷防堵不至有內竄之虞所有閩省派出官兵一千名即著該撫遵照前旨飭令前赴廣信與江西官

兵合力攻剿無稍延誤將此由六百里諭令知之○諭前因江浙海運米船在東省洋面被劫曾諭令直隸江蘇山東各省撫嚴密防護本日據全慶文彩奏續到米船安穩抵津並據押運紳董稟報余山一帶破艇船三四隻遊駛洋面石島地方有艇船五六隻停泊島外並有官商各船被截島內又聞石島船匪於勒銀後揚帆南下等語又據怡良邵燦奏江浙海運新漕接續放洋並追捕余山洋面盜艇各指片見在海運米船源源北上其石島艇匪雖經遠颺難保不沿途爲害破艇三四隻據稱尙在洋面遊駛是余山一帶盜船盤踞仍恐未能淨盡著兩江漕運江蘇浙江各督撫飭令承辦各員詳諭放洋各船務須同幫行走彼此聲勢聯絡俾免疏失至本年蘇省水師大半調赴攻剿其巡洋護糧兵船不及往年十分之三勢難分赴山東洋面協同防護著崇恩仍遵前旨嚴飭田浩然並巡洋員弁實力防範不得因難匪遠颺稍形疏懈其石島地方艇匪截劫官商各船並著一體嚴拏以安行旅將此由六百里各諭令知之○以克復婺源縣城賞知府石景芬巴圖魯名號復鄧紹良提督銜餘升敘有差○丙申諭軍機大臣等向榮奏師船進剿疊獲勝仗一摺覽連日進仗情形各師船甚爲得力大軍沿江上剿必須兩岸陸兵接應該大臣已飭鄧紹良出勦江甯鎮三山營一帶復合張光第進築石磧橋以圖進扼烏江是南北兩岸官兵均可漸逼江岸與水軍聲勢聯絡此項師船自回攻九洲洲後總未遇有順風見在正值風利業已打過三山江口止宜有進無退如果因船少無援則兩岸調撥陸兵或從下游併力急攻均可分賊猖獗之勢著向榮吉爾杭阿安善接應務使師船節節上駛突過梁山以上方能逐漸進剿但師船愈上愈遠三山兩岸屯聚賊船轉在我船之下必須痛加勦洗庶免腹背受敵賊中所有江西遺失戰艇最爲利器儘該逆漸誥駕使不特爲紅單各船後路之患卽內河亦防其衝突總須設法掃除其餘賊船雖多便無足慮諒該大臣等亦所深悉也將此由六百里加緊各諭令知之○諭前因葉名琛奏請派總兵謝焜赴晉甯剿匪當以該總兵係帶船赴江南助剿之員著該督仍令統帶師船赴江或另派得力將弁統帶之處並著斟酌辦理未據葉名琛將開行日期奏報本日據向榮奏師船三月初七日斬斷下關賊鍊上駛後復疊獲勝仗表船亦損傷數隻見在三山江面賊船甚多並極堅利意欲於石磧橋一帶截我糧運勢甚猖獗我船爲數較少請催續調之廣東省紅單等船迅來江面助剿等語江南師船助辦賊匪正屬得手惟賊匪船隻極多且船礮甚爲堅利自應厚集兵力以期併力攻剿著葉名琛將前次奏明續雇之紅單船二十四隻並批苕等船隻剋日配齊弁兵器械並將兵勇口糧等措備齊全仍派令謝焜統帶迅速前赴江南助剿毋許再延儘謝焜以勦捕本省賊匪不能分身卽著遵照前旨另派得力將弁帶總期卽日開行毋誤勦辦並著將開行日期速行馳奏將此由六百里加緊諭令知之○諭四川學政何紹基奏川省詞訟拖延延辱士子等語原片內所指合江縣廩生李暄通賊一案又南溪縣廩生萬時恬被控謀叛一案是否實無左證抑或並無冤抑何以展轉耽延日久未結著黃宗漢確切訪查親提研訊據實具奏該學政所稱上司袒護屬員以致士風激成刁健等情是否實有此種風氣亦著查明具奏原片著鈔給閱看將此諭令知之○予福建殉節縣丞李彥清等祭葬世職○丁酉諭內閣何紹基奏練陳管見

一摺所陳十二條雜出不倫或本有成例或妄議更張窒礙居多未能按切時務惟皇史宸應灑掃潔清一條該處尊藏 列聖寶錄金匱莊嚴所稱數年前見有塵土堆積之處著該管衙門查看隨時拂拭以昭敬謹至國史臣工列傳雖乾隆年間曾奉 上諭列傳體例以人不由官而以後仍限以官階原以大臣列傳之外尚有儒林文苑循吏等傳苟其人事功品學卓卓可稱官秩雖卑亦無虞湮沒若如所奏三品以下補行立傳無論二百年來人數浩繁蒐羅難徧且必致憑史官之好惡以爲去取非所以昭傳信其請過奔競一條人品不齊卑謔彙錄入于例禁若謂兩書房清祕堂及各衙門京察優等人員多由昏暮營求信口譏評殊不足以昭公論至丁憂人員乾隆年間既有 諭旨不准主講書院自應永遠遵循若官員服闋尚未葬親即不准其服官我朝並無此例該員欲以魏晉之制施之今日九屬泥古鮮通學政無論官階悉與督撫平行惟年終有學政聲名之奏原係互相糾察並非遂爲統屬學政苟稍知自愛何至卑污要結何紹基身任學政而以此言入奏尤屬非是况欽差查辦事件理應慎密該學政以奏參各件閱不使知心懷不平亦屬私見又嘉慶年間 諭旨准合道員奏事係爲勤求民隱起見在亦並未不准道員奏事而該員等既無可敷陳亦不能強之陳奏至捐納知府州縣考試文章向來皆延幕友閱校將來去取仍歸學政無關得失其府縣兼管武營前經有人陳奏經部議駁著毋庸議各省駐防改試繙譯原係 皇考崇實黜浮造就就旗僕之意該駐防人等果能弓馬嫻熟清文通順不患無登進之路又添設繙譯翰林一途不爲不優何至指爲向隅並牽涉倭仁瑞常直似八旗駐防除此二人之外遂無人才實屬肆意妄言不知大體况當科場年分陳奏考試事宜尤屬違例何紹基著交部議處此外各條皆非學政分內之事亦非今日救時急務均著毋庸置議○戊戌諭軍機大臣等前因海運米船在東省洋面被劫並石島地方艇匪截劫官商各船疊經諭令崇嚴飭巡洋將弁實力查拏本日據匡源奏三月十二日有匪船五隻約三四百人在卽墨縣之金口擄去商船五隻勒銀回贖又於膠州地面開放大破擄船二隻復駛至青島地方開礮擊毀民房數處擄去水手數名截劫貨船一隻等語見在海運米船源源北上東省沿海各處水師員弁不知認真巡哨致匪船行劫層見疊出實屬不成事體著崇恩迅將該處將弁確切查明從嚴參辦又據片奏登州營遊擊羅朝輔於匪船誤陷淺沙之時託病推諉不即帶兵轟擊使匪船得以遠颺尤屬庸懦無能並著該撫一併查明據實參辦無稍徇隱原摺片均著鈔給閱看將此由五百里諭令知之○己亥諭內閣勞崇光惠慶奏知縣遇賊被戕見在查辦等語代理廣西永福縣知縣洪運昌因堵剿賊匪在所屬四季嶺地方猝被戕斃據永福縣紳士指稱爲臨桂團練所害而臨桂西鄉團總則稱賊匪假冒團練突將該縣衝殺各執一詞自應確切查明以憑拏辦著勞崇光卽飭該二縣文武迅將該員被害原委切實查報無任推諉其戕官正犯卽著趕緊查拏務獲盡法懲治以儆兇頑○諭勞崇光惠慶奏游匪戕官踞城經兵練會同楚省兵勇擊退一摺廣西恭城縣匪徒於正月十七日竄撲富川縣城署知縣濟昌登陴守禦因賊匪入眾致被闖入濟昌罵賊不屈被匪戕害旋經各路官兵團練合力圍剿並湖南候補同知王鑫等帶兵會剿至二月二十九日該匪潛行潰出經兵勇截殺

多名堵回茶城復被恭城團練殲斃五百餘名餘匪向灌陽逃竄廣西署富川縣事知州銜臨桂縣知縣濟昌平日能得民心因兵單力竭遇害殊堪憫側著交部從優議卹陣亡之富賀營千總秦德種並著交部議卹富川城守營把總毛色馨著先行革職其是否先期出城抑係臨時逃避著與不知下落之署典史宋履元訓導蔣農藻一併交勞崇光嚴查覈辦所有逃竄餘匪並著督飭兵勇實力按剿毋任延蔓○諭軍機大臣等本日據官文奏賊蹤不至西竄荆州地方安堵又據英桂奏賊復竄備德安河南邊防喫緊各一摺該逆自小河溪竄回武漢本未大受懲創其去而復來固在意計之中英桂所稱三月二十八日劉富成等接仗失利退至平林市地方事在官文發報以後此時江北情形不得謂賊鋒稍挫楊需逗留襄陽日久未據奏報軍情觀其咨會官文英桂之語總欲俟北兵全到方與襄陽一江之隔所帶陝兵即可由彼直下而楊需逗留襄陽日久未據奏報軍情觀其咨會官文英桂之語總欲俟北兵全到方圖下擊是坐擁多兵徘徊於隨州棗陽之間迹似居中調度實則進退無據前此奏報收復德安不過撫拾各屬稟報之詞均於大股賊匪無涉此後賊回漢口復竄應山均未迅速入奏豈江北一帶遂可安然坐鎮耶見在常亮所帶馬隊早抵南陽計日當可與扎拉芬會合扎拉芬後起官兵想亦陸續趕到即著該將軍整隊前進與楊需合兵下擊不得任令楊需藉口耽延孔廣順所帶步隊到信陽者已有兩起英桂擬令徑起德安毋庸繞道隨州所見甚是楊需若仍在隨州坐待北兵是故爲紆折之計置江北大局於不顧自問當得何罪荆州見在雖尙安堵兵力仍形單薄逆匪詭譎異常難保不尙圖窺伺官文但當妥爲防禦力保荆郡宜昌匪徒尤當設法肅清以通川兵川餉入楚之路所屬餉銀見在川陝兩省均有續報啟程之款著官文專弁催提到楚與楊需軍營通融分用楊需何日由隨州進兵扎拉芬何時與楊需會合均著速行馳奏南岸武昌一帶據英桂探報連日均有勝仗而官文奏報常恩到荆州並未述及是否確有捷音亦著迅速探明奏報將此由六百里加緊各諭令知之○諭勞崇光惠慶奏酌保出力官紳兵練等各摺片均已明降諭旨分別辦理矣廣西省土匪蠢起四處蔓延即如勞崇光等本日所奏永福甯陽朔臨桂荔浦等處均被匪擾恭城游匪攻陷富川興平股匪並敢直撲省城雖經官兵圍練先後勦捕或殲斃首逆或登時擊退而此期彼竄並未能淨絕根株著勞崇光惠慶督飭各該地方官並帶兵員弁將敗竄零匪實力搜除毋得稍留餘孽至廣東湖南交界處所如有匪徒滋事即知會該兩省文武協同剿捕毋任彼此勾結致辦理愈難措手張敬修見經帶兵進攻肇慶並著督飭兵練相機接應勿令孤軍深入致有疏失將此由四百里諭令知之○諭英桂奏楚北逆匪復竄備德安嚴防豫南邊境一摺該逆前由小河溪退回武漢因聞武昌官兵連獲勝仗不敢上竄復折回孝感縣楊店地方分股竄擾備近德安見在羅山之九里關及信陽三關情形喫重該撫已派委員弁添募鄉勇分投防堵布置尙屬周密其孔廣順所帶步隊官兵計日可全抵信陽該撫見將此項官兵暫屯關外與邱聯恩互爲聲援並即由信陽出關徑取德安毋庸繞道隨州致多紆折又因豫省勇多兵少已將山東壯勇一千名截回當俟馮官屯殘匪掃數殲除再行酌調官兵赴豫協剿楊需見在隨州已諭令趕緊進剿惟該督所帶兵勇屢經潰敗恐難得力著英

桂卽催令常亮所帶馬隊星夜前進趕赴楊需軍營聽候調遣仍嚴飭該鎮道等於各處要隘加意防備斷不可稍有疏懈其楚北賊情仍著確切偵探隨時具奏將此由六百里加緊諭令知之○予廣西陣亡知府劉樞祖等祭葬卹職○庚子諭內閣戶部奏請飭催豫東漕糧一摺本年河南山東應運漕糧經戶部節次行催河南尚未報實徵數目山東亦未報開兌日期見在節交夏令已逾抵通例限天庚正供豈容任意延宕著英桂崇恩各將該省應運漕糧飭屬趕辦剋期開行務期以速補運毋得稍稽時日儻再敢藉詞延緩卽著該部嚴行參奏以肅漕政○安徽學政沈祖懋奏請將徽州府舊歸浙江管轄得旨尙有窒礙之處汝未深悉前據何桂清奏已允其請仍歸浙經理實與管轄無異○辛丑諭內閣駱秉章奏湖南南路官軍剿辦廣東廣西賊匪疊獲勝仗收復城池並辦理本省土匪擒獲逆渠匪目多名一摺湖南南界與兩粵毗連各處賊匪時虞竄越經駱秉章派撥兵勇疊次痛剿其廣東連州之賊猶竊踞城池抵抗詎駱秉章派令卽補知府王葆生卽補參將李輔朝帶勇相機進剿疊獲勝仗焚戮無算卽將連州及三江營城收復樂昌之賊竄擾仁化並分陷湖南桂陽縣城署郴州知州戚天保卽補知州趙啟玉等軍會合堵剿連獲大勝旋將桂陽縣城收復仁化之賊犯擾桂陽縣東嶺等處趙啟玉等督率團勇擊退大加擒戮餘匪遁回其廣西之賊經湖南官軍屢次越剿本年正月忽有股匪自古城西嶺而來攻陷雷川縣城委員王鑫卽補參將周雲樞各帶兵勇由江華縣進剿獲勝賊復句合連州敗匪從龍虎關竄徧湖南永明縣城王鑫等督率兵勇捲甲疾趨前往救援奮勇衝殺大加勦洗其計斃賊約二千名並賊目多名窮追三十餘里餘匪竄逃其湖南本省土匪與粵匪勾結滋擾被勦紛紛竄守備謹瓊林帶勇追剿至郴桂交界會合團紳分路夾擊斃賊五六百名生擒匪目譚光開等百餘名嘉禾敢匪全股肅清其竄逸者復經各團捆送百數十名其最爲著名之逆渠邱倡道卽朱九濤尹石保二犯經署郴州戚天保等於該州之周源山及藍山縣擊獲正法辦理均尙妥協著駱秉章仍督該員弁等實力堵剿毋分畛域並接緝餘匪務期淨盡所有打仗陣亡之武舉何魁著照把總例議卹文生侯東著照從九品例議卹武生黃騰騰劉澍勻六品軍功童生何皆善何修善均著照外委例議卹卽選同知直隸州知州王鑫卽辦富川股匪尤爲出力著以知府遇缺卽選以示鼓勵其餘在事出力弁勇著該撫擇尤保奏候朕施恩○諭軍機大臣等赫特賀詩齡奏廓爾喀兵侵占唐古忒地方並赫特賀擬親往後藏邊界請暫留詩齡辦理前藏事務各一摺廓爾喀國自上年十月屢次與唐古忒尋釁見復擁兵數千占踞濟隴並奪去聶拉木地方狂悖之迹漸已顯露惟詳閱該國王稟底有唐古忒人將該國草廠民人等肆行殺戮並搶去牛隻之語復求將漢兵撤回不敢侵犯是該國專欲與唐古忒打仗並未聲言抗拒官兵雖夷情詭譎未可深信而該國既謂唐古忒欺陵卽當依案查辦安速了結使彼無所藉口赫特賀見借巡閱爲名赴後藏邊界查看情形著卽照所請辦理儻該國實有屈抑卽令派員前來妥速剖斷使與唐古忒之人共釋嫌怨該國與唐古忒均臣服中國素稱恭順我朝撫馭外夷俱係一視同仁斷不肯稍有偏袒儻妄動兵戈侵占中國邊界亦斷難姑容赫特賀到彼卽割切宣示曉以大義使將濟隴聶拉木兩處之兵速行撤回

聽候秉公查辦鎮撫外夷之法總以信義為主如能辦理平允該國具有人心冀其感悔所調乍了等各路土兵數已盈萬但是否健勇可恃見在止可一面防堵一面與之理論勿輕議征剿並著知照遠賴喇嘛色喀木諾們罕朗結曲不等善為設法開導以期息事安人全在該大臣隨時體察情形相機辦理前此諄諭於廓夷助兵一事展轉遲延致彼得以藉端起釁辦理不善責有攸歸今赫特賀甫經到任正可恩威並用折服其心也濟甯營官四朗格勒於廓兵到時輒退至宗喀實屬怯懦無能著卽革職仍留於該處差遣以觀後效諄諭著准其暫留辦理前臧事務俟滿慶到任後再行交卸將此諭令知之○諭駱秉章奏參將李輔朝等於二月初二初八十一等日進剿星子司白虎墟等處賊匪疊獲勝仗連州三江營均於十七日克復此次打仗出力之該州文武員弁紳團等著有微勞著葉名琛柏貴查明保奏以資激勵見在該撫已飭李輔朝並會剿桂陽股匪之知州趙啟玉乘勝越境冀將乳源仁化樂昌一帶賊眾次第剪除葉名琛等仍須督飭地方官弁激勵團練協同剿辦以通韶連道路該省軍情自克復佛山後是否漸有頭緒各屬賊黨能否日就滅滅實深懸盼昨據勞崇光奏張敬修赴封川防剿已移兵攻克德慶州城復會同署知府郭超凡合剿肇慶之賊該督等務將近日各路情形迅速奏聞藉慰殷念又據駱秉章片奏暫委朱岡司巡檢張清鑑代辦連州知州篆務等語該處民俗雜處伏莽尚多急應迅將英德清遠一路廓清遴派幹員前往署理文武各缺以重職守而資彈壓將此由五百里諭令知之○駱秉章奏因胡林翼一軍兵力甚屬單薄當飭守備譚瓊林等帶勇赴鄂助剿嗣因逆匪勾結興國通山之賊竄擾崇陽通城蒲圻窺伺南省之臨湘平江謀瓊林之勇未能即進三月十六二十兩日賊撲平江北界上塔市營盤臣派知縣何忠駿等會合團勇兩次奮擊斃賊三百餘名賊敗後仍未遠竄見飭各界嚴防至督臣所慮金口不能駐紮胡林翼等應渡江上扼漢川以固荆襄門戶奉諭旨著臣悉心籌畫以見在形勢言之江西湖南雖屢被賊擾形勢猶完湖北安徽皆以重兵討賊勝負尚未可知設湖北水陸兩軍移紮漢川則長江千里盡委之賊其將置東南於不顧乎曾國藩塔齊布水陸兩軍隔在江西前後皆賊聲息中斷更何有直搗金陵之望此臣所未解者一也移紮漢川止能禦上竄襄陽之賊其於荊州並無輕重逆賊水陸並進荊州門戶何存此臣所未解者二也胡林翼等陸軍既繞道上駐漢川水軍無所依附勢非退守監利之螺山岳州之南洋港不可為湖南門戶計尚未為失然水軍既去則武漢黃之克復無期此臣所未解者三也督臣動謂賊眾兵單不思廣濟失利之初賊之尾追督臣者實不過千餘督臣兵勇萬餘亦未為少乃退黃州未一日即退漢口一日即退漢川由此而德安而隨州今且退至棗陽矣是北竄者賊也引賊北竄者誰乎督臣又以餉絀為詞不思自武漢克復後督臣所得之餉不下二三十萬召募川楚無藉之徒姦淫擄掠無所不至不知製計仍隨意招募此臣所未解者四也夫荆襄為中原門戶而武漢為荆襄門戶督臣既知北竄為重何以舍武漢不守而徒顧荆襄既謂上扼漢川可以固荆襄門戶何以舍漢川不顧而節節退走且胡林翼王國才等軍若不能克復漢陽又怎能繞道進扼漢川武漢黃德既均未復胡林翼等縱至漢川亦以孤軍駐於四面皆賊之地又怎能為荆襄門戶計

乎此臣所不解者五也臣以大局關繫非輕不得不披瀝直陳得旨汝所籌尚安惟議楊需失機各條實屬妄談居多該督固爲退縮有負朕恩尚不至如汝所言汝兩任南撫朕尚冀汝有爲乃自陳衰老碌爲歸息地步無恥已極又奏請飭楊載福等統領外江水營李孟羣回籍勸捐募勇等語批楊載福仍可飭令統率師船赴武昌軍營餘所奏俱不准○署湖北巡撫胡林翼奏自正月初七日賊踞漢陽北岸已形梗塞二月十七日武昌失陷南岸又復蔓延自當急攻武漢乃可內固荆襄惟鄂省素稱澤國非舟師得力不能阻遏賊蹤上年十二月水師三板百餘隻陷入江西內湖其泊外江者兩次被襲復遭風擊壞急回武漢修理湘南紳局添造新船百餘隻復經署臬司李孟羣知府彭玉麟招集水勇千餘於三月中旬趕到金口駕駛甚利即可水陸定期會剿臣之一軍疊次於漢陽進剿頗傷精銳士氣尚可策勵臣於到鄂時即遣哨官前往湖南添募勇二千餘名又經湖南撫臣撤飭守備譚瓊林帶勇六百名援鄂均於三月二十四五等到京口會齊臣思賊踞武昌於城外增修牆濠安置槍礮其循江各岸尤爲賊所嚴防僅由一路進攻難期得力已密飭守備譚瓊林等帶勇二千人由金口紙坊驛以攻武漢之背臣率所部循岸以攻武昌之南與水師會合夾擊副將王國才等從九江回軍近已添造軍械一律修整因思漢陽循江一路可以上通沔陽荊州設全軍集於武昌城外專顧南岸則漢陽之賊必更滋蔓臣卽飭王國才等渡江進紮遏賊上竄之路三月二十四日又進屯沌口沌口山勢可蔽風濤舟師卽依爲營約期會剿如果一處得手仍可併力合攻至西安將軍扎拉芬署提督訥欽所帶兵勇尙未知行抵何處如能迅赴蔡店以攻漢陽之西則賊勢旣分可期得力臣等各營雖口糧缺乏斷不敢因此稽延坐廢時日得旨覽奏分南北進攻並防旁窺布置尙合機宜總以實力防剿以分賊勢爲要○追子河南陣亡知縣孫惠霖建祠陣亡遊擊高行之祭葬世職建祠○王寅諭軍機大臣等托明阿等奏疊攻瓜州兼築長圍一摺前此瓜州逆匪雖連被水師截擊斷其接應之路此次陸路官兵亦經托明阿陳金綬等分東西路進攻賊眾均各敗竄而二十三日之戰鎮將陣亡殲賊雖多得不償失且分築長圍意在困其紛竄之路惟該處溝塍環阻非若平原曠野較易施工而沿江一面亦恐未能堵截托明阿等固不可輕進失機亦不可以慎重爲名徒延時日惟有與吉爾杭阿等水陸分攻南北並舉使逆黨應接不暇庶可搆其巢穴至沿江州地尙有賊蹤窺伺賊中又新添堅利戰船吳全美等復失去紅單船一隻爲賊所得必致勢更披猖著托明阿一面飭令武慶統同曾勉禮等分段防守嚴催李德麟吳全美等實力環攻使江面漸就肅清則瓜州之賊自易剿除儻令水陸紛竄而我軍又屢有失挫則剿辦終無把握托明阿等務當悉心籌畫力求制勝之方毋負朕諄諄告誡之意將此由六百里加緊諭令知之○貴州巡撫蔣蔚遠奏在籍檢討但鍾良捐賞募勇防守之代父顧懇免罪得旨但鍾良捐賞募練實屬踴躍急公應如何獎勵之處著該部議奏其所請代父贖罪不准行○予江南陣亡總兵官錫綸等祭葬世職○癸卯諭內閣昨據托明阿等奏水師連次剿賊情形本日復據向榮奏師船進剿大獲勝仗等語三山江面賊匪經官軍連次攻擊疊受懲創三月二十六日總兵吳全美等復會督各船進剿賊船地遞聯絡併力撐拒吳全美首先衝進並

親然大礮轟擊把總郭定猷躍過賊船紅單各船乘勢衝突拋擲火罐噴筒斃賊無數外委何慶龍等亦俱奮力進攻賊眾紛紛潰敗副將李德麟帶船向北岸迎剿該逆搶風來拒勢極兇猛勇目劉蔣華持械躍過各兵勇相繼躍登痛加轟洗賊匪除殲檢外均撲江淹斃沈毀賊船無數駛逃各船復被遊擊唐國棟等奪獲多隻其已革總兵王鵬年一軍正在轟剿得手適吳全美李德麟兩軍齊至會同夾擊逆船支持不住悉行敗逃統計先後焚溺大小賊船二百餘隻奪獲大柁多槳快礮等船二十五隻大小銅鐵礮位八十餘尊火藥四千餘斤軍械火器無算生擒偽先鋒陳長順賊目孫元錢永章大中等六十一名其餘殲斃及焚溺賊匪不計其數總兵吳全美副將李德麟激勵兵勇每戰皆捷此次督船進攻大獲勝仗洵屬尤爲出力著先行交部從優議敘藍翎兵丁梁正源前次首先斬鍊極爲奮勇六品翎頂勇目劉蔣華奪大柁賊船最爲勇往均著賞給五品頂帶並賞換花翎以水師千總補用其餘出力各員弁兵勇著向榮等督飭該總兵吳全美等統帶師船乘勝上駛以期肅清江面毋稍延緩○諭軍機大臣等向榮奏師船進剿三山江面大獲勝仗一摺自上月初七日以後師船連日獲勝甚爲奮勇出力昨據托明阿所奏南岸剿賊情形大略相同而北岸水師葉常春等及江浦六合各勇焚奪賊船賊礮亦復不少果能如此兩岸齊心合剿不患江面不清惟三山礮臺阻我師船上駛之路非得陸路勁兵不能掃除詔邵良此時是否已移師至江甯鎮即著向榮催令由三山一帶出剿將該逆礮臺設法攻毀使水師不至阻礙方能上扼東西梁山等處至上游烏江賊船甚多水師尚未能剿至該處而該處逆船轉得隨時援救下游之賊尤須陸路官兵牽制其勢本日和春等奏張光第已進紮張家寨於三月二十日得有勝仗殺賊九百餘名該處地方距向榮前奏之石磯橋遠近若何是否已偏江岸亦著催令迅速扼剿二十七日續獲勝仗復經沈煥燧剿賊艇腰篷洲之賊當不敢與三山江面聯絡武慶防堵浦口之兵亦當在陸路接應與葉常春等共清洲地並著咨會托明阿等妥商籌辦此時水師連次得手正宜鼓其銳氣奮勇直上不可再有停頓而陸兵接應尤爲緊要著向榮等分飭各處江岸一體進偪水陸夾攻不得專恃師船致令深入無援也鎮江近日攻剿情形未據奏報焦山師船亦著吉爾杭阿催令乘時剿金山瓜口一帶賊艇以爲肅清江路之計將此由六百里加緊各諭令知之○僧格林沁奏逆匪竄踞馮官屯伏巢不出臣開弓引河用水浸灌乃該逆所占之處地勢較高初時殊不驚懼臣營將圍牆培厚加高用水車水戽盡力澆灌十數日來圍牆以內高處水深二三尺低處水至四五尺不等見在該逆潛伏之處俱已有水二三尺穀麥雖尚充足半被水浸三月二十日後該逆見水勢日長始行驚慌連次乘夜窺伺向南北礮臺奔撲均經兵勇隨時擊退水勢已經成圍料難潰脫但李開芳狡悍異常斷不肯束手待斃並據投出兩湖人供稱該逆起造木梯長梯意欲捨死奔撲臣因申諭各營悉力嚴防不准稍涉大意再俟水漲尺餘該逆即須懸釜而炊其時自必情急復關正可乘機奮擊見已向東昌府調撥小船數隻一俟到齊即選擇水兵合力進攻痛加殲洗得旨該逆竄踞馮官屯已兩月有餘何以屢次進攻並未殲除徒有損折見雖長圍已合水灌亦未得手僧格林沁總統諸軍珍茲窮寇遲延日久朕實爲汝愧愼務期乘機迅圖

克復不准一名漏網以免南賊覬覦固北方之藩維洵爲至要○甲辰諭內閣吉爾杭阿奏辦團人員應否起復據情代奏等語江蘇丁憂在籍左副都御史程庭柱前經諭令幫辦團練見屆服闋著准其起復來京所有該處團練事宜卽著丁憂在籍之侍郎潘會榮會同地方官邀集眾紳士認真接辦○予江南陣亡布政司理問銜章相輝等祭葬世職○四川總督黃宗漢奏報到任日期得旨汝在浙尙恐汝過於急速今在蜀不患失之於嚴惟患失之於緩汝之才力朕保汝實稱川督更望汝驅使羣材自易觀效又奏經河南地方情形批覽奏均悉河南一省實深爲可慮○丙午諭內閣前因王茂蔭奏請暫緩臨幸御園朕因其以無據之詞率行入奏降旨交部議處乃本日據御史薛鳴皋奏因見圓明園奏修圍牆工程以爲臨幸已有明徵並以在宮在園爲敬肆之所分安危之當辨所奏殊屬非是圓明園辦事本係一列聖成憲原應遵循勿替隨時修理補葺亦所常有况未傳旨於何日臨幸乃該御史輒謂眾議沸騰至今未已是欲沽敢諫之名而故以危言嘗試也朕思敬肆視乎一心如果意在便安卽燕處宮中亦可自耽逸樂何必臨幸御園始萌怠荒之念耶當此逆氛未靖朕宵旰焦勞無時或釋無論在宮在園同一敬畏同一憂勤卽如咸豐二年

在園半載無非辦理軍務召對臣工何嘗一日廢弛政事該御史竟以在園爲伴俛優游不期肆而自肆所見亦屬淺陋敬思我皇祖當蒞政之初適值川陝楚教匪滋事彼時幸圓明園秋猶木蘭一如常時 聖心敬畏朕豈能仰測 高深設使當時有一無知者妄行阻諫亦必從重懲處朕豈忍徒博虛譽任臺諫消滅眾聽置是非於不顧該御史本應治以應得之咎姑念其性情才庸所見甚小薛鳴皋著撤去掌福建道仍留監察御史並著交部議處○曾國藩塔齊布奏目下 臣等一軍分爲四支陸路兩支 臣塔齊布駐紮九江羅澤南分剿廣饒相去已在六百里外水路兩支 臣國藩整理陷入內湖之水師駐紮鄱湖李孟羣等回援武漢屯紮金口相去更在八百里外合則力厚分則力薄水軍自去臘十二日輕舟百餘衝入內湖遂與外江老營隔絕正月初三日李孟羣等回援武漢外江之船愈少初五日彭玉麟等因大風壞船全數開赴上游與內湖一軍相去日遠逮至武漢再陷沿江兩岸數百里復被賊踞而金口水軍與鄱湖一軍乃不復能連合矣今水陸各軍之在江西境內者傷者平復勞者休息羸弱者汰遣添換仍可復去秋壯盛之氣惟金口一軍與 臣等相隔太遠值兩次敗挫三次遭風以未經修整之船禦武漢方張之賊不得一日休息此 臣等所深以爲慮者也屢據稟報彭玉麟等回漢之師一面與賊接仗一面修整破船次第完好湖南撫 臣駱秉章復以百餘船前往接濟差足重振軍威而陸軍單薄餉項缺乏及乎有潰散之虞論天下大勢則武昌據金陵上游爲古來必爭之地論行兵常道則上下皆賊而 臣軍坐困於中段亦決非萬全之策是以 臣等一聞武昌淪陷卽再四籌商思所以爲回剿之計顧回剿之策有難言者潯郡據長江之腰胥宜有重兵駐守其間一經撤退則九江湖口小池口之賊皆肆然無忌內犯江西上竄岳鄂均不可知軍士進則氣盛退則氣軟卽期辦得手未知何日始能重至九江其難一也見在該逆不特攻陷武漢且窺伺襄樊自金口以下上下江面皆爲賊踞內湖水師若徒株守鄱湖不出江面則保護一隅無濟大局若乘此春漲由湖出江不難於衝出湖口而難於

出江之後一軍孤懸四面無依上不能遵合金口之水軍下不能速剿安慶之賊艇其難二也湖南用兵已久庫款既空捐項亦竭本年賊蹤上竄胡林翼王國才等之陸軍李孟羣彭玉麟等之水軍皆仰給於湖南弁勇萬餘嗷嗷待哺等欲再率六七千人前往江西既難於供支湖南更無可籌撥大抵兵勇積習久住不戰口糧尙可展緩若有行役之苦戰陣之危不可一日無餉狡者藉詞鼓譟者亦無關心其難三也兼此三端實乏良策刻下分兵往鄂已無可再分若等自行回剿則須豫籌兩月之餉國藩上年曾奏請四川勸捐助餉見已委知縣祥麟赴蜀守催餉銀十二萬兩如此項有著即可恃以爲回剿之用否則姑駐江省城內與其千里馳逐卒以餉匱而致意外之虞又不如堅扼中段保全此軍上諭軍機大臣等行兵之道合則力厚分則力薄自師船陷入鄱湖賊匪再擾武漢廣饒一帶復有賊蹤竄突該侍郎等水陸兩軍實有不能不分之勢見在金口一軍相隔雖遠昨據胡林翼奏由湖南添船募勇兵威復振曾國藩若竟回剿楚北恐九江湖口小池口之賊勢必內犯江西而塔齊布陸軍亦無聲援至株守鄱湖徒糜軍餉自應乘此春漲由湖衝出惟出江後既未能遵合金口水軍復不能速剿安慶賊艇不如仍與塔齊布陸軍會合先行攻克潯郡再圖進取惟前此曾國藩師船遇風敗挫漂失多隻見在金陵卽有此等戰船必爲賊匪所得愈以增其兇狡此時鄱湖師船出泊九江能否保護使無意外之虞惟在該侍郎酌度情形妥爲籌畫設或九江難以停泊而武漢情形更爲喫緊卽分兵應援武漢曾國藩仍帶兵船居中策應江面得此一軍亦足斷賊匪往來之路該侍郎所謂千里馳逐不如堅扼中段所奏亦不爲無見當此上下皆賊總宜計出萬全勿以浪戰失機勿以遲回誤事一切機宜朕亦不爲遙制該侍郎不可因挫失之餘遂致束手無策仍應激勵軍士踴躍用命謀定後動勿負初心以副委任塔齊布攻剿九江近日情形未據奏及豈爲賊氣阻隔竟不能聲息相通耶並著隨時奏報以紓懸繫將此由六百里加緊諭令知之○諭前因曾國藩等奏軍餉不支當諭令王懿德何桂清於閩浙兩省每月各籌銀二萬兩解赴曾國藩等軍營應用嗣據何桂清奏四月分起每月藩庫籌銀一萬兩運口糧道庫合籌一萬兩已委員領解啟程本日據曾國藩等奏稱水陸弁勇有月餘未給餉者有兩三月未給餉者金口一軍口糧不繼卽有潰散之虞見在該侍郎統兵出勦需餉愈殷必當力籌接濟毋誤軍機著何桂清再照每月二萬兩之數籌濟兩三月餉需先行撥解江西曾國藩軍營以供支放俟彼處軍餉足資接濟再行按月坐扣至閩省應解每月二萬兩尙未據王懿德覆奏並著迅速先籌一月餉銀解至江西曾國藩軍營稍延緩將此由六百里加緊各諭令知之○丁未浙江巡撫何桂清奏報江西廣信玉山郡縣失守衢州防剿情形並調福建金陵官兵得旨羅澤南已抵廣信自可追剿免致蔓延至省城一切暨撥兵籌餉汝之責無旁貸尤當迅速妥辦○戊申諭軍機大臣等楊需奏北路官兵尙畱信陽懇請飭催一摺據稱賊匪竄德安見會集各路兵勇分道攻剿惟孔廣順統帶之步隊二千五百名因途中阻雨於四月初二日始抵信陽復經英桂暫畱並因兵丁口糧等尙未豫備以致未能前進請飭迅速來楚等語此項步隊官兵前經英桂奏稱於行抵信陽後暫屯關外與邱聯恩互爲聲援見在楊需擬令常亮等由馬平港進

攻德安其漢陽一路派孔廣順步隊兵爲頭隊孔拉芬馬步兵爲二隊由漢川取道進攻已諭令照擬辦理豫省邊防固屬緊要惟坐守不如迎勦且山東續調之兵一千名卽日抵豫足敷防堵所有孔廣順兵一千五百名著英桂飭令該總兵統領卽日啟程前赴漢川一帶會合進勦並將口糧等項剋期豫備毋得稍涉遲誤該官兵啟程日期並著卽行馳奏前因張之萬奏參徐廣稽不能得力並武生李景瑞控告該革員畏意退避各情諭令英桂嚴行查辦昨復據黃宗漢奏稱徐廣稽在歸德督捕既有病容又與地方官不甚和協等語徐廣稽係戴罪效力人員旣因病不能得力又與地方官不能和衷著英桂卽將該革員撤回毋庸辦理勦匪事務至徐廣稽被控畏意退避情節仍著查明參奏毋稍瞻徇將此由六百里加緊諭令知之○諭楊需奏賊匪復竄德安統兵分道攻勦一摺逆賊竄踞德安驅逐民人修壘築臺顯係意圖久踞以爲乘間北犯之計該督請以常亮訥欽楊昌泗等所帶兵勇由應山進攻德安而令孔廣順孔拉芬與該督見帶兵勇沿河進勦漢川意在先復武漢以爲攻賊之所必救固應如此分道進攻惟訥欽在德安曾經失利致賊入城未可深恃孔拉芬孔廣順多係生力官軍以之進勦漢川儘可得力若該督再同往漢川則德安盤踞之賊又生詭計非上犯荆襄卽襲我漢川官軍之後殊非善策楊需著毋庸前赴漢川卽由隨州星速進兵督同常亮等先復德安將內河之賊節節掃除再行進逼漢陽其漢川一路卽責成孔拉芬督同孔廣順等進勦未到之川勇卽作爲孔拉芬之第三隊兵力亦不虞單薄楊需自正月以來節節退守從未得一勝仗逗留隨州東陽又復經旬月見在德安賊勢漸堅該督轉擬率兵南下豈該逆盤踞堅城後路之憂未靖該督遂能克復漢陽不慮腹背受敵耶常亮已抵南陽該督令其赴德安則須繞道而東孔廣順見在信陽該督令其赴漢川則又須繞道而西取路未免不順惟馬隊不宜於水路不能不爲此調撥仍著催令趕緊趨行或可以其迅速補其紆折本日已有旨諭知英桂令孔廣順卽日出關前進想不日定可馳抵京山一帶如果尚未到齊卽著孔拉芬嚴催前進該督見帶之兵合之原派常亮等之兵不下八九千人務將德安逆賊剋日勦盡不准再事遷延該督何日馳抵德安並著迅速馳奏至所需餉銀見在川陝等均有續報啟程之款前經諭知官文專弁催提與楊需通融分用著該督一體嚴催遵旨分撥嗣後再有續解之款亦著照此辦理將此由六百里加緊諭令知之○庚戌僧格林沁奏逆匪竄踞馮官屯經臣用水攻圍極力浸灌圍隄以內高處有水三四尺低處水深至五六尺據投出之人供稱賊窖之內亦有水三四尺不等賊匪雖形驚慌堅匿如前四月初十日調到小船數隻十一日先令投出之人向內招呼解散脅從並諭與限三日投誠免罪復因逆首李開芳罪大惡極恐其自盡致逃顯戮假以愛其才幹諭令一併投誠乃該逆仍觀望不出十二日以前陸續投出兩湖等處人二百二十二名逐一查看尙係真心來歸自應仰體 聖主好生之德寬其一綫當卽收錄臣豫料李開芳心藉此另生詭謀當與德勒克色楞西凌阿等嚴密防範該逆果於十三日令夥匪一百四十餘名夾澗柱平高唐難民數十名齊出投降並有李開芳心腹僞先鋒黃大漢卽黃近汶一同投出臣仍佯爲收撫將投出之人全數渡出除往平高唐之人嚴看外其餘一百四十餘名全數誅戮籌計李開芳見

許降之人均將渡出重濠必以爲墮其術中隄防或懈遂密傳令齊隊進攻詎該逆防守如常我軍僅偏近該逆土塋燒毀賊窩鋪數處仍未精穴揜渠四十五等日兵勇奮攻大礮轟擊該逆萬分窮蹙仍敢求讓一路逃往南省再不北犯等語當即一面呵斥不准一面督令兵勇極力圍攻該逆勢不能支於十六日前行投出就擒除將該逆李開芳及曾受僞職之黃懿端謝金生並李開芳親隨李添佑譚有淮韋名傳曹得相劉志濼等八名即派員子德勒克色楞已革侍郎培成天津道張起鵠檻解赴京文惠親王辦理外其餘逆匪一百餘名悉數正法其被擒收錄復投賊巢之僞上將軍劉子明一犯情罪尤重當即凌遲處死臣仍督飭各營兵勇前往逆窟嚴密窮搜並無一名漏網再此股竄孽既經蕩平見統各營除受傷患病必須遣回休養外其餘官兵並投誠義勇尚可挑選精銳臣擬即督帶赴南協剿惟江南皖楚近日何省待兵尤殷不能深悉亦未敢專擅伏乞訓示遵行其應行遣散之兵擬先飭令啟程挑贖投誠義勇酌給川資給予免死護照分遣回籍各安生業所有在事出力文武各員可否由臣量請獎敘之處出自 天恩 上諭內閣僧格林沁德勒克色楞西凌阿奏馮官屯軍務告賊首逆就擒餘匪盡殲一摺覽奏欣慰科爾沁博多勒噶台親王僧格林沁自投爲參贊大臣後督師剿賊均合機宜忠勇之誠深堪嘉尚前次殲滅連鎮賊匪卽迅速移兵圍剿高唐迨逆匪竄踞馮官屯堅匿不出復多方設法將逆黨首要各犯悉數殲擒北路一律肅清厥功甚偉前經賞給親王著加恩世襲罔替並賞坐肩輿伊兄二品頂帶台吉琅布林沁著賞給輔國公伊弟四等台吉崇格林沁著賞給二品頂帶並賞戴花翎貝子德勒克色楞前在勝保軍營未能迅速奏功本有應得之咎自隨同僧格林沁幫辦軍務後極知奮勉克成厥功著賞給貝勒銜並賞戴三眼花翎察哈爾都統世襲輕車都尉西凌阿幫辦軍務疊著戰功著賞給三等男爵所有在事出力文武各員並著僧格林沁等查明保奏候朕施恩見在馮官屯逆匪全數蕩平著僧格林沁挑選精銳官兵分起南下該大臣卽馳驛來京陛見以慰廬懷○諭見在馮官屯逆匪全股蕩平北路一律肅清軍機大臣贊襄軍務夙夜勤勞允宜分別加恩以昭優眷恭親王奕訢著交宗人府從優議敘尚書彭蘊章侍郎穆蔭杜翰均著交部從優議敘侍郎瑞麟著交部議敘致仕大學士祁寯藻前在軍機大臣上行走懋著勞勤著一併交部從優議敘其滿漢章京各員均著交部議敘○諭見在馮官屯賊匪悉數蕩平北路一律肅清奉命大將軍惠親王總理巡防一載有餘勤勞懋著著交宗人府從優議敘惠親王之子奕詳著賞戴寶石頂奕詢奕謨著賞給頭品頂帶均著加恩在上書房讀書以昭優眷巡防王大臣除恭親王奕訢侍郎穆蔭杜翰業經加恩外吏部尚書花沙納都察院左都御史聯順戶部左侍郎羅傳衍著一併交部從優議敘前戶部尚書孫瑞珍著交部議敘○諭陳啟邁奏進剿七陽賊匪大獲勝仗收復城池一摺江西饒州賊匪分竄弋陽經甯紹台道羅澤南知府李續賓等各帶兵勇分隊進攻在大水橋瓦夕橋地方斃賊多名其逃入村莊者以火焚之死者無數復在橋外墜水者數百人生擒僞總制程禮等多名復於陳家山大松林南北培禦慶戰多時統計殺斃焚斃溺斃賊匪不二千餘人奪獲軍械無數於三月二十一日收復弋陽縣城擒獲賊黨五百餘名各鄉又接獲長髮賊一千餘名

勦辦尚爲奮勉仍著陳啟邁督同該員等跟剿逸匪悉數殲除著七陽縣知縣王蘭被匪破城皆有應得著即行革職廣信府知府袁泳錫協同收復地方功過尙足相抵著免其置議○諭軍機大臣等本日據僧格林沁奏馮官屯軍務告成首逆就擒一摺覽奏欣慰已明降諭旨分別加恩並出力各員准其酌保矣此股逆匪窮蹙之餘猶思負隅久踞經該大臣等勦力同心勦除淨盡並將首逆李開芳等檻送京師見在北路肅清僧格林沁即請督兵南下具見忠勇之誠惟該大臣督兵勦賊已歷年餘辛勞倍著朕嘉尙之餘實深眷念僧格林沁著即馳驛來京陛見以慰塵懷所有各營官兵及投誠義勇自應分別留撤惟見在兵勇究有若干該大臣所挑精銳兵勇及應行裁撤各數目著詳細查明迅速覆奏西凌阿仍著統帶各營酌留兵勇暫行駐紮馮官屯聽候諭旨將此由六百里加緊諭知僧格林沁並諭西凌阿崇恩知之○諭陳啟邁奏派勇赴粵援剿獲勝並籌餉接濟軍糧一摺廣東樂昌仁化等縣匪徒因江西練勇前赴韶關援剿輒行攻撲與冀阻官軍進路雖經周汝筠等督帶兵勇進剿殲擒二千餘名該逆已大受懲創而郡圍未解韶關賊匪尙多均自三水清遠英德而來勢頗猖獗韶州與江省毗連陳啟邁固應撥兵援剿其英德等處賊匪盪聚某名琛等設法繞道接濟未據覆奏見在江西籌撥赴韶兵餉已有四萬六千兩後難爲繼著某名琛等迅速籌款繞道解韶以濟要需陳啟邁仍當不分畛域督飭周汝筠等實力進攻籌濟兵餉毋令缺乏將此由六百里各諭令知之○吉爾杭阿奏准浙江撫臣何桂清函稱江西玉山縣於三月二十七日失守二十八日賊竄常山交界之河安嶺爲浙兵擊退另有大股將由間道徑犯常山請兵援應等因查江浙唇齒相依浙江稍有挫失蘇州卽行震動實關東南大局當於無可抽撥之中酌量見駐丹陽之浙江副將王懋管帶浙江兵八百名以總兵都隆阿爲統帶先行馳回聽候何桂清調遣一面會商尙榮在江甯軍營抽撥都司虎坤元管帶川兵五百名臣又在鎮江軍營抽撥參將魯占鼇管帶川兵五百名以總兵虎嵩林爲統帶於初七初十等日分起進發又接浙江撫臣來函該逆聲東擊西繞出常山之役於三月三十日攻陷開化縣四月初二日擾及遂安需兵甚急臣當催虎嵩林都隆阿無分兩夜迅速進行以資援應至蘇州省城爲根本重地切近浙江必應嚴爲之備正會商怡良設法籌防接准尙榮咨會已另派提督鄧紹良管帶湖南精兵四百七十名督同虎坤元所帶川兵五百名都隆阿所帶浙兵八百名馳赴浙江勦辦其虎嵩林督同魯占鼇所帶川兵五百名應暫留蘇州藉資彈壓等因臣仍確探浙省情形妥籌布置上諭逆匪於旬日之間連陷三城勢甚猖獗衛郡距杭不遠水路一帆可達必應於衢嚴一帶星速進兵堵剿兼施以杜其奔竄之路吉爾杭阿見已飛催虎嵩林都隆阿所帶之兵趕緊赴浙尙榮亦另派鄧紹良管帶湖南精兵赴浙援剿自應如此辦理惟前據何桂清奏富勒興阿見駐兵常山之五里亭該處各隘口防兵尙形單薄羅澤南帶兵早抵廣信是否已撥兵勇赴常山會剿駐徽之周天受是否赴衢均著何桂清迅卽飭催會同截留之閩兵並金陵鎮江所撥勁旅合力兜剿務將攻陷開化之逆匪悉數殲除斷不可稍事遲延致令逆眾蔓延再寬他處至杭城防堵該撫已調乍浦駐防官兵至省並著妥爲調遣協力堵禦蘇城兵勇較單魯占鼇所帶四川兵五百名卽

令暫留蘇州藉資彈壓仍著怡良吉爾杭阿嚴飭署藩司楊能格等認真督辦團練嚴查奸宄豫籌防守事宜以期有備無患其鄧紹良虎嵩林等接浙之兵卽著向榮等迅催啟程均聽候何桂清調遣布置並著何桂清等將近日常山等處勦辦情形隨時奏報以慰懸繫將此由六百里加緊各諭令知之○向榮吉爾杭阿奏鎮江近城廟宇民房雖被賊焚毀牆垣未倒既阻我兵進擊之路該逆轉可恃爲埋伏臣吉爾杭阿於三月二十一日會同余萬清等督隊前往拆毀適瓜州金山之逆渡江會合鎮城逆匪傾巢來撲我兵槍礮齊施擊斃賊匪不計其數賊始狂奔近城未倒牆垣我軍盡行拆毀四月初九日該逆突出南門意圖割麥經參將周兆熊帶兵擊退田麥未被搶割其自京峴山至象山乞濠築牆工程官軍趕緊完竣將總兵泊承陞所帶營船十隻移泊象山並派參將台斐音帶領兵勇附牆紮營杜賊東竄南路自板兒橋至觀音山亦有隙處見並續築濠牆其城之西南隅有虎頭摩旗兩山相連距城僅半里擬俟南路濠牆告竣卽抽兵在兩山紮營高築礮臺向城內轟擊該逆雖欲負隅勢亦不能至銀山當江甯鎮江之衝該逆於山北連營死守其山南離九華山僅三四里擬俟虎頭摩旗二山營盤築定再行設法搶占向榮又奏查師船自斬鍊攻出上游亟盼陸軍會合進攻今吳全美等師船於四月初四日進攻上三山續獲大勝適鄧紹良之兵已到江甯鎮於初六七等日堵勦順利疊報克捷足壯軍聲其北岸江浦之石磯橋已經廬鳳道張光第分兵出堵亦得斬馘遂洲竄匪多名所有師船糧餉軍火卽可由南岸江甯鎮陸營解運接濟惟三山賊黨嘯聚賊船未盡掃除亟應趕緊夾攻悉行掃蕩然後水陸並進方無後顧之虞臣已嚴飭吳全美等和衷共濟併力進攻直赴上游肅清江面又奏接據何桂清函稱浙省情形危急非有勇敢大員不足以資統率因檄令鄧紹良統帶湖南兵五百名由江甯鎮兼程赴浙已報於十一日啟程其江甯鎮諸軍見當攻勦喫緊臣復抽撥前敵貴州兵五百名交總兵德安帶往接應與師船會勦三山以免顧彼失此嗣接吉爾杭阿函稱復調虎嵩林川兵五百名赴浙接應臣思浙省兵勇添撥本已不少又有鄧紹良前往統帶足以力遏兇鋒而蘇州接壤浙江風鶴時驚應卽將虎嵩林一軍截留蘇州駐紮以安人心惟金陵之兵日分日少設該逆分股竄突慮堵勦力有難周一俟馮官屯蕨功仰懇飭調吉林馬隊一千名步隊二千名來南俾資助勦均報聞○于江西陣亡遊擊常海等祭葬世職○辛亥論軍機大臣等昨據僧格林沁奏各營官兵及投誠義勇分別撤留等語已諭知該大臣將兵勇數目及應挑應撤各數詳細具奏矣因思投誠義勇一項人非一省良莠難齊其中真心悔罪奮勉立功者固不乏人而勢壓求生仍懷反側者亦復不少該大臣駕馭有方自不至別有他患以後管帶之人卽恐寬猛兩難易滋流弊况此項義勇南省人居多儻帶往南省而有劉子明之類溷雜其中尤爲可慮見在該大臣如何挑選其挑選之後是否分隸各營抑仍令自爲一隊應如何約束以攝其氣誠信以結其心卽著該大臣於回京之先豫向管帶各員密授操縱機宜方爲妥善或卽分隸營伍使散而易制將來卽令充補各營缺額亦屬安插之一法並著該大臣妥爲籌辦至挑贖之勇并據聲稱酌給川費給予免罪執照遣發回籍其是否呈繳軍械未經敘及儻該勇等原籍尙爲賊踞或回籍後並無生業可謀又恐流而爲

匪加以結隊同行恃有免執照沿途騷擾亦不可不防兼恐該勇等在北路軍營日久一旦投入賊營或熟悉道路或洩漏虛實尤屬可慮該大臣務於解散之中熟籌鈐制之法萬不可稍存大意致貽後患將此由六百里諭令知之○癸丑于江西陣亡知縣周鳴鹿等祭葬世職○甲寅曾國藩塔齊布奏據羅澤南林福祥稟稱三月十九日自貴溪拔營至水門埠二十日向弋陽進發羅澤南與李續賓帶湘勇中右兩營為前隊蔣益澧帶湘勇左營唐訓方帶訓字營為二隊林福祥與趙如勝率捷勝軍為三隊文明等率寶勇為四隊訓導鍾世楨等率志同等軍為五隊各以六成隊迎敵雷四成隊保護輜重於二十二日由大水橋至五里亭陳家山等處與賊接仗疊獲大勝進攻弋陽縣城西北兩門嗣復環攻東門先後斃賊數千名賊眾敗潰其在城者猶閉城自固湘勇先登諸軍繼入當將弋陽縣城克復等因查廣信為江西富饒之區奏報必由之路保全廣信則內可以屏蔽撫建外可以進攻饒州茲幸仰賴 天威弋陽股匪就殲大挫兇鋒即當跟蹤追剿肅清江西東路以期漸偏皖境此次出力員弁容 等擇尤奏請獎敘以資激勵藍翎候補把總張以德候補千總易傳武喻能益奮勇捐軀懇恩飭部照陣亡例議卹傷亡兵勇俟查明照例辦理 上諭內閣前據陳啟邁奏官軍克復弋陽已降旨將陣亡之遊擊常海並把總張以德等分別議卹本日據曾國藩塔齊布奏甯紹台道羅澤南等各帶兵勇連獲勝仗見在跟蹤追剿等語所有此次出力文武員弁著曾國藩等擇尤保奏○曾國藩奏自咸豐二年粵匪竄鄂迄今不滿三載而全軍覆潰大敗者五次其間小敗小潰不可勝數二年十二月初四日粵匪以地道轟破武昌城垣逆旗猶未登城而城內外兵勇已狂奔潰散是為第一次大潰三年春間署督 張亮基等招撫潰兵添招練勇稍有起色九月十三日田家鎮失防水陸兵勇同時回奔是為第二次大潰其時 函致前督 吳文鎔謂鄂省之兵視奔潰為故常如再行收集必須改絃更張另募額兵另招練勇而後可以成軍吳文鎔未及更改即被崇倫參劾倉卒出師四年正月十五日十三營均被踏毀將弁兵勇盡數逃散是為第三次大潰崇倫青磨等復收潰兵並廣募湖南四川之勇支持數月餉盡援絕六月初二日奸細竊發賊旗擁入會垣青磨率兵奔赴湖南沿途逃散大半是為第四次大潰 吳提 塔齊布等奉命東征幸復武漢督 楊需復收潰兵又招湖北河南之勇數近三萬兵力不為不厚楊需屢次奏吞亦自敘其戰功之多士卒之勁意謂可簡練精銳頓改舊觀矣不圖廣濟一敗退至蘄水退至漢口又退至德安棗陽兵勇或從之以行或遇敵不歸是為第五次大潰夫古今所以激勵軍士者重賞以鼓好勝之心嚴刑以誅奔潰之卒故可用也今湖北兵勇既不好勝又不畏刑若因循不改其可慮必更有甚於今日者亟宜變易前轍掃除而更張之凡標兵之求歸營伍者一概不收凡練勇之曾經敗潰者亦不復用大抵山僻之民多獷悍水鄉之民多浮滑城市多游惰之習鄉村多樸拙之夫故善用兵者嘗好用山鄉之卒而不好用城市近水之人 愚以為欲另募湖北額兵宜在襄陽鄖陽等屬深山窮谷之中招募苦力作之民擇其英鷲者編入兵籍假以時日而訓練之與武漢德安等府遠相隔絕使向來之潰兵潰勇浮游無歸者不得改名混入然後可得一旅之勁兵古之行軍者克一二名城不以為喜得一二良將數千

精卒則以爲大喜失一二名城不以爲憂失一二良將損傷數十壯士則以爲憂即數稱精銳之師或積勞而疲或餉匱而散或不和而驕蹇則愈引以爲憂今日湖北之事省城不遽收復尙不足患惟通省無一勁兵精卒乃爲無窮之患雖調他省之兵幸而克復而本省無強兵守之亦終非可久之道故湖北之急務在於另募額兵另招新勇目前的收復鄂垣在此異日之保守楚疆亦在此上年二月間臣具奏江北宜添兩路勁兵外一路沿江岸而下內一路由蕪黃而出倘太請飭袁甲三募壽州光州之勇出漢黃之背不知 皇上已俯准施行否如未蒙俞允則江北千里極爲空虛無論江面不能清武漢廬州不能復即使僥倖而肅清恢復而流賊四散旁出橫逸截我後路已清之江面不旋踵而梗塞已復之城垣不旋踵而復失去冬之事即前車之鑒伏乞我 皇上臣慮念南服神算獨操縱袁甲三不克西上亦懇飭籌一支勁旅疾出黃州之背並請飭下湖北督撫另立新軍將前此潰兵潰勇一概革除蕩滌舊習重振軍威使江之北岸得兩路足恃之兵可合可分可內可外不特有益於大局即臣等南岸之陸兵上下兩處之水師亦皆得所憑藉有恃不恐矣 上諭軍機大臣等曾國藩奏湖北兵勇不可復用一摺武漢等處屢遭蹂躪可見該省兵勇不足特曾國藩等克復武漢後楊需收集潰兵並招募楚豫之勇爲數不爲不多乃廣濟一敗幾不復振此時必應簡練士卒力挽從前積習惟該督所帶楚北兵勇甚多一時恐未能概行裁撤另募新兵全在該督等嚴飭帶兵將弁挑選精銳裁汰疲羸申明紀律信賞必罰庶可轉弱爲強其首先奔潰之卒即應處以軍法不得少存姑息據該侍郎奏稱襄陽鄖陽民風樸拙招募該處鄉勇自可得力其宜昌荊州等處當亦可招募以資攻剿前經諭令該督督同常亮等先復德安節節進剿此時孔廣順所帶步隊官兵諒已抵楚此項勁旅尙屬可恃著即懷遵前旨迅速進剿毋再遷延胡林翼前奏添募水陸兵勇分佈南北兩岸進剿所募各勇能否得力著加意察看分別淘汰見在武漢等處如何攻剿情形並隨時奏報以慰廬念原摺著鈔給閱看將此由六百里各諭令知之○乙卯諭軍機大臣等僧格林沁奏馮官屯見存京旗吉林黑龍江綠營官兵六千餘名均交西凌阿統帶暫在該處聽候諭旨等語該處官兵除裁撤歸伍尙存京旗兵若干名吉林兵若干名黑龍江兵若干名綠營兵若干名係何省何營統計馬隊若干步隊若干著西凌阿分晰開單詳細具奏見在馮官屯軍務告竣直隸糧臺著即裁撤其見存官兵著暫留順天糧臺通永道覺羅海瑛會同山東糧臺兗州府知府葉圭書辦理支應將此諭令知之○浙江巡撫何桂清奏賊擾常山開化經官兵擊退竄往徽境見飭堵剿情形得旨該鎮是否退縮無能該道府等有無扶同捏飾著一併確查迅速覆奏勿任貽誤地方○丁巳諭軍機大臣等扎拉芬楊需奏武漢賊匪上竄德安我軍進攻並常亮失利退回扎拉芬被圍衝出受傷各摺片覽奏實深焦急此次賊匪大股分撲平林市長林岡楊昌泗等迎勦先勝後挫常亮所帶馬隊退回時反將步隊衝亂扎拉芬營盤被圍該將軍受傷潰圍而出見在逆勢猖獗已極襄樊一帶情形甚屬喫重前據樂斌等奏稱先後調派兵勇數千名歸顏朝斌統帶赴楚又據僧格林沁奏派劉銜等帶投誠義勇前往助勦此項兵勇諒已陸續抵楚著該督等迅速催提奮力攻勦扎拉芬見在是否由南路赴襄陽該郡係糧臺

重地且尚有後起部隊該將軍到彼一面嚴密布置一面仍趕緊整頓與楊需諸軍合力進剿楊需屢次挫失若再不知奮勉致逆匪肆擾襄樊一帶自問當得何罪見在荊平縣馬官屯賊匪悉數殄滅投誠兩湖義勇僧格林沁已派員管帶回籍交該督等調遣並據該大臣見派勇目詹起綸等八名於到楚後暗探賊營設法解散該督即當隨時察看情形剿撫兼施妥爲辦理將此由六百里加緊咨諭令知之○諭見在楚北賊勢猖獗亟宜派兵策應著西凌阿於馬官屯駐紮官兵內挑選綠營步隊精兵二千名配齊軍裝器械揀派得力將弁管帶即日啟程前赴湖北楊需軍營聽候調遣並將該管兵啟程日期先行具奏毋稍遲延將此由六百里諭令知之○諭本日據英桂奏探聞賊竄隨州一摺此次逆匪分股陸續上竄德安據河南所獲逆犯訊有欲由隨州稟陽竄往襄樊之供南陽一帶亟應加意嚴防見在扎拉芬於五里墩營盤被撲後是否起襄整旅尙無確信楊需常亮均退去唐縣鎮駐紮賊勢愈張我兵更形單弱若襄陽有警豫省邊防喫重該撫已知會孔廣順即由關外披營向應山進發急宜迅速催該提督徑赴隨州會剿遏楚北賊鋒即以保護豫省邊界至常亮挫失半由所帶馬隊於地勢不宜不如飭令常亮將馬隊退紮二關以防豫境將此由六百里加緊諭令知之○諭英桂奏牛鑑在正陽關防堵見因患病請派員馳往接辦等語正陽關地方緊要牛鑑年衰患病恐致貽誤自應派員接辦惟據稱豫省鎮道大員俱分駐要地防堵一時無員可委自係實在情形善和春福濟迅即就近派委委員馳赴正陽關接辦防堵事宜並飭牛鑑俟接手有人再行交卸以重防守將此由五百里諭令知之○戊午諭內閣和春福濟奏廬州連日圍剿並外賊復至大加斬馘一摺廬州逆匪屢有外賊來接均經隨時擊退四月初七八九等日將水西門城牆攻陷丈餘我兵奮力進擊用連環槍礮佐以噴筒火箭斃賊甚多因值大雨城河水漲未能越過連攻至五晝夜該逆仍復死守十四日復有賊匪二千餘人在煙墩集之西萃廟地方紮營三座欲來接應和春等統兵馳往迎擊斃賊無算並殲騎馬賊二名餘賊奔逃官兵追殺一面將賊營圍打營內賊匪越牆逃竄兵勇擁入盡力砍殺將賊營毀爲平地趕殺十餘里約斃賊三四百名奪獲礮位軍械甚多廬城賊匪外援疊至均被官兵剿退城中餘匪情形已極窮蹙著和春福濟督率兵勇迅速合圍力圖克復毋再玩延○己未諭內閣湖廣總督楊需前因武昌失守降旨革職仍暫留本任責令戴罪自效迨逆賊上竄德安該革督以防守襄樊爲名由隨州以至棗陽節節退守疊經嚴旨催令進剿復以兵勇未集遷延觀望迨西安將軍扎拉芬由陝帶兵行抵隨州於五里墩地方與賊接仗被圍該革督坐擁重兵近在數里之間並不實力救援反催調相去較遠之揀發知府崔蘭馨等前往接應以致該將軍力竭陣亡實屬懦怯無能有心延誤該革督自廣濟兵潰以後湖北逆匪復肆猖獗其貽誤之罪何堪悉數朕僅予薄懲方冀其振刷精神力贖前愆乃數月以來毫無布置孤思溺職實堪痛恨楊需著即革任仍交官文差遣儘再不知奮勉即行從重治罪西安副都統常亮昨因救援不力降旨摘去頂帶茲據楊需查明該副都統於奏調往援時已遠赴唐縣鎮地方臨陣退避可惡已極常亮著即革職仍留營效力以觀後效○諭逆賊李開芳等以邊境秀民甘心從逆輒敢糾領黨與竄擾畿疆實屬罪大惡極見在北

路肅清除逆首吉汝元業經殲戮林淵詳已由連鎮軍解京正法外所有首逆李開芳見經個格林沁捨解來京著即凌遲處死
梟首示眾其授有偽職之逆犯黃懿端謝金生並著凌遲梟示從逆之李添佑譚有桂章名傳曹得相均著即行處斬一併梟示以
彰國法而快人心○諭陳啟邁奏攻剿饒州賊匪大獲勝仗收復郡城一摺江西饒州賊匪自竄踞郡城以來負隅抗拒四出擾害
經陳啟邁派令都司吳錫光等率領水陸兵勇前往攻剿三月二十八日吳錫光派候選府經歷縣丞胡應奎等督率戰船沿河進
攻吳邦柱等帶領兵勇堵剿山劫伏賊兼攻北門又令石玉等各率兵勇四面合圍逆匪突出五大股約有六千餘人蠢擁而來吳
錫光率各路兵勇施放連環槍礮斃匪三百餘名逆眾敗退我兵乘勢衝殺入城該逆分爲七股拌死巷戰我軍亦分九隊截擊殺
賊一千二百餘名餘匪由東門逃出分路奔竄即將郡城收復此股逆匪自竄踞饒郡以後分擾樂平德興七陽等縣經吳錫光帶
領水陸兵勇分路進攻大獲勝仗克復郡城辦理尙屬妥速著陳啟邁督飭吳錫光等乘此聲威移師都昌相機進剿以清江境○
諭軍機大臣等見在湖北逆蹤上竄隨州其荆襄等處及河南邊境地方極形喫重常亮所帶馬隊官兵見經楊需撥赴信陽三關
扎拉芬所帶官兵多已折回棗陽襄陽見尙無人統帶著官文接奉此旨星速馳往隨州接印任事楊需軍營兵勇屢經潰散必得
加意整頓挑選精銳裁汰疲弱方足以資得力前由僧格林沁軍營撥往投誠義勇並著妥爲駕馭俾知感德畏威以助攻剿新授
荊州將軍綿洵到任需時所有將軍印務著載增暫行署理該處防守事宜即著妥爲布置不得專待西凌阿來荆致形諉卸至孔
廣順所帶官兵見經馳赴應山協剿著即星夜趨行一路勦洗遏賊北竄扎拉芬所帶官兵即交孔廣順一併統帶將此由六百里
加緊諭知官文載增並傳諭孔廣順知之○諭見在湖北賊勢猖獗荆襄情形甚爲喫重著西凌阿迅速馳赴湖北就荆州襄陽所
有之兵辦理荆襄一帶防剿事務即將啟程日期先行具奏毋得稍有遲延其馮官屯見存官兵著西凌阿選派得力大員暫行統
帶聽候諭旨將此由六百里加緊諭令知之○諭楊需奏扎拉芬因傷身故一摺扎拉芬於五里墩地方與賊接仗楊需近在數里
之間並不實力救援反因槍礮之聲已息疑其已赴襄陽迨經敗兵馳報始知該將軍已因傷身故種種貽誤殊出情理之外楊需
見統兵勇爲數不少著將撲撲竄隨州之賊迅速殲除以期進攻德安遏賊上竄至扎拉芬所統陝兵均屬勁旅除潰亡以外所存尙
有若干並著楊需設法招集隨營攻剿不得俟孔廣順之兵到齊始行前進儘再不知愧奮則畏葸貽誤之罪斷難倖邀寬宥也將
此由六百里加緊諭令知之○以瑞麟爲西安將軍調載齡爲戶部左侍郎仍署陝西巡撫國瑞爲刑部右侍郎以崇實爲工部右
侍郎景廉爲內閣學士○以官文爲湖廣總督由荆州將軍遷○于湖北傷亡西安將軍扎拉芬祭葬世職○庚申諭內閣武職大員有操
練弁兵之責理應騎坐馬匹以習勤勞儼或自耽安逸平時出入違例坐轎一旦身臨行陣安望其奮勇爭先爲弁兵表率向來武
職坐轎例禁甚嚴犯者必加懲治曾於乾隆嘉慶年間疊奉 聖諭訓誡明切自應永遠恪遵乃近年以來漸就廢弛上年浙江黃
巖鎮總兵湯綸即以擅坐肩輿被參本日復據御史宗稷辰奏浙省武職大員類皆違例坐轎甚至閩省帶勇來浙之偏僻小校亦

多效尤等語浙省如此他省亦恐不免見在粵匪未靖征兵會剿各省武職大員應如何實心操練勤習技藝以期緩急足恃若惟知自圖便安不思振作將來營伍積弊更不可問著再行通諭各直省駐防將軍副都統等及提鎮各員儘有違例坐轎者一經奏參必治以應得之罪其駐防城守尉以下綠營副將以下犯者尤當從重治罪決不寬貸將此通諭知之○諭陳啟邁奏逆匪由興安竄入廣信旋經官軍克復一摺江西興安縣地方於三月二十日有逆匪萬餘人由安徽婺源縣竄至代理興安縣知縣狄上林因先期帶兵出城被匪徒撲入隨會同遊擊謝必魁等督兵圍攻旋斬賊匪一百數十人當將縣城收復二十三日餘匪竄至廣信署上饒縣知縣蔡中和嬰城固守因大雨不能放槍礮被賊攻陷城池蔡中和巷戰被執罵賊殉難教授雷封並署廣信府經歷姚益謙等同時遇害維時廣信府知府袁詠錫正會同浙江甯紹台道羅澤南與安慶府知府李績賓等紮營烏石山下二十五日賊分三股來撲官軍奮力攻擊斃賊八百餘人奪獲旗械多件一十六日賊復分路來撲斃斃長髮悍賊數十人賊眾敗逃官軍乘勝追趕復殺斃千餘人偽尚書范姓等均被斃斃被焚及溺死者不計其數一十七日五鼓各營兵勇奮力進攻踴躍登城袁詠錫亦率兵衝入賊從東門遁去墮水死者無算適署撫州府知府林福祥帶兵趕至生擒偽軍帥詹宗保等十名餘匪奔竄玉山被署知縣張鳴岐等擊退此股賊匪由婺源竄陷興安廣信郡縣城池經羅澤南等督率兵勇剋日收復辦理尙爲迅速在事出力員弁著陳啟邁等擇尤保奏無許冒濫仍嚴飭各該員弁等將逃匪搜除淨盡毋留餘孽○予江西陣亡知縣蔡中和等祭葬世職建祠教授雷封等附祀○辛酉諭內閣葉名琛柏貴奏省河剿匪水陸連獲大勝一摺廣東番禺縣屬匪船竄至黃埔長洲河面經葉名琛等派往東岡烏涌堵捕之守備曾琪等督飭水勇分隊進擊水陸攻剿計燬船一百七十餘隻焚燒三村賊巢二千餘間斃擒溺斃將及萬計兇鋒大挫出力文武各員准葉名琛等覈實保奏所有奮勇殺賊力竭陣亡之護理水師遊擊守備曾琪署水師守備千總曾鵬高歐松茂外委朱耀宸額外鄭洪魁外委鍾光均著交部從優議敘○諭葉名琛柏貴奏勦辦省城西北一帶逆匪疊獲大勝水陸解圍一摺廣東附近省城各匪疊經葉名琛等督兵痛剿上年十一月間尙有匪徒萬餘人在石井石門各鄉屯聚十一月十四日至二十五等日經署遊擊曾廷相等各員接仗二十餘次先後斃賊共計八千餘名生擒一百四十餘名燬賊蓬寮六百餘間並將石井墟等處賊巢一千餘間一律焚燒並先後斃賊二千八百餘名生擒八十名匪船盡絕河道業已廓清省城水陸各路同時解圍居民安堵如常勦辦尙爲得手仍著葉名琛等督飭文武各員弁將附近省城各鄉餘匪悉數殲擒搜捕淨盡毋留餘孽所有在事出力員弁著擇尤保奏候朕施恩其傷亡兵勇著一併查明咨部議卹○諭葉名琛柏貴奏擊退高明縣賊匪臧檢殆盡一摺上年六月間廣東高明縣城被匪闖入經署知縣張作彥等調集團練督率壯勇前後夾擊斃賊二百餘名聞七月初三日各團齊集復在附城要路斃匪三百餘名八月初間該署縣等添募客勇在三板村地方殺賊一千餘名十一月初二日復會同署把總藍廷彪帶勇至太平都勦捕殺斃賊目杜錦剛並賊黨四百餘名三洲墟賊廠及各海口大小賊船均經焚燬賊由陸路來

攻兵勇及伏勇齊出斃賊二百餘名及賊目杜元一名該匪逃至海口溺斃無算地方一律安靖仍著某名琛等嚴飭該文武將在逃餘匪搜捕淨盡無任竄逸署高明縣知縣張作彥署城守把總藍廷彪等本有應得之咎惟旋經督率紳民兵勇合力擊退賊匪緘檢殆盡功過尚足相抵均著免其參處○諭前據刑部奏旗民與宗室覺羅圍毆重案引斷未能畫一請酌定章程當降旨交宗人府查覈具奏茲據恭親王奕訢等詳查覆奏嗣後毆傷宗室覺羅至死者著均照本律擬斬以符例意至從前引斷未能畫一刑名出入豈容遷就總應按例辦理無例者始准援案况例文所載本屬明晰其毆傷未至死者仍按下手曲直情形分別辦理該部所請添纂則例之處著毋庸議○諭軍機大臣等本日據英桂奏湖北賊窟隨州偏近南陽德安仍有賊蹤請飭撥北路勝兵前往一摺見在河南省南路邊防極為喫緊湖北攻剿之兵尙形單弱均非厚集重兵不足以資剿辦所有馮官屯軍營存兵除步隊二千名業經派員帶往湖北並令健銳營內外火器營官兵分起回京外其餘四千名著西凌阿迅卽一併統帶悉數啟程路過雲南普截雷一千五百名交英桂調遣以資防守此外官兵該都統卽行帶赴湖北會同官文等合力攻剿將竄踞隨州之賊趕緊殲除毋任蔓延前僧格林沁奏兩湖投誠義勇派令候選知府劉衡等管解前往湖北此項義勇卽歸西凌阿統帶尤應妥爲駕馭不可稍涉大意致貽他患將此由六百里加緊諭令知之○諭英桂奏探聞賊踞隨州偏近南陽德安仍有賊蹤請飭撥北路勝兵前往應援一摺豫省南路接壤楚北自德安告警信陽已形喫重况隨州更被占踞南陽密運賊蹤自應添撥重兵以資捍禦前楊需奏扎拉芬於五里墩受傷後旋卽捐軀已降旨將楊需革任授官文爲湖廣總督帶兵馳往剿辦見在楊需復退至襄陽其浙河唐縣鎮等處賊勢蔓延並於隨州城北擄糧昨已有旨諭令西凌阿赴荆襄一帶防剿本日復諭該都統迅速起程將馮官屯各營官兵六千名全數帶往抵豫時畱兵一千五百名著卽由英桂派令相機堵禦加以常亮移紮三關之馬隊及邱聯恩等兵力儘可擇要分防此次西凌阿帶兵前往若能乘此得勝聲威不但鄂匪可望殲除兼於豫境邊防大有裨益英桂惟當竭力堵遏嚴飭在事文武勿稍鬆懈以固疆圉將此由六百里加緊諭令知之○于廣東陣亡知縣李福培等祭葬世職